

NKONKO NÈ MANDAMUNA



Twinyikàayi mitù yètù. Mukalenge Yesù, tudi nè kusàkidila Kùdi mu dindà emu bwà mpùngà wa kulwa mu Bwikadi Bwèbè, nè cikondo cyà bwobùmwè eci, nè bwà kusòmba kaaba aka mu myaba yà mu dyulu mu Kilstò Yesù. Mpindyewu, Mukalenge, tudi tulòmba bwà Wèwè kutùngunuka nè kwikala neetù patùdi twakula bwà bwalu Bwèbè apa. Swàkù bwà myoyi yètù yùjiibwè tètè nè disànka patùdi tutàngila Díyi Dyèbè nè milayi Yèbè kutùdi apa. Bèneshàku mpaasàtà wetù, bakwàcishanganyi neetù bàà mudimu, bàna bèètù bònsò bàà balùme nè bàà bakàji bàdi bàlwa kaaba aka bwà kutwilanganakù neetù nè kudìsangisha mwab'ewu mu kaaba kakesè aka katùdi basungùle bu kaaba kàà kudìsangishila Bwèbè. Nènku tudi tulòmba bwà Ùtùbènèshèku mu byònsò bitùdi twenza mu ditùkù dijimà emu. Mu Dìna dyà Yesù mmutùdi tulòmba nùku. Amen.

Nudi mwà kusòmbaayi. (Ndi nè mukàndà wèbè, Mwanèètù...?...)

² Eci cidi ànu bu diikisha dikesè bwànyì mèmè ndambù nàka. Mvwa nè bisangilu lwà paanyimà apa, miyiiki yà bàbidi; Bivwa bikèngela bwà ngìkale nè miyiiki yà bàbidi anyì ní—anyì—anyì kwangata nè kwandamuna nkonko ayi. Pabwìpi nè byònsò bivwà bilwè mu dindà emu bivwa mbikèènà—kumòna, nènku mvwa ànu bu uvwa nè cyà... Mèmè kwambila Billy nè, Mwanèètù Neville yèyè kàyì nè byà dyenza bipitèpìte búngì to, mvwa mwà kubàkulakù mushiki wà nkonko ewu nè kulwa naayi mwab'ewu, byenzè bu kwikishishakù meeji àanyi ndambù. Cidi... byenzè bu bìdi bincyòkeshakù, byenzè bu... Bikèènà—kumòna abi—abi bìdi... Kàdi bantu mbambùlwishiiibwe; ke cintu cyà musinga ncyòci aci. Cintu cyà musinga ncyà nè, bàvwa bambùlwishiiibwe; ke—ke bwalu bwimpè abu's. Nànku awu, díbà adi nènnyambùle ndambù kumpàlà kwà díbà mu mapingaja emu, pa nànku ndi mwà kutwàdijila mu mapingaja emu pa miyiiki yànyì yà pabwàyì, yà bàbidi ayi.

³ Mpindyewu, tudi nè disànka mu dindà emu bwà kumòna balundà bèètù nè... Mpindyewu, eci... Kanwèdikù Billy bwalu ebu pambidi to. Nànku díbà adi... Yèyè ùdi nè cyà kumanyisha bantu nní mvwa mwà kutùngunuka nè kwandamuna nkonko eyi. Mèmè kudyàmbidila nè ncifwànyìnekù kumpà, pàmwàpa dí—díbà dímwè anyì cintu kampàndà bwà kwandamuna nkonko. Yimwè yà ku yànyì... ndi muswè... Ncyèna muswè kushiya; ndi muswè kutòkeshà bwalu nè mu kakànu. Nwamònu anyì? Pashiishe nkonko eyi nè bikwàbò, ndi—ndi ànu muswè kwamba nè, ndi—ndi—ndi mwenzè mujikije cikampàndà eci. Mèmè ndi nè bintu byàbùngi mu... mu meeji àanyi; bitu bimbìndulula's. Kàdi

ncyèna muswè kwikala mubìndùlùke bwà ní ncinyì ní ncinyì to; ndi—nèngààlukilè Kumbèlu mu Butùmbi òm̀wè dyà ku matùkù àdi panshì aa.

⁴ Mulundà wanyì kampàndà wa kale ùw̄wa mungambile kukaadi matùkù ndambù, wamba nè: “Nkaadi mucyòke bikolè be bwà kwikala nè mwoyi mu mushèète wà bilàmbà.”

Mémè nè: “Mwanèètù munanga, ndi muswè nkùkonkèku cintu kampàndà. Ndi muswè nkwambilèku cintu kampàndà. Ndi nè majiyà à kwètù. Ndi nè majiyà à kwètù munda mwà bidimu makùmi àbidì, kàdi ncyèna nè kumbèlu kwà kuya to.” Ncyà bushùwà. Aci’s ncilelèlè. Aci’s ncintu cyà cibì be cyà dyamba. Mvwa mwà kusòmba panshì nè kukùtula mwadi bwà kuya mwaba kampàndà kumbèlu. Ncyèna nè kumbèlu kwà kuya to. Kwònsò kùnyaaya, ncyèna mwà kushàalakù ndambù wa matùkù to; nkàadi mudìlongòlòle bwà kuya m̀ngà mwaba. Ndi ànu. . . Mvwa mùshindù awu; ntu—ntu muediibwe mùshindù awu. Mukàjàànyì ùtu mungiinyike nè “Mpeepèlè yìdi kayiyì diikisha to.” Ndi ànu—ndi ànu apa nè pàapa. Nènku aci’s mbwalu bubì be bwà kudìsangamù, kàdi ndi ngeèla meeji nè bìvw̄wa bikèngela bwà ngùikalè mùshindù awu bwà mudimu wànyì wà bwambi. Kàdi bààb̀ungì bàà kunùdì bàdi bàkàcila. . . Èè, twètù tudi tukàcila d̄yenza dyà cintu kampàndà bwà Nzambi, kàdi kanwikadikù. . .

⁵ Mpindyewu, twètù tudi anu musùmbà wa bantu bàà mu d̀kù mu d̀indà emu. Nwamònu anyì? Kàdi ndi—ndi nè majiyà à kwètù. Ndi muswè kuya kumbèlu, kàdi ncyèna mumanyè kwà kuya to. Wèwè udi wamba nè: “Kàdi mbìshi bwà kuya mu Arizona mwàmwa, d̀kù dyèbè’s d̀idimù?” Ndimù bìmpè munda mwà matùkù àbidì anyì àsàtù, nènku bikèngela nye mwaba mukwàbò. Nènku ndi nya kuntwaku, nè pashiishe ndi ndyùmvwa bìmpè kuntwaku mu matùkù àbidì anyì àsàtù, nènku kunkèngelabi bwà kuya mwaba mukwàbò. Pa nànkù kakwèna ànu kumbèlu kwà kuya to, kàdi mémè pàànyì nè majiyà àà kwètù.

⁶ Èè, Kwètù kùdikù. Nèn—nènyekù aku musangu kampàndà, kàdi bikèngela ngànji kunwambulwisha dyàmbedi’s. Nwamònu anyì? Ke c̀indì mulwile kaaba aka, mbwà kunwambulwisha. Nènku too nè pààlwà diine d̀f̀bà adi, mu mùshindù wà ncìciyiku mwà kunwambulwisha kàbidì to, d̀f̀bà adi ndi—ndi muswè kwalukila Kumbèlu. Ndi muswè kwalukila Kumbèlu cyà bushùwà d̀f̀bà adi. Kàdi’s kùdì Kaaba mu mwaba kampàndà kangùikalà mwà kunanga bikolè be, mu mùshindù wà ncìyi nswa kwalukila to.

⁷ Ntu ngùumuka mu Jeffersonville; nya mu ndambù wa mbingu; ntu nswa kwalukila cyàkàbidì. Ntu nya ku Arizona; ngèèla meeji nè mbilenga be; ndi nswa kwalukila cyàkàbidì. Ndi nya ku mwaba mukwàbò; ndi nswa kwalukila cyàkàbidì. Nènku ndi nya eku, nya kwàka, nè ndi. . . pashiishe ngèèla meeji nè ndi

muswè kulwa mwaba ewu. Ndi ndwa mwaba ewu; ndi mwaba ewu ànu ndambù wa matùkù, nè ndi nnùmòna nwênù bônso; ndi nswa kuya mûngà mwaba. Nwamònu's, ndi nè bânà bàanyi batàngalàka pa buloba bujimà, nènku ndi—ndi . . . aba mbândi mulelèle Kilistò. Nènku ndi . . . Dìbà adi ncyèna nè kwètù kwà kuya nànsha kùmwè to. Ndi muswè kubàsanga bônso dimwè dyà ku matùkù àdi panshì aa, nwamònu's, Taatù neàbàsangè, nè pashiishe netwikalè—netwikalè nè Kumbèlu kutwikalà katùyì tukèngelakù bwà kulalakana kàbìdì to. Nwamònu anyi? Nkaadi mucyòke nè byà dilalakana abi ncìyì mwaba nànsha wùmwe wà kusòmbela.

⁸ Nènku ndi mufwànyine kubela muntu kanà yònsò ewu bwà nè, kwikadikù mulalakanyi to (nwamònu anyi?), ambà ànu ciikàle mudimu kampàndà wà bwambi wà wùkubiikila mùshindù awu, bwalu . . . Ndi—ndi mufwànyine kufila ànu cintu kanà cyònsò eci, mu dindà emu, bu nè mvwakù nè kaaba pa buloba apa kâmwà mufwànyine kuya nè kwamba nè: “Apa ke kwètù kumbèlu!” Ndi mwà—ndi mwà . . . Bu mèmè muwùpetè, nùnku's ndi mufilè mùlyò mujimà wà ndola. Bu nè mvwakù nè mwaba wà mèmè mufwànyine kwamba nè: “Mulùmjàna, ndi ànu munangè ewu bîmpè bitàmbe; ncyèna muswè kuwùshiya kàbìdì to,” ndi mufwànyine—ndi mufwànyine kufila cintu kanà cyònsò. Kàdi ncyèna—ncyèna mwà kuwùpeta to.

⁹ Ndi cintu kampàndà mùvwà Abraham amu; ndi ngènda nkèbangana nè Cimenga kampàndà. Nwamònu anyi? Ncyèna mwà kucìpeta to, kàdi ndi mumanyè nè cidikù. Kàdi ncyà bushùwà nè ncyèna mwà kukùmbanangana nè mwaba kampàndà pa buloba ebu to. Kabyèna ànu bîmwèka bu nè . . . Bantu bîmpè, myaba mîmpè, kàdi uya eku, mutaleela wà tuyaayi tükamònè; uya kwàka, mushipu wàmba kupità; ùbande eku, mashikà nè katùshààdì; ùpweke eku, luuyà lwàmba kushipangana. Nwamònu anyi? Eku wèwè . . . Kakwèna kaaba nànsha kàmwe to; kakwèna ànu Kumbèlu to. Ncyèna muswè kwangata dìbà dyànyì bwà kunùdidila pa dikaaya to, kàdi ndi . . .

Èè, tudi nè kusàkidila kùdì Mukalenge. Amen! Ikàlaayi nè kusàkidila bwà bintu byònsò. Ndi nùnku, bwalu ndi nùnku's. Nzambi ngudi mungenze cìndì eci. Nènku ncyèna mwà kwikala cìngà cintu to ànu cidìYe mungenze aci, dibungama, nè bintu byà mùshindù awu. Bàdi bàngambila nè bìdì bikèngela ànu bwà ngiikalè mùshindù awu bwà mèmè kwikala dikwàcisha didìYe muntùme bwà mèmè kwikala kaaba aka adi. Nènku ndi muswè kwikala muntu wa mùshindù awu. Byòbì nè mùshindù awu ke wùmvwà nè cyà kwikala, ke cìndì muswè kwikala. Cyònsò cidì diswa dyà Bukalenge bwà Nzambi aci, anyi diswa dyà Nzambi, ke cìndì muswè kwikala.

¹⁰ Mpindyewu, túsambilàayi cyàkàbìdì. Mukalenge Yesù, nkonko eyi yidi yisanganyiibwa kumpàlà kwètù eku, Taatù.

Ncyèna mwà kuyàndamuna to, Mukalenge. Ncyèna—ncyèna mukùmbàne bwà nkonko eyi to, kàdi ndi mumanyè nè Wèwè udi mukùmbàne mu byònsò, bwalu yìdi pa mwoyi wà bantu. Kwàta naanyi mudimu, Mukalenge, bwà kwikishisha ciluji cyàbò, kí mmwómò anyi, Taatù? Mu Dìna dyà Yesù Kilistò mmùndi ndomba nùnkù. Amen.

Mpindyewu, netùbangile pa...Ngèèla meeji nè kabèèna bàkwàta eci pa mukàbà wà mèyi to, pa nànkù bidi ànu...Bidi ànu bìmpè, mùndi ncinka.

¹¹ Mpindyewu, cintu cìmwèpelè cidi...Cidi cyènta nè nditàcìshè bwà nkonko, misangu yònsò kùdi cintu kampàndà cilenga...cintu cyà citàpa, èyowà's, citù misangu yònsò cìntàcìsha: ncyà kwandamuna lukonko pa dibàkà nè difwà dyà dibàkà. Kaa ekèlekèle, mabìikila à ku tèlèfonè kaayi, mikàndà mifùnda, kàdi mwanèètù kampàndà kudijìngilayè mu mbulankète nè kusòmbayè mu lutanda lwànyì kuumukila pa dîbà dikùmi nè ibidì too nè pàakacyàbu mu dindà. Bambi bàbìikidila eku nè eku, bàsèle misangu yìbidì anyi yisàtù nè byònsò. Midimu yà bwambi...Ndi muswè kunùlombakù cintu cìmwèpelè. Ndi naayi yàbùngì yìcidi ànu kaaba aka, ndi mumanyè. Ncyèna muyikenkète to, kàdi's kùdi yàbùngì yà ku yôyi mwab'ewu.

¹² Nwǎvùlukaayi ànu eci's! Bwà nwènú bàdi basèlàngàne, nè bashipe mabàkà, nè baselulangàne, nundayàayi cintu cìmwèpelè. Nwamònu anyi? Nudi bangeeyèmène. (Ndi—ndi ngèèla meeji nè eci kí ncikwàta pa mikàbà yà mèyi to. Ncyèna...) Nudi—nudi—nudi nè...Nudi nungitabuuja mèmè bu mupròfetà wenù mutùma kùdi Nzambì, musadidi wenù, dîbà adi angàtaayi dîyi dyànyì bwà bwalu ebu, kí mmwómò anyi? Túngunukaayi nè kusòmba ànu munùdi amu. Kanùteeci cintu cikwàbò nànsha cìmwè cyà bwena aci to, kàdi sòmbaayi, ndàayi batàngile kumpàlà, ikàlaayi ànu nè nsòmbelu wa disànka. Nudi nè...Nudi basùngìdìibwe. Panwìkalà beena Kilistò, túngunukaayi nè kwikala nè mwoyi bwà Kilistò; Yèyè úvwa nè kabìngìlà kàà kunùsùngìla.—

¹³ Mpindyewu, pàngààlukilà, bu Mukalenge mwà kwanyisha, nènnumvwìjìlè aci mu Bible. Nwamònu anyi? Kàdi kanùbìnduluki to. Bantu bààbùngì mbandondèle, bàmba nè: “Èè, mèmè ntu munange mukàjàanyi, kàdi ndi... Nebikèngele bwà mèmè kumushiya; ncyèna—ncyèna muswè kupangila Dyambwibwa to.” Kanwènji nànkù to! Shààlaayi ànu munùdi amu too nè panwànguumvwà kàbidì (nwamònu anyi?) pa cyena-bwalu eci. Pashiishe pàndì...Ncyèna mwà kucyùmvwija mu tusunsa dikùmi anyi dikùmi nè tùtaanu nànsha; nebyàngate cikondo kampàndà bwà kucyùmvwija, bwalu bìdi bikèngela cìikale Mifùndu's. Cidi nè cyà kwikala EMU MMÙDÌ MUKALENGE WÀMBA. Kabiyi nànkù to, kí mbìmpè to.

14 Ndi mumanyè nkonko yàkambà Yesù kaaba aka eyi nè: “Muntu yèyè mwipàte mukàjèndè nè musèle mukwàbò kabùyì bwà bwalu bwà masandi à mu bujikè to ùdi wènda masandi, ewu yònsò udi usela ewu udi mwipàcìibwe ku dibàkà awu, ùdi mu nsòmbelu wa masandi”: Bintu ebi, Yèyè ùvwa nè kabingilà bwà kwamba nàнку. Ùvwa Nzambi; aci’s n’Diyì Dyèndè.

15 Mpindyewu, twàlukilàayi ku cibangidilu bwà tùjandulè cidi byònsò byùmvwija, nudi numòna’s, dîbà adi tushiishè kubìtwàla. Kàdi too nè patwènzà nàнку, tùngunukaayi ànu nè kwenda kuya munùdi mpindyewu amu, ànu munùtù misangu yònsò nwenza amu, panwikalà beena Kilstò. Nwèwù biikàle babàka beena Kilstò, nè biikàle basèlàngàne, nè biikàle nè bânà, nè bintu byà mùshindù awu, tuumalanda tukesè tùdì tunùswikàkàje atu, kushiyanganyikù nè mukàjèèbè anyì bàyeebè mpindyewu to. Kanwènji nàнку to. Nwamònu anyì? Indilaayi too nè panwàngumvwà kàbìdì pa bwalu abu. Nudi nundaya nàнку anyì? Elàayi cyanza cyènu muulu! Mpindyewu, nudi bangeeyèmène bwà kungiitabuuja. Mpindyewu, nudi—nudi bangiitabùùje too nè apa; mpindyewu, ngiitabùùjaayi ànu ndambù mukesè kàbìdì pa bwalu ebu.

Mpindyewu—mpindyewu, tùmonebi, ndi nè yà mîmpè menemene kaaba aka mu dindà emu, yimwè. . .

325. Bònsò bàdì bènza Mukàji-musèla bàdì nè cyà kusòmbela mu ntàntà wà kilòmèètà binunu bibidì nè nkàmà yinaayi pabwìpì nè tabernacle ewu (Ngèèla meeji nè mvwa kàbìdì naalu mu dyàlumingu dishààle. Nebikèngele bwà nyibàkùle nè nkwate nàayi mudimu nè mwànyì pàanyì mwònsò.) —kilòmèètà binunu bibidì nè nkàmà yinaayi nè ku tabernacle ewu, bu mùdìbì byùmvwika pa mukàbà wà nombà ibidì wà “Cisòmbelu Cìlwalwa cyà Mukàji-musèla anyì”? Mvwa misangu yònsò ànu ndyàmbridila nè Mukàji-musèla mmufwànyine kupàtukila mu bitùpà byònsò byà buloba mu cikondo cyà Dyambwibwa. Ndi mupùile anyì?

16 To, wèwè mulundà wanyì munanga, kwèna mupùile to, udi mubingè. Mpindyewu, mèmè mwambe cintu kampàndà mu mukàbà wà mèyi cidi cifwànyine kunulombola bwà kwitabuuja. . .

Mpindyewu, ncyèna nè. . . Byònsò ebi mbipyabìpyà bwànyì mèmè mpindyewu, kacya ncitukù mwànji kutàngila mu—mu byòbì ebi to. Nudi numòna anyì? Ebi mmushiki mupyamùpyà wùmvwà mupetè dyàlumingu dikwàbò adi, nè kuyàluja mu kàbòmbi aka, ne kuyàdija muntwamu.

17 Mpindyewu, mu eci. . . To, kabyèna bìkèngela bwà Mukàji-musèla kwikalayè mu mwaba kampàndà musungùlùke to. Bààbùngì bàà kùdìbo nebìikalè mu lupwishi lwà buloba. Nebìikalè pa buloba bujimà; nebìikalè búma nè mashika mu—mu nèje lwà mu nord, nè—nè lupwishi lwà bisuku nè meetu à

luuya lukolè, nè—nè pa buloba bujimà. Kàdi pààdilà Mpungi wa Nzambi, bafwè mu Kilistò nebàbiikè, nebàbiiishiibwè, nè nebàpatukè mu lupwishi lwà buloba, nànsha biikàlè penyì. Nènku mpindyewu, mu cyôci eci, dibiiikà dyà ku lufù nediiikalè dyà buloba bujimà. Nwamònu anyi? Mu myaba yónsò cifùkiiibwà cyónsò pa kabulungù buloba cidi mu Kilistò necipàtukè Nendè pààlwàYe (nwamònu anyi?), nànsha wèwè penyì.

¹⁸ Anji elàayibi ànu meeji ku cipalu cyà manàyi aci mu matùku à bafwile diitabuuja bàà ku cibangidilu abu nè, pàvwà beena Kilistò abu bèediibwa mu bwina bwà ntambwe apu, nè nyama yà ntambwe ayi yàkashebeya beena Kilistò nè kudyà mibidi yàbò kumana. Nwamònu anyi? Nànsha mùvwàbo bamwangàlàjiiibwe, mibidi yàbò mitangalaja pa buloba pónsò mu bunyawù bwà nyama yà ntambwe. Nànsha ciikàlè penyì, kwèna mwà... Nwamònu's, udi mwenjiibwe nè cintu kampàndà cidi kaciyi cimwènèka civwijiibwe cyà bàlenga nè byanza ebi to, nènku Nzambi neà—neàlujè cintu aci—aci. Nwamònu anyi?

¹⁹ Mpindyewu, bu mùdi wangata kabùlù kampàndà kàà—kàà mashi. Ukànsùsulwila ku kabùlù kampàndà, nènku cidi cibwela dîbà adi ku ka—kabùlù kàà mashi mu kabùlù kàà mashi kampàndà, nè mu kapwishipwishi, nè kasùnsukilà kàà kapwishipwishi, nè cyènda citùngunuka ànu nànkù; nè ndekeelu wa byónsò kàkajikila mu cidi kaciyi cimwèka aci. Cidi cyùmukila ku cyà mu bufùki, cintu kampàndà cyùdi mwà kutwà byanza, citàngile ku ma-gazè; byùmukila ku ma-gazè bikabwela mu ma-àcidè—ma-àcidè bikabwela mu ma-gazè, nè ma-gazè, bitùngunuka nè kwalukila mùshindù awu, too nè pàdibi byónsò bikatùkina mu cintu cikesè ndekeelu wa byónsò, nè aci's ke nyumà. Nènku nyumà ewu uvwa musòmbe mu ma-gazè aa... Mbifwànyine kubènga kwikala ma-gazè à dyàcimwè, kàdi ngiikàdilù mileeji yà cyùdi neyiiikale ànu menemene cidiyi aci cyàkàbidi. Nwamònu anyi? Nyumà ngudi ukòntonona cyôci aci.

²⁰ Nènku mpindyewu, mu ngaakwilù mukwàbò, paùdi ulwa nsongàalùmè anyi nsongàakàji apu, bìdi bu nè, Nzambi ùdi ùkukwàta fòtò...Mpindyewu, nànsha wèwè mukùlákàje bishi nè mwele minyèngù, nànsha kwisù kukunyàngùke munyi, cyónsò ciikalàku aci, aci necikuupukè too nè ku ndekeelu. Nènku mubidi awu wùdi mwà kwikala mubùtudiibwe, muyangùke cimfwànyì, mwoshike, mudyà kùdi ntambwe, nànsha ciikàlè cinyi, kàdi wàkènjiibwa nè ma-gazè, bintu dikùmi nè bisambòmbò byà buloba. Cìvwa nkàlisiyumù, nè binshidimba, nè mpiitùloolù, nè bukènkè bwà mu cibwàshìbwàshì, nè bikwàbò, byónsò abi bisambakaja bwà kwenza mubidi's. Mpindyewu, nànsha byòbì nè, aci's cidi... Buloba bujimà mbùle tètè naaci's.

²¹ Kàdi mpindyewu, cimfwànyì eci ke cintu cyà musinga munène. Pashiishe mu dibiiikà dyà ku lufù, ma-gazè awu,

nè ma-àcidè, nè bintu abi bidi byàlukila buludi mu mwaba awu nè bifwimba cyàkàbidi cimfwànyì eci. Mpindyewu, fòtò ewu kàvwa mukwaciibwe paùvwa nè bidimu dikùmi nè bisambòmbò, anyi dikùmi nè mwandamukùlù, anyi makùmi àbidi pawùvwa mutàmbe bulenga apu to. Wàkakwaciibwa dîbà kaayi's? Kumpàlà kwà diikalakù dyà bishimikidi byà dyulu ne buloba, wàkatèèkiibwa mu cilaminyi cinène cyà Nzambi aci. Nè pashiishe, cintu cimwèpelè cyàkenzàci civwa nkudileeja kaaba aka bwà wèwè kwenza disungula dyèbè. Nwamònu anyi? Dîbà adi udi ulwa musadidi wa Nzambi. Yèyè mudyànjlila kucimanya, cidi cìMuvwija Mupikudi, bu mutùdi bacìlongè.

²² Pashiishe aci cimfwànyì kakùyì mpatà to cidi...Eci's ke ciibùlòjì. Citùpà cyà ciibùlòjì cyà mwoyi ke mwaba ùdi musòmbèlemù mpindyewu ewu. Nènku cintu kanà cyònsò, kwòkò kwikale ciibùlòjì, kùdi nè cyà kwikala cintu cilelèlè kumpàlà kwà kwikalakù ciibùlòjì. Ki bwà cinyi, eci cyòci ciikàlè ciibùlòjì, kùdi nè cyà kwikala cintu cilelèlè mwaba kampàndà. Nènku eci kî ncintu cilelèlè to; eci cidi ànu mundìdìmbi kampàndà wà cintu cilelèlè cicilwalwà. Mpindyewu nwacyùmùvù anyi?

²³ Pa nàнку, cidìbo bafwànyine kwenza neebè nànsha ciikàlè cinyi; kabèèna mwà kunyanga cimfwànyì aci to, fòtò awu mu cibùcilu cinène cyà Nzambi kuulu aku. Kacyèna mwà kucibùtula to, cidi mu Dyulu. Udi mufwànyine kucyòsha, kucidiisha kùdi ntambwe, kucyenza mu mùshindù wònsò wùdi muswè awu; necipàtukè kàbidi ànu bulelèlè ànu mùdìbi nè yìbidi nè yìbidi yidi yènza yinaayi amu. Ànu mùdìbi bulelèlè nè Nzambi mmucyàkùle, necipàtuke. Pa nàнку, nànsha wèwè usanganyiibwa penyì. . .

²⁴ Mpindyewu, bu mèmè...Ndi ngèèla meeji nè bu nwènù mwà kwela mukàbà wà mèyi. . .(Ncyèna mumanye nè mwine wàkalùfùnda awu nganyi to; kakwèna dîna difùnda to, ànu katùpà kakesè kàà dibèji kiikàlè nè màyi à mufùndu à bulè, mafùndila mu kàlipè kakesè. Bìmwèka ànu bu nè nkapandila mu kàlipè ka—ka—kakesè kakesè.) Kàdi vùlukàayi nè, pa cyòci eci, mu—mu lukonko elu mpindyewu, mu mukàbà wà mèyi, bu nwènù mwà kumòna, mvwa mwambè nùнку, cintu kampàndà pa cyòci eci (ncifwànyine kwikala kaciyi mwàkù ku mwàkù mpindyewu to, nwènù bakenkète mukàbà wà mèyi ewu nè mukwàbò awu): Mèmè nè: “Cileejilu, tudi kaaba aka mu dindà emu. Cimenga citùdi tujinga kumòna eci neciikalè mu ntàntà wa kilòmèètà binunu bibidi nè nkàmà yinaayi pa kilòmèètà mu nseka yònsò.” Mèmè nè: “Aci's ncifwànyine kutwà kuumukila ku Maine kutwà ku Floride, nè kuumukila ku Mwelelu wà mbù wà ku Esètè too nè ku kilòmèètà cinunu nkàmà yìbidi nè makùmi mwandamukùlù too nè wesètè wa Musùlù wà Mississippi, kilòmèètà binunu bibidi nè nkàmà yinaayi pa kilòmèètà binunu bibidi nè nkàmà yinaayi.” Mèmè nè: “Anji elàayibi meeji pa

bwalu abu, ànu mwab'ewu mene mu dindà emu, s'kùdi bantu basòmbe kaaba aka bàdi—bàdi bulelèlè bàfùmina mu ntàntà wà bwena awu's, bùùmukila mu kilòmèètà binunu bìbìdì nè nkàmà yinaayi eku nè eku, basòmbe mwab'ewu." Mpindyewu, ncyèna mumanye mwaba wikala Ntempèlù awu mwà kusòmbela pa buloba nànsha, kàdi ndi nè cingenyingenyi cyà nè Ntempèlù neàteekiibwè ànu lwà mwaba wùdi Pàlèstìnà ùsanganyibwa mpindyewu ewu. Pàmwápa aci neciikale lusongo lwà mukùna ànu mwaba awu mene. Ncyàlabalè eku nè eku. Mu bushùwà bwà bwalu, kakwàkwikala kàbìdì mbù mwine musangu awu to. Nwamònu's, buloba ebu's bùdi nè kilòmèètà binunu makùmi ànaayi mu nyungulukilu wabù mujimà, kàdi kilòmèètà binunu bìbìdì nè nkàmà yinaayi kí nciùpà cyàbù cinènè menemene to. Kàdi Cimenga cinène eci neciìshikaminè pa kilòmèètà binunu bìbìdì nè nkàmà yinaayi ayi eku nè eku kwà mukùna awu.

²⁵ Mpindyewu, cìdì cyènza nè ngiikalè ngiitabuuja aci mbwà bipròfeta nè bikwàbò bìdì bitàngila Mukùna wà Siònà mu Yèlusalèmà nè mu bimenga abi. Nènku mwaba awu ke wùvwà Abraham mupròfeta awu wènda ùkèba Cimenga aci, nè civwa nè Mwibaki nè Mwenji mwikàle Nzambì. Yèyè wàkakèba Cimenga aci mu buloba abu. Mémè ndi ngèèla meeji nè neciikalè mwaba wùdi buloba abu awu.

²⁶ Buloba abu, mbikolè bwà wèwè kubùjandula pa kartà kàà buloba. Cìdì ànu katòba kakesè kàà menemene's. Kàdi tàngilàayi buloba bùdi Russie, nè Ètats-Unis, Àmèrikè wa ku Sud, nè myaba yònsò ayi kuntwaku. . . Bwà cinyi bùvwà Nzambì nè lukunukunu luvùle bwà mwaba awu (nwamònu anyi?), bwà mwaba wùmwèpelè awu? S'ke lukonko ndwòlò alu. Ncyèna mwà kuciijaadika to, kàdi cìdì ànu cimwènaka mùshindù awu bwànyì mémè. Kàdi kwònsò kùdìci aku, tudi mu njila batàngilakù, pa nàнку Mukalenge àtumbè bwà bwalu abu.

²⁷ Mpindyewu, wèwè nè didifwànyikijila dyà nè ndi—dyà nè ndi mwambe nè ncifwànyine kwikala mu . . . mu ntàntà wa kilòmèètà mitwe ku binunu bìbìdì nè nkàmà yinaayi yà ku tabernacle, aci's civwa didifwikakajila dibì (nudi numona anyi?), bwalu kacýàkwikala nàнку to. Tabernacle ewu ùdi nè. . . Ewu's wùdi ànu mwaba mukese cyanààna wikala mwà kubùtudiibwa's. Nè—nè buloba nebwikale mwà kwoshiibwa kubùtuka, nè eci necijimine cyònsò. Nè Indiana ewu, nè Ètats-Unis, nè bintu byònsò nebyènguluke nè nebìvingutudiibwe ànu cyanààna kakùyi kùshààla cintu nànsha cimwè to ànu musàbùsàbù cyanààna. Nwamònu anyi? Mpèkaatù yònsò, disaamà dyònsò, twìshi twònsò, bintu bikwàbò byònsò nebiùtudiibwè. "Nènku mémè kumòna Maulu Mpyamàpyà nè Buloba Bupyabùpyà, bwalu bwà ntwàdijilu . . ."

²⁸ Elààyibi meeji's! Nzambì wàkenza bidimu binunu bisambòmbò mu diibaka dyà ebu buloba, ùbùtèeka pàmwè, ùbùfwimba. Mmunyi mwàkabwènzàYe's? Bible mmwambè

nè: “Yèyè wàkabwènzela ku bintu bìdì kabiyì bimwènèka to”; mbwena kwamba nè, Yèyè wàkafùka buloba. Mpindyewu mònaayi’s; eci ncilenga cyà dikèma. Mufùki mwine wàkafùka buloba mu kiipàcilà kampàndà awu (Sàtaanà wàkabùkooyisha), Wàkapweka panshì bwà kupikula civwà cishààle pànu apa. Nè Wàkaya mwaba mukwàbò nè ùcìdì mu mudimu Wèndè munkaci mwà kufùka.

²⁹ Mpindyewu, byàkaMukèngela bidimu binunu bisambòmbò bwà kwenza bu—buloba, nè Yèyè neàngatè matùkù àbìdì bwà kufùka Cimenga cìdì cìpwekà pa buloba aci. Yèyè udi. . . “Mu Nzùbu wa Taatù Wanyì mùdì nzùbu myalàbàle yàbùngi: bu kabiyì nànu to, nùnkù’s ndi munwàmbile. Nènye kanùlongolwela kaaba (kwibaka Cimenga cyà ngòlò wa bu lumwènu, misèsù yà ngòlò).” Mwaba mulenga kaayipu’s wè!

Yèyè neàwùpetèlè penyi? Kùdikù byà dyaenza naabi mu malaba makwàbò amu, anyi mu ngondo, nè mu mìtootò, nè bikwàbò anyi? Kabyèna bikèngela bwà kwikalaYè naabi to, Yèyè’s m’Mufùki. Yèyè mmuyè bwà kwibaka Cimenga. Amen! Abi’s mbìmpè be bwànyì mèmè, kabyèna nànu bwènu nwènu anyi? Abi mbìmpè. Bwalu pùikalàYè mmwibàke ebu nùnkù, nè mèmè nsànka naabù, nebiikale cinyì pàdiYe wibaka bwà bupyabùpyà ebu’s? Kaa ekèlekèle, cintu cilenga kaayipu’s wè! Nè pa nànu ndi nè disànkà dyà mutùdì mu njila batàngila ku Cimenga aci. Èyo.

326. Mwanèètù Branham, ndi munange Mukalenge, kàdì bwà cidimu cishààle eci mvwa—mvwa mupetàkàne nè bwalu kampàndà. Mbimwèke misangu mikwàbò ànu bu nè ncivwa ànu mene mu mèmè to. Ncinyì ciine aci? Bu wèwè mwà kuswa nsambidilèku mèmè nè bàyaanyi.

³⁰ Èè, kwòkò kakùyì. . . Bu muntu ewu mwikale mu muyiiki wà bàbìdì, munùvwàmu nwènu aba mu dindà emu, nùnkù’s bwalu abu mbupàtùkile patòoke, nànsha cyòci cinyì. Nwamònu anyi? Mukalenge’s ùvwa mwà kubuulula cìdì bwalu’s. Kàdì mpindyewu, wùndì ncìyì mumanyè nè wèwè udi nganyì to, nè kwèna musòmbe kaaba aka to; mbambè ànu nè: “Mwanèètù wa bakàji kampàndà mu Kilistò.”

³¹ Mpindyewu, mpindyewu, byòbi nè. . . kwòkò cintu kampàndà cyùdì mwenze cyà cibì, cìdì cikutàcishe, dìbà adi cikenkète nè Bible bwà ùmonè cyùdì nè cyà kwenza. Kàdì wèwè kùyì mwenze cintu nànsha cimwè to nè kùyì mupìshìbwe kùdì cintu kampàndà to, pàmwàpa mmijilu yà mutù wèbè. Nwamònu anyi? Bìvwa mwà kwikala nè bintu byàbùngi mbyenzèke: pàmwàpa lutàtù kampàndà mu nsòmbe webè amu. Pàmwàpa mu—mukaji ewu mmufwànyìne kwikala mu cikondo cyà diimana dyà dimònà dyà cijila. Ke pàdì bintu byònsò bibì bwèndè’s, kàdì kwèna lutàtù kùdiye to, nànsha nànu byònsò mbibi bwèndè’s. Nènkù yèyè kèna wènza to, ùdì

³⁶ Nànkù mpindyewu, ndi ngèèla meeji nè muntu ewu ùdi ànu. . . Nèngiikalè mwà kwela meeji nè cidi ànu dibìnduluka. Kwòkò kakuyi cintu nànsha cìmwè cìkupiisha to, tũngunukà wèwè ànu nè kwenda kuya wamba nè: “Nguumùkila apa, Sàtaanà!” Tungunukà wèwè ànu nè kuya. Ditwe mu cyalu kàdi ikàlà nè mwoyi bwà Nzambì.

327. Mpindyewu. **Kùdikù mùshindu nànsha wùmwè wùdibi byanyishila muntu bwà kuselula paanyimà pàà difwà dyà dibàkà, bilondèshile** (Mpindyewu, nèmmonèbi eci ní cidi. . . Ngèèla meeji nè kùdi nkonko yìbìdi anyi yisàtù pa cyôci eci.)—**bilondèshile Mifùndu anyi? Mémè nciyi—mémè nciyi mushàale musèlàngàne dyàmbe- . . . ku bikondo byàkashàala, cidi. . . kudikù tubingilà bwà dishipa dyà dibàkà tùdi tũkwanyishila mene bwà kusèlulula anyi? Nèngiikalè—nèngiikalè** (n-s-u- . . .) **kùdi. . . nensùmbe mukàbà wà méyi (Eywà’s!) bwà kupeta dyandamuna dyà cyôci eci. Twasàkidilaayi wabũngi. Nèncìndìle mu dyàlumingu.**

³⁷ Èè mpindyewu, ngàmbi cyôci eci, nudi numòna’s. Kanwikadi—kanwikadi. . . Ndi—ndi. . . Ngànji ncilekèlè ànu cyanààna (nudi numòna anyi?) too nè patwàfikà pa kaaba kàà nè mpindyewu. . . kutwikalà. . . byònsò ebi nebilongolodiibwè. Nènku mpindyewu, nwènu vùlukàayi ànu nè, aci’s mpàaswà Nzambì, pàndi ànu nè ngàlùkidi cyàkàbìdi. Musangu wàlonà wũngàälwà, bu Mukalenge mwà kwanyisha, nényiishè pa cyena-bwalu aci. Nwamònu anyi? Nènku mpindyewu. . . Nè pashìshe, netùcìkwàtè pa mukàbà wà méyi nànsha bìshi. Nènku cyôci—cyôci citàpe ku mwoyi, ncitapè ku mwoyi’s; cyôci citòòkèshe maalu, ncitòòkèshè’s. Kàdi nwènu ikàlaayi nè bukitù. Nwamònu anyi?

328. **Mwanèèt Branham munanga, bìdikù mwà kwenzeka bwà muntu kampàndà kwikala nè Nyumà Mwìmpè kàdi kàyì nè bimanyinu bimufila, na—nanganangà kabiyikù mu mùshindù wà. . . mu cikondo kampàndà cìcìlwalwà nè mu maalu àdi malongolola kùdi Nyumà anyi?**

³⁸ Mpindyewu, aci’s ncifwànyine kuumvwika bu lukonko lwà lusambàkane’s, kàdi pàlu’s ndwìmpè be, lwìmpè bikolè. Nwamònu anyi? Mpindyewu, apa cidi cìmpèeshakù mpungà mukesè, bwà mémè kujandula cidi munkaci mwà kwenzeka nè dìkù dyànyì—dyànyì kaaba aka mpindyewu (nwamònu anyi?), ndi nswa kwamba nè nwènu, dìkù dyànyì edi, nè dìkù didi pambèlu mu buloba bujimà mutùdi. . . mùdi mikàbà yètù yà méyi yikafika.

³⁹ Mpindyewu, citùpà cinène cyà disangisha dyànyì ncyenza kùdi beena Mpenta, nènku bwalu Mpenta ke mukenji wà ndekeelu menemene wutùdi naawù mu milongo yà cyena-màngumba. Nènku bwànyì mémè, ncyà bushùwà nè ndi

mpetangana naabò kutàmba èkèleeziyà mukwàbò kanà yònsò wa cyena-màngumba ewu. Ndi ntàmba kwikala pabwipi nè beena Mpenta, bwalu wùdi . . . ki mukenji wà matùkù mashààle aa. Nè bàanyi bantu bònsò bàdi bakùdimùne mucima bándi ndwa naabò kùdi Kilistò abu, ntu nteeta bwà kubàludika ku èkèleeziyà kampàndà wa beena Mpenta. Kàdi nkaadi mubàpiishe mu mùshindù wònsò wùmvwàku pàanyi mumanyè awu, bwà nè bàvwa bapiile mu Mifundu ku diikala dyà dingumba nà kabàyi baswè kwendela mu Bukènkè pàdi Bukènkè buleejiibwe kùdibo to. Kàdi nànsha nànkù, byôbi bikèngela bwà mèmè kwenza dyanyi disungula leelù ewu bwà kwangata èkèleeziyà kampàndà pa buloba, ndi mwà kwangata wa Mpenta bwà pa bìdi bitangila dingumba. Kàdi pàdibi bitangila bantu nkàaya, bu balume nè bakàji, kùdi beena Kilistò bashùwashùwàle mu mòngumba ónsò awu: Ba-Méthodistes, ba-Baptistes, ba-Presbytériens, ba-Luthériens, nè bikwàbò. Kàdi ndi ngàakula bwà ndongolwelu yidi bantu aba bàsanganyiiwbamù, kí mmuntu-nkàaya nànsha umwe to, kàdi ndongolwelu udi bantu aba bakwàciibwe kùdiye mu dingumba dyàbò awu. Bàdi bùmvwà ànu bitòòke tòò mpindyewu (nwamònu anyi?), nè ndi—ndi ngèèla meeji nè bantu. . . Bòbò biikàle beena Kàtòlikè kàa cyena Loomò, Bantèmu bàà Yèhováh, beena Yudà ba-Orthodoxes, cyònsò cidibo aci, aci kaciyena nè bwalu kùndi to; kàdi bòbò abu mbantu bàdi Kilistò mufwile bwà kusungila.

⁴⁰ Nènku mpindyewu, mèmè. . . Nènku kupetangana nè ndongolwelu yàbò yidibo momù ayi. . . Ngèèla meeji nè kùdi ànu beena Kilistò bàabúngi mu ba-Baptistes mwámwa, bu mùdibo mu ba-Méthodistes, anyi ba-Presbytériens, anyi bakwàbò abu. Mbeena Kilistò, beena kwitabuujja balelèlà. Nè ànu mu èkèleeziyà wa Kàtòlikè wa cyena Loomò amu mùdi bantu bashùwashùwàle muntwamu bàdi bantu balume nè bakàji balelèlà bàdi banange Mukalenge. Nènku kabèèna bàkashàala bàà mu èkèleeziyà awu bwà kwikala bapiile to, bàdi bàkashàalamù bwà kwikala babingè. Kàdi cilumbu ncyà ndongolwelu udimù awu udi uludika meeji ààbò mu mùshindù mubi. Nènku byôbi mwà kufika mu cikondo kampàndà cyà mèmè mufwànyine kwenza dingumba, ndi munùseeswishe nè mukanùbweje mu ndongolwelu kampàndà; kabimfikidiku to. Nè Nzambì àndamèku mu meeji àanyi majaaname bwà kunùludika kùdi Yesù Kilistò, Dìyi adi. Shàalaayi nè Cyòci aci. Nwamònu anyi?

⁴¹ Kàdi mpindyewu, muntu ewu ewu ngudi wela lukonko elu pa mùdibi mwà kwenzeka bwà kwikala nè dibatiiza dyà Nyumà Mwimpè kakùyì bimanyinu bìbàlonda to. Mpindyewu, ncifwànyine. . . Pawikala mulediibwe cyàkàbìdi, udi. . . Pawikala mulediibwe dyàmbedi bu muntu wetù ewu nè muntu mulema njimbà ewu. . . Mpindyewu, ndi ngàdamuna eci

mu—mu—mu mùshindù mulelèlà wà bwànà wà dicyenza. Kàdi wèwè mulediibwe muntu wetù mwena diìnà ewu, mu bushùwà bwà bwalu nenwènzè bintu bìdi muntu wetù mwena diìnà ewu mufwànyine kwenza. Ncyà bushùwà anyi?

⁴² Pùdi mulediibwe bu muntu, bimanyishilu byà mu bufùki byà muntu nebikufilè. Kwakusòmbela mu mucì kampàndà, nè kuteeta kubùuka nè mapwàpwà èbè bu nyuunyi, anyi—anyi—anyi cintu kampàndà cyà mùshindù awu to. Aci kí—aci kí ncifwànyine kwikala muntu wetù mwena diìnà ewu to, byenzedi bilelèlà byà muntu. Cyenzedi cilelèlà cyà muntu cifwànyine kwikala kwenza kwà mudimu, kwikala nè . . . kusèla, kwikala nè dîkù, nè kwenza bintu ebi. Awu's ke muntu wetù mwena diìnà wa mu bufùki nè mulelèlà, bwalu udi mulediibwe nànkù. Pashiishe paùdi ulediibwa mwena Kilstò, mulediibwe kùdi Nyumà wa Nzambì, udi wangata bulelèlà byambiibwà byà Kilstò. Nudi numòna anyi?

⁴³ Mpindyewu, bu twètù mwà kwangata kaaba aka mu dindà emu mu disangisha edi munùdi nwènù basòmbèle kaaba aka emu nè kutèeleja dilongesha ku ditùkù nè ku ditùkù nè bikwàbò, nenùjandulè nè nudi bafwànyine kwikala bashiilàngàne muntu nè mukwèndè, bwalu nwènù nudi—nudi bashiilàngàne. Nudi—nudi benjiibwe bashiilàngàne; nzala yènù—yènù mmishiilàngàne; nudi—nudi nudyà bishiilàngàne; kàdi's nwènù bònsò nudi nudyà byàkudyà. Kàdi mpindyewu, ànu kuumukila ku . . . Nè muntu-nkààyà umwèpelè ànu mufwànàngàne nè mukwàbò awu, nudi bashiilàngàne muntu nè mukwèndè. Beena Kilstò bàdi bènza cintu cimwècimwè aci. Kanwèna mwà kwamba nè: “Mpindyewu bònsò . . .” Bònsò bàdi bààkula mu myakulu anyi, bònsò bàdi bàmba bipròfètà anyi, bònsò bàdi bènza . . . ? Nwamònu anyi?

⁴⁴ Bikèngela nùtabaleelè maalu aa, bwalu mwena Kilstò ùdi wàngata biibidilu byà—byà mwena Kilstò; nè ùdi nè nsòmbelu bu mwena Kilstò. Yesù wàkamba nè: “Bimanyinu ebi nebifilè aba bàdi biitabuujà.” Mònaayi nè: “Mu Dìna Dyànyì bóbò nebiiipate badémòns; nebàkwate nyòka nè byanza anyi . . . bànwe bintu byà lufù; nè nebaàakule mu myakulu mipyamìpyà.” Nè—nè bintu abi bìdi ànu bifila beena Kilstò.

⁴⁵ Mpindyewu, muntu ewu ùdi nè cintu cìmpè menemene kaaba aka: “. . . anyi tudi twindila too nè ku cikondo cìcilwalwà anyi mwikalè maalu malongolola kùdi Nyumà Mwìmpè amu anyi?” Mémè ndi munangè aci. Nwamònu anyi? Mpindyewu nudi bumvwè mmwènenu awu anyi? Pàdìci cilongolola kùdi Nyumà Mwìmpè! Nzambi ngudi ulongolola bintu.

Nè mwaba awu, ndi ngèèla meeji nè bu beena Mpenta mwà kuteeta (bàdi bàtèeleja mukàbà wà mèyi ewu abu), nenùnguumvwe bu nwènù mwà kuumvwa mwab'ewu nè mbwà cinyi ndi nshiilangana neenù panùdi nuzànjika mmwènenu

awu wa nè bônso bàdi nè cyà kwakula mu myakulu. Ncyèna—ncyèna mwà kumòna aci mu cyòci to, bwalu ncifwànyine kwikala. . . Mémè ntu munangè mampà meela cérise, kàdi kabyèna nè dikwàcisha to, nè mémè's ndi muntu, kàdi kabyèna nè dikwàcisha to bwà mémè kuteeta kuwambila nè: “Wèwè kùyi udyà dyampà dyela cérise to, kwèna muntu nànsha.” Nwamònu anyi? Kàdi kudyà kwà dyampà dyela cérise kùdi ànu cìmwè cyà ku biibidilu byà muntu. Nwamònu anyi? Udi mufwànyine kubènga kutwà ku cyànyi pa bwalu abu, kàdi—kàdi's ncilelèlè. Mpindyewu, ewu neàdye cikampàndà, nè ewu neàdye cintu kampàndà cikwàbò.

⁴⁶ Mpindyewu, Nyumà Mwímpè ùdi ùlongolola midimu eyi, kàdi paùdi uteeta bwà kudyenzejamù ku bukole. . . Bu mémè mwà kwamba nè bikèngela ùdye ànu dyampà dyela cérise, kàdi ambabi tũng piikalà dyampà dyela cérise dikulùkisha? Kàdi nànsha nànkù, udi mufwànyine kulùka nè uteeta kudyà dyampà dyela cérise kàdi ulùka, nè. . . ? . . . Nwamònu anyi? Udi—udi—udi udisaamisha wèwè mwine, nènku's ke mùshindù awu wùdi uteeta kwenza paùdi uteeta bwà kudyenzeja ku bukole bwà kwenza cintu kampàndà cìdi cibèngangana nè Nyumà. Yéyè mmukòsèle nsòmbelu webè cintu kampàndà. Nudi bumvwe aci anyi? Nwamònu anyi?

⁴⁷ Nènku wèwè, paùdi mùle tètè nè Nyumà, ke cìmwè cyà ku bimanyinu byà bitàmbe bwímpè bìndi mumanyè ncyòci eci: udi mu dinanga dyà menemene nè Kilistò nè witabuujja Diyì dyònsò didiYe wàmba nè m'Bulelèlè. Nwamònu anyi? Ke cileeji cyà nè udi nè Nyumà Mwímpè ncyòci aci. Nè nsòmbelu webè mmùle tètè nè disànka, nè—nè kaa ekèlekèle, bintu byònsò mbishìilàngàne (nwamònu anyi?) kutàmba mùvwàbi kale amu. Ke Nyumà Mwímpè nyàwù.

⁴⁸ Mpindyewu, mapà aa àdi mu Nyumà Mwímpè. Mpindyewu, bu disangisha edi mu dindà emu, edi. . . èkèleeziyà ànu mulenga wa dikèma mùle tètè nè. . . (Bibambalu byà bantu bìyiila nè panshì, mu bushùwà bwà bwalu, mmùle tètè.) Kàdi mu. . . Ànu. . . (Nciyi mumanyishe nè netwàdamunè nkonko eyi to, kàdi bantu aba mbaabà ànu balwè babwelè.) Mònaayi's, bu muntu nè muntu mwab'ewu mwikàle mu dipetangana ànu menemene nè Nyumà Mwímpè, yònsò wa kunùdi muujìlbwe tètè nè Nyumà Mwímpè nè mu dipetangana nè Nyumà Mwímpè, bimanyinu ebi bìvwa bifwànyine kwikala ànu bìvulangana munkaci mwènù díbà dyònsò (nwamònu anyi?); bìvwa bifwànyine kwikala ànu bimònàngàne ku musangu nè ku musangu. Kàdi mwaba wùdi cibwejàkàji, mwaba wùdiku dishìilangana, nè wutùdi tulongolola bintu, Nyumà Mwímpè kèna mwà kukwata mudimu to. Nudi numòna anyi? Kèna mwà kukwacila mudimu mu bantu to. Nwamònu anyi?

⁴⁹ Nènku mwaba awu, bu mémè mwà kwamba nè: “Mpindyewu nwènù, muntu nè muntu wa kunùdi, nuvwa baakùle mu myakulu

anyì?”

“Èyowà.”

“Èè, nudi Nendè.” “Nudikù baakùle mu myakulu anyì?”

“To.”

⁵⁰ “Kanwèna baMupete to.” Mpindyewu, ndi ndivwija mèmè mwine mulumbulwishi. Nzambì ke Mulumbulwishi wa bintu ebi.

⁵¹ Kàdi tàngilàayi, Yesù wàkamba nè: “Bimanyinu ebi nebililè.” Nwamònu anyì? Bisùmbù bìdì bìitabuuja abi, ngiikàdilù mujimà nkòong wa Nyumà Mwîmpè ùdi ùtuuta nkòka munda mwàbò, nè bònsò bwàbò mbùle tètè nè dinanga, nè disànka, nè—nè ànu kasùmbù kanène kàà—kàà—kàà—kàà bantu bàà difwàna dyà Nzambì bùjìbwe tètè abu. Nwamònu’s, aci’s ke Nyumà Mwîmpè nyàwù. Nè pashiishe mwómò amu, bàdi bàakula mu myakulu mu mpùngà wudi myakulu yitákuka awu (mòna’s), anyì yikèngediibwa bwà cyòci aci, bàdi bàakula mu myakulu. Nènku kwòkò cipròfetà, cìdi cyàkula. Nènku kaa, bìdi ànu bipwàngàne dîbà dyònsò.

⁵² Konkàayi bantu dikùmi nè bàtaanu anyì makùmi àbìdì bàvwà babwele mu muyiiki wà bàbìdì kuntwaku mu dindà emu ní kùvwaku mwàkù wùmwèpelè mu mùshindù kampàndà, mupangile mu mùshindù kampàndà, pààbù ànu beenyi bèètù bàà menemene aba. Ncinyì...Nyumà Mwîmpè ùmbula ànu munda amu, nè ùpeta bintu abi, nè kubipàtula buludi pambèlu, nè kubàmbilabì. Nwamònu’s, nwamònu anyì? Kakwèna ntùpàkànyì munda mwàci nànsha. Kubàmbila ànu menemene cìvwà cyòci *eci*, nè cìvwà cyòci *eci*, nè cìdi cyòci *aci*, nè cìdi cìkèngelà bwà cyòci *eci* kwenjiibwaci, nè bintu byà mushindù awu, nè bìdibo bènzè, nè bivwa bikèngela bwà kwenzabò. Nwamònu anyì? Aci cìdi ànu...Ucitàèke mu bulongàme. Mpindyewu, bikèngela bènzè bwalu kampàndà pa bwalu abu.

⁵³ Dilòlò kampàndà mvwa nyiikilangana nè babàka kampàndà, nè mvwa ku—kumbèlu kutùvwà twenzela masangisha, anyì ànu—tuvwà ànu basòmbe banyùngùlùkile mèèsà kampàndà tuyikila. Ke dyàkàmwè, Nyumà Mwîmpè kupònayè munkaci mwètù, ke mèmè kwambila muntu kampàndà mwaba awu nè: “Ndi mumòne muntu *kampàndà*, nè bòbò. . .yèyè ùvwa mu cibwejàkàjì mu meeji èndè pa maalu kampàndà,” ke mèmè kwamba nè: “bu mùdi mu cibwejàkàjì mu—mu—mu dijingulula amu.” Mèmè nè: “Mpindyewu, s’ncyòci eci mwab’ewu mene mpindyewu.” Mèmè nè: “Ndi mumanyè cyùdì wela meeji aci.” Nènku ke mèmè kupingana buludi nè kwangata ànu cibèndà kampàndà kàdi kwandamuna dìnà lukonko lwònsò lwàkadì naalu muntu awu mu mutù mwèndè, bwà nè yèyè. . .Muntu nànsha umwe kàvwakù mene mumanyè cìvwà ngàmba to pa kuumusha ànu yèyè mwena bwalu. Nwamònu anyì? Kàdi’s wàkacyùmvwa. Yèyè wàkamanya bwalu

bwàci bwònsò. Nudi numòna anyi? Nè aci cìvwa ncinyi kùdiye's? Kumuleeja, kumushindikila nè Nyumà Mwîmpè nguvwa umbuulwila cìvwa mu meeji èndè aci. Nudi numòna anyi? Nènku kabivwa bikèngela bwà mémè kucyàmbila bakwàbò abu to. Muntu awu ùdi munkaci mwà kuntèeleja patùdi twakulangana apa mene. Mpindyewu, aci ncyà bushùwà. Mpindyewu, nudi numòna mùdi aci anyi? Aci's ndishindika.

⁵⁴ Mpindyewu, bu èkèleeziyà mujimà mwà kukwàta mudimu mu dyumvwangana mùshindù awu, díbà adi munkaci mwètù tudi bafwànyine kwikala twipata badémóns, tukwàta nyòka nè byanza, tunwa bintu bìdi bishipangana, bintu byà mishindù yònsò biikàle byenzeka. Kàdi paùdi uteeta bwà kubyenzeja bantu-nkààya, díbà adi udi udisàngana... Aci's mbwena Mpenta kàbìdi. Díbà adi nudi nupeta Baabùlòonà, cibwejàkàji. Kwéna mwà kulumbulwisha aci to. Nwamònu anyi? Myoyi yètù mmyùle tètè nè disànka ne dicyònkomoka, nè kaa ekèlekèle, nyuunyi's yìdi yìmba misambu, kùdi. . . Bintu byònsò mbilenga byà dikèma, ekèlekèle, bùlè ànu tètè nè Nyumà wa Nzambi, nènku tudi mu dinanga nè Yesù, tudi baswè kusambila bufukù bujimà.

⁵⁵ Mpindyewu, ncyèna muswè kuyumbakaja musùmbà ewu to, anyi nànsha mémè mwinè kunùdi to. Kàdi ndi ndìkonka, bu mémè mwà kukonka mu dindà emu nè nganyi mu musùmbà wà bantu ewu udi nè Nyumà Mwîmpè, pàmwàpa mbifwànyine kwikala byà pa lukàmà makùmi citèemà nè bitaanu byènu byèlè byanza byènu muulu nè nudi nè Nyumà Mwîmpè. Pashiishe ndi nkudimuka nnùpèèsha cileeeji cyà mu Bible, ànu cìmwèpelè cyanàànà, cileeeji cyà mu Bible; nènku ndi ngèèla mpatà bikolè nè nkufwànyine kwikala cyanza cìmwè anyi bìbìdi byàya muulu. Nwamònu's, nwamònu anyi? Ànu mufwànyine. . . kucìswika ànu mu mwaba bu nànkù, kàdi paùdi wenza nànkù (nwamònu anyi?), udi kàbìdi munkaci mwà kwenzela disangisha dyèbè bibì. Kàdi's bìdi bikèngela bwà ùbàpàtùle mu maalu à bwànà awu bwà kubàbweja mu buntu bukùlumpè. Nwamònu anyi?

⁵⁶ Bu mwàkafùnda muntu kampàndà lukonko ditùkù adi, lùvwa mwab'ewu, wàmba bwà. . . wàmba cintu kampàndà bwà bwalu bwà Mwanèètù Junior Jackson. Muntu kampàndà kupwekayè kuntwaku, ke kwambabo nè: "Udi mupweke mukatwilàngàne nè 'nkunde mibolè,'" anyi cintu kampàndà anyi kansanga cyà mùshindù awu. Mwanèètù Jackson. . . Bwalu disangisha dyà Mwanèètù Jackson, bàdi bàbàlekela bààkula mu myakulu ànu mu èkèleeziyà amu. Mwaba wònsò wùdìbo bùmvwà Nyumà nè baswè kwakula mu myakulu awu, bàdi bàtùngunuka nè bènza nànkù. Èè, awu's ng'èkèleeziyà wa Mwanèètù Jackson. Abi's bìdi ànu bìmpè menemene. Ncyèna naaci nè bwalu nànsha bùmwè to, kantu nànsha kàmwè. Junior Jackson's ngumwe wa ku balundà bàanyi bàà batàmbe bwîmpè, nè muntu wa difwàna dyà Nzambi wa menemene, mùle tètè nè

Nyumà wa Nzambi, kàbidì tudi bânà bàà muntu. Mpindyewu, kabyèna bikèngela bwà yéyè kudya dyâmpà dyányi dyela cèrisè to, ndi mwà . . . Anyi kabyèna bikèngela bwà mémè kudya dyèndè dyèla pomme adi to (nwamònu anyi?), kàdi's twètù bônso tudi tudya ànu dyâmpà dyela bimuma. Tudi bùbidì bwètù twitabuuja Mukenji ewu ànu menemene. Aci mbulongàmè bwà èkèleeziyà. Mémè ndi mwambè nè: “Ndi muswè bwà èkèleeziyà wanyi àteetè bwà kudisangisha pàmwè.” Mémè nè . . . Pàkabangàbi kumwèka munkaci mwètù kaaba aka, Nyumà Mwîmpè mwikàle wàkula mu myakulu nè bikwàbò, Mémè nè . . . Muntu kampàndà kunkonkayè, wàmba nè: “Mpindyewu, Mwanèètù Branham, byònsò abi mbishùwashùwàle anyi?”

⁵⁷ Mémè nè: “Mémè ncyèna nzuji to.” Mémè nè: “Nnwambilè bwalu anyi, twǎnjibi kucifikisha pa kaaba kampàndà. Bilekèlaayi byǎnji kuya nàнку ntàntà nè tubifikishè mu cipidi cyà Díyi dyàmòna mwà kutwàdiibwa pa bwalu abu. Díbà adi citàngilaayi. Cyòci ciikàle Nyumà Mwîmpè, Cidi cìpetangana ànu nè Díyi; byòbi kabìyi nàнку to, kacýakupetanganaku nè Díyi nànsha.” Nwamònu anyi? Awu's ke mùshindù wùmwèpelè wunùdi mwà kucimanya; díbà adi cidi—cidi cidikòsela bwalu. Nudi numòna anyi? Èè, cyòci—cyòci necyàngatè ciji cyòci kaciyi Nyumà Mwîmpè to, necifiikè munda. Nwamònu anyi? Kàdi Yéyè mwikàle Nyumà Mwîmpè, Yéyè neàlonde ànu nè kalolo kònsò mulongo wà maalu, bwalu ke cidiYe ncyòci aci; N'Nyumà Mwîmpè munkaci mwà kulonda ànu bulongàmè Bwèndè.

⁵⁸ Mpindyewu, mu dyakula dyà mu myakulu edi nè bikwàbò, mvwa kujinga nè muntu nè muntu wa kunùdi àkuleku mu myakulu. Mvwa kujinga nàнку bushùwà. Nènku misangu yábúngì, beena Kilistò bimpè . . .

⁵⁹ Nudi numòna's, mémè munwàmbilè nè aci cìvwa mu ndongamu . . . Mémè kusangana muntu kampàndà . . . Kì ndongamu to, mfwilaayikù luse, mu miyiiki yà bàbidì mu dindà emu. Muntu kampàndà (Ngèela meeji nè ùcidi ànu kaaba aka mu nzùbu emu) nè ùdi . . . Pa bìdi bitàngilà dyakula dyà mu myakulu . . . Muntu awu mmuntu mushùwashùwàle, muntu wa cyà bushùwà, nè yéyè ùvwa nè nsòmbelu wa mùshindù mujaalàme. Nè yéyè ùkaadi mungumvwè ngàmba nè cileeji cyà Nyumà Mwîmpè kacivwa dyakula dyà mu myakulu to, nènku kabyèna nàнку to, kàdi ndi mubele muntu awu bwà kulòmbayè Nzambi bwà àmulekèlè anyi wàkula mu myakulu anyi wàmba ciprifetà, bwalu aci's ngiikàdilù.

⁶⁰ Cintu cyà kumpàlà, mémè kuya kùdi muntu awu nè kujandula mwaba wèndè mumulelela, nè mwînshì mwà cimanyinu kaayi mwàkalediibwàyè, nènku mvwa mwà kwamba cìvwa dileediibwa dyèndè. Mùshindù kaayi wàkabwelàci mu ngiikàdilù wèndè wa mu bufùki kumutèèkaci mu mulongo kampàndà. Pashiishe, pààkalediibwàyè cyàkàbidì, ùdi ùsanganyiibwa mwab'ewu mu ngiikàdilù mukwàbò. Nè

pashiishe, paùdi udisangana mu ngiikàdilù ewu, awu's mmuntu wa munda, kòndò kàà mwoyi munda, kòndò kàà mwoyi kàà munda . . . Kòndò kàà mwoyi kàà pambèlu kàdi kakulombola mu mùshindù kampàndà; ke dileidiibwa dyèbè dyà mu bufùki adi's. Pashiishe, nebènzè cintu kampàndà nè ciinè aci necibàtèèke cinyi? Mwínshì mwà inaayi, nè cibàtèèka mu ngiikàdilù wa mupandùlùke. Kí mbamanyè cyà dyenza to. Nebàmbè nè: "Mukalenge mmuswè bwà mèmè kwenza *cikampàndà*."

⁶¹ Munda amu nè: "Kaa, ndi—ndi mumanye ànu nè cidi—cidi—cidi—cidi cìpetangana nè Mifùndu." Nènku nebàtwàdije kucyènda, kàdi katanci aka anyi, Sàtaanà lwà pambèlu apa neàbàleejèmu bìlèrà byà m̀shindù yònsò. Nènku d̀bà adi b̀di b̀amba nè: "Èè, ngèèla meeji nè ndi . . ." Nwamònu's, nwamònu anyi? B̀di b̀atèèleja Sàtaanà. Nwamònu anyi? B̀kèngela wàngate cintu kampàndà cyà munda aci, cidi munda mwèbè amu cidi cyà mu Mifùndu aci. Kàdi kùlekedikù Sàtaanà wìmana mwaba nànsha wùmwè to. Cidi . . . Aci's mmudimu wèndè bwà kwìmana mwaba awu nè kukutwà bisùsù mùshindù awu. Kàdi wèwè kumutèèlejìkù nànsha.

⁶² Kàdi, muntu awu, mèmè kumwambila. Yèyè nè: "Èè mpindyewu, mèmè mwà kwikalakù ànu mutwishìbwe nè ndi nè Nyumà Mwìmpè's." Nwamònu anyi? Muntu mwìmpè be, muntu wa lulamatu lwà menemene mwikàle nè Nyumà Mwìmpè, kàdi mbifwànyine kwikala b̀mpè bwà yèyè kwamba nè: "Taatu, mpèèshèku ànu eci bwà cintu kampàndà cyà mèmè kushìndaminapù."

⁶³ Mpindyewu, mèmè mucilongeshe mùshindù awu, bantu mbafwànyine kwolola cyanza nè kukwata cyòci aci kabàyi nè cidi muntu awu naaci nànsha. Nwamònu anyi? Nyumà Mwìmpè's ùdi wàkula mu myakulu, kàdi b̀di b̀kèngela wànji kwikala nè Nyumà Mwìmpè kumpàlà kwà Yèyè kwakula mu myakulu. Mpindyewu nwacyùm̀vù anyi? Pa nànku, wèwè mwolòle cyanza mubàkùle dipà dyà dyakula dyà mu myakulu kùyi . . .

⁶⁴ Mpindyewu vùlukàayi nè, aci cidi mwà kwikala dipà dilelèlè; aci ncifwànyine kwikala Nyumà Mwìmpè mwikàle wàkula munda mwèbè mu myakulu myenyi, kàdi's udi mufwànyine kujìmina nè kuya mu ifernò. Bible ngudi mwàmbè nànku. Nudi nwitabuujà nànku anyi? Udiku muswè kupeta Mufùndu pa bwalu abu anyi? Nwènù baswè Mufùndu, elàayi cyanza muulu. "Nànsha mèmè ngàakula mu myakulu bu bantu nè Banjèlò . . ." Ncyà bushùwà anyi? Yònsò yìbìdi, eyi yìdi mwà kwandamunyiibwa nè yìdi kayiyi mwà kwandamunyiibwa, myakulu yà Nyumà Mwìmpè mushùwashùwàlè. "Ndi cintu cyanàànà," nwamònu's, ànu cikwàbò aci c̀ya naayi. Udi mwà kupeta *eci* (nwamònu anyi?), pa nànku kùyi kulumbatangana nè *cyàcyà* kùyi nè *eci* nànsha. Anjì peta *eci* dyàmbedi, nè pashiishe ncyà bushùwà nè *aci* necicilondè.

65 Mpindyewu, mvùla ùtu ùlòkela bîmpè nè babì. Dìbà dùtu dikenkesha beena lwonji nè bîmpè. Mvùla wùtu wumata bwà kubobesha bikùnyìibwà; udi ubobesha kàbìdi lupela, mvùla ànu wumwewumwe awu. Nyumà Mwîmpè ùdi mwà kumata mu kasumbù kàà bantu, nè kwakula mu myakulu, nè kucivwija cilelèlè menemene, kwalabala munkaci mwà bantu, nè kubafikisha ku dyamba dyà bipròfetà, nè kwikalabi bilelèlè ànu menemene. Aci's ncyòci menemene's!

66 Mîngà misangu udi mwà kuya kùdi mwa—mwamùlopò anyi mutèmpi wa lubùku, nè bàdi mwà kukwambila cintu kampàndà cidi cyà bushùwà menemene. Tàngilàayi mwamulopò wa ku Endò kùdi Shaùlè. Bivwa mwà kwikala bilelèlè menemene; aci kî ncyanjì ànu kwikala cyòci to. Bòbò's mbaamwàmulopò. Dyakula dyà mu myakulu, mèmè nkaadiku mumòne démons yàkula mu myakulu, nè yifùnda mu myakulu myenyi. Aci kacyèna nè cidici cyùmvwija to. Kàdi cintu cilelèlè n'Diyi adi cyàkàbìdi. Alùkìlaayi ku Dìyi adi!

67 Pa nàнку, udi mwà kwenza bintu ebi kùyì nè Dìyi to. Kàdi paùdi upeta Dìyi, nè Dyòdi ndidi dicyèza, dìbà adi nùcitàngìlaayi ànu kucitàngìla nùmonè mùdici cyènzeka menemene, cintu cijaalàme ànu menemene. Nwamònu anyi? Dìbà adi nudi ànu menemene mu mulongo.

68 Èyowà, Nyumà Mwîmpè ùdi ùkwàta mudimu nè bantu aba mùdibi bifidiibwe kùdi lungènyi Lwèndè Sungasunga lwà Bunzambi. Kàdi cintu cyà kumpàlè . . .

69 Mpindyewu ncinyi? Ngänjì nnùnyùkùlùleku ànu ndambù kaaba aka bwà katanci kakesè cyanààna. Ndi mufwànyine kwamba nè: “Mbanganyi bàdi nè Nyumà Mwîmpè?” Nwènu bônso elàayi cyanza muulu. Ndi mwà kwamba nè: “Èyo, nèmmonèbi ní nudi Nendè.” Bible mmwàmbè nè aba bàvwà nè Nyumà Mwîmpè abu bàvwa bàpuma nè bàdila myadi muunya nè bufùku bwà binyangu bìdi byènjiibwa mu cimenga. Mpindyewu, mbyanza bùngì kaayi bìdi bifwànyine kwediibwa muulu? Mbanganyi bàà ku nwènu bàdi kabàyi mwà kwikisha butùkù, bùle tètè nè disànka, nè bukolé bwà Nzambi, kàdi nè dibungama dyàbùngì bwà bantu bàdi bajimine, bàdi nudila muunya nè butùku nè nwela mbilà bwà binyangu? Kanwàkwikala . . . Nwamònu anyi? Nganyi udi mufwànyine kwikala nàнку mu cimenga? Mbanganyi bàdi nàнку's, mu èkèleeziyà? Ke cidi Bible mwàmbè nè ke civwà cileeji cyà Nyumà Mwîmpè aci.

70 Wàkambila Mwanjèlò mutù wa citampi (Yèhezèkèlè 9, ncyà bushùwà), Yèyè wàkamba nè: “Angàta . . . Picilà mu cimenga bwà ùtwe cimanyinu pa aba bàdi bàpumà nè bàdila bwà binyangu bìdi byènzèke mu cimenga. Bààshààla abu, Mwanjèlò mubùtudi àbàbùtùlè.” Nànsha nè bàvwa bidimba byà mùshindù kaayi nè bùngì bwà bintu bidìbo benzè, yèyè nè: “Twàkù . . .”

Nènku muntu mwikàle nè kalòndò kàà máyì à mufùndi, muvwàle bilàmbà bitòòke (civwà cìleeja Nyumà Mwímpè) wàkapàtuka nè kutwà cimanyinu pa bònsò bàvwà bàpuma nè bàdila mwadi bwà binyangu bìdì byenjìibwe mu cimenga. Mpindyewu, wèwè udi wamba . . . Nènku tângilàayi cyàkambàYe kàbìdì mwómò amu. “Nushipe nubùtulè, bàna bakesè, bakàjì banunu, bàna bàà mu mabòkò, nubashipa bònsò!” Bàna bakesè? Èyowà’s!

⁷¹ Pààkabwelà Yoshùwà mu buloba bwà Kaanaàna, wàkamba nè: “Kanùlekedikù nànsha umwe wa kùdìbo mwikàle nè mwoyi to. Yèyè mwikàle mwàna mukesè mulenga kumòna, mwàna wa cyena Amàlèkà, anyì mwena Amòlà, nùmushebèyè! Nwàvùluka nè, yèyè’s neàkole bwà kwikala mwena Amàlèkà; neàkooyishè kamponyi.” Nènku pàdì tuntu tukesè atu twàlukila mùshindù awu túbèngangana nè Dìyì dyà Nzambì, tùukakana nè cintu aci. Nànsha ciikàle cyà ku dìngumba kaayi.

⁷² Wèwè udi wamba nè: “Èè, s’mbímpè. . .” Nànsha bòbò biikàle bantu bìmpè bàà bìshi! Bòbò bàbèngangana nè Dìyì adi, patùla cintu aci munda mwèbè. Nkàna kakesè kàà cyena Amàlèkà kàdì munkaci mwà kwenda kukola. Kàmwèka kalenga kumòna, kàmwèka kakayi kamanyè bwalu; kàmwèka ànu nè nkimpè, kàdì kùbwelakanyikù naakù to. Wèwè shààla kule naakù.

⁷³ “Èè, Mwanèètù Branham, ndi—ndi mpweka kwìnshì eku, bwalu. . . Èè, ncyèna. . .” Vùluka wèwè ànu nè, dìnà mwena Amàlèkà, cintu cyònsò cìdì civila Dìyì aci, shààla kule naaci; kùbwelakanyikù naaci nànsha kakesè to! Mbanganyi bàdì bìitabuuja nè aci m’Bulelèlà? S’ncyòci cyà bushùwà. Nwamònu anyi? Shààla kule naaci!

⁷⁴ Udi upùma nè ùdila mwadi bwà binyangu bìdì byenjìibwe mu cimenga. . . Nudi numòna aci penyì? Ndi mwà kukuleeja binunu dikùmi byà byàkula mu myakulu pa umwèpelè udi bulelèlà wòshika mwoyi bwà mpèkaatù. . . bàdì kabayi nànsha mwà kusambila dìbà dìmwè to. Kàdì nuvwakù bamanyè nè Bible mmwàmbè nè. . . twàkù cimanyinu ànu pa aba bàvwà bàpuma nè bàdila mwadi bwà binyangu mu cimenga? Mbanganyi bàkaadiku bacìbalè? Bushùwà’s! Úvwà n’Nyumà Mwímpè wàkapàtuka bwà kutwà bantu cimanyinu, nè kwambila Mwanjèlò mubùtudi nè: “Ndàakù nè ùbùtulè byònsò bìdì kabiyì nè cimanyinu aci pa mpàla to.” Nè cimanyinu cyà Nzambì n’Nyumà Mwímpè, ke Cìtampì cyà Nzambì.

⁷⁵ Mpindyewu, bantu bàdì bwalu abu butàmbe kutonda bàdì penyì’s? Ndi mwà kuumvwa nwènù bàdì batupika muulu nè panshì nè nwela mbilà mu èkèleeziyà abu; ndi mwà kunùleeja bàdì bèèla mikunda nè bànyeemakanangana mu nzùbu mujimà amu; ndi mwà kunùleeja bantu bàdì bàmba bipròfetà, nè byènzeka; ndi mwà kunùleeja aba bàdì bàakula mu myakulu,

nè—nè banyema bàbànda bàpweka mu nzùbu, nè bàmba maalu àdi mu bushùwà bwà bwalu bàandamuna, ènzeka; kàdi muntu udi upùma nè ùdila mwadi bwà binyangu bìdi byenjiibwa mu cimenga awu ùdi penyì? Musùùkà ùdi mwambùle bujitu awu wepi? S'udi mwà kukùdimwinapù mabèji mapyamàpyà. Nudi bùmvwe cìndi muswè kwamba aci anyi?

⁷⁶ Mpindyewu, ndi muteetè nè mwànyì mwònsò bwà—bwà—bwà kunwàmbila nwènù aba nè kunùlombola mùdi papa mufwànyine kulombola bàna bèndè amu. Nwènù nudi bàna bàànyì; ndi munùlelèle Kilistò ku Èvànjeeliyò ùndi nyiisha ewu. Nwamònu anyi? Nènku ndi—ndi—ndi muswè bwà nwènù kukoleshiibwa bu bàna bakesè babobesha menemene, anyi—anyi bàna's. Nènku ndi muswè kunùleeja Kilistò mu ditùkù adi, bu mwàkambà Pòlò nè: “Mushikankùnde virgò.” Kakwèna cintu nànsha cimwè mu Diyì adi cidi mwoyi wèbè kawùyi mwà kutwà “amen” ku cyòci aci nànsha.

⁷⁷ Mpèkaatù kèna nè...Mu bushùwà bwà bwalu wèwè newènzè bintu bibì, kàdi pàdi mukwàbò awu, cintu cyà kumpàlà menemene aci cikupùisha wèwè nè: “Taatu, mfwilèku luse.”

⁷⁸ Ndi muswè kwamba nùnkù ewu. Ndi mfùma ku ditàngila muntu kampàndà ànu mu tusunsa tukesè emu. Bàvwa bankonkèci kùdi nsongàalùme kampàndà wa maalu mimpè ditùkù adi. Tuvwa munkaci mwà kulemba nshìndi. Dìndà adi mèmè kukwàta yitaanu; mèmè kushiya umwe bwà mu mapingaja amu. Mu ditùngà dyà Kentucky udi ukwàta ànu yisambòmbò; kwèna upicisha apu to. Ke muntu kampàndà ewu kwambayè nè: “Ndi naayi citèemà.” Mwànà wa balùme mwena Kilistò, mwànà wa maalu malenga.

Mèmè nè: “S'udi mwenzè bibì. Udi mwenzè bibì!”

Yèyè nè: “Èè... ”

⁷⁹ Mèmè nè: “Mu dìndà adi mvwa naayi yitaanu, kulamina umwe bwà mapingaja awu. Nènku pangàakapeta nshìndi umwe awu, kutàngila mu mucì kampàndà, nè kubala yitaanu anyi yisambòmbò misòmbe ànu mwaba awu wùmvwà mwà kuyitàngila, mèmè kukwàta njila kuya nè kuyishiya.” Mèmè nè: “Mèmè kubànda kuulu, ku mucì kampàndà mwaba ewu ànu matùkù mashààle aa, nènku kùvwa mitwè ku dikùmi nè yitaanu anyi makùmi àbìdi misòmbe mwaba awu. Mvwa ànu mushiikidile mu bùngì bukòsa, è kukwàta njila kuya, nè kushiya mikwàbò ayi mwaba awu.” Mèmè nè: “Pangikalà mèmè mulwà mu edi ditùnga, nnuyiisha nwènù balumyànà, nè nwènù aba mwaba ewu, cintu cidi cyà bushùwà, Bikèngela ngiikale nè nsòmbelu wa cileejilu aci.” Bwena Kilistò kí ncyùdi wèwè wamba to, ncyùdi wèwè wenza, cyùdi wenza aci; ncileejilu. Wèwè udi mukele wà bàà pa buloba. Mèmè nè: “Dìbà adi, mikenji yidi yàmba... Yesù wàkamba nè: ‘Pèeshaayi Kaayisà bintu bìdi byà Kaayisà abi.’ Paùdi wèwè unyangakaja mukenji wà lubilu lwà

kwendeshila awu kuntu kwàka, cyûdi wenza ncinyi? Udi wenza bibi; udi wenza mpèkaatù. Pèesha Kaayisà cidi cyà Kaayisà, nè cyà Nzambi cidi cyà Nzambi aci.”

⁸⁰ Wêwè udi wamba nè: “Èè, mikenji’s mmibi.” Mémè ncyèna nè cîndi mwà kwenza nànsha yôyi mibi munyi; mbibi bwà kushipa dîyi ditùma dyà Yesù. Nènku wêwè kùyi upèesha Kaayisà bintu bidì byà Kaayisà abi to, dîbà adi udi mwenzè cìvwa Yesù mukwambile bwà kùcyènji to, kàdi’s dishipa dyà mikenji mmpèkaatù. Ncyà bushùwà anyi?

⁸¹ Twètù bônso’s tudi bapùile; tudi tucyenza. Kàdi paùdi udimòna wêwè mwinè mu ntùpàkànyi, imànyikà’s! Bantu bàdi munkaci mwà kukutàngila; bantu kabàtù bàya mu èkèleeziyà to, kàdi’s nebàkubalè wêwè, bàmonè cyûdi wenza.

⁸² Pa nàнку, petà Kilistò munda mwà mwoyi wèbè; aci’s ke cilelèlà . . . Kilistò nè Nyumà Mwîmpè bàdi cintu cimwècimwè aci. Nyumà Mwîmpè, *Kilistò* mbwena kwamba nè “Mulaaba maanyi awu.” Nè Nyumà Mwîmpè ngudi Dilaabiibwa adi, nè wêwè ngudi mwela maanyi awu’s. Nwamònu anyi? Nènku’s n’Kilistò munda mwèbè udi ukulaaba awu. Nudi numòna cîndi muswè kwamba aci anyi?

⁸³ Dîbà adi udi nè cintu cijaalàme. Dîbà adi Yèyè ùdi mwà kukwàta neebè mudimu bwà cintu kanà cyònsò cidiYe muswè kukwàta neebè mudimu, bwalu wêwè udi mu Mubidi nè mwikàle ukòokela dyònsò dyà ku mapà awu. Kàdi nwamònu’s, bwà kwikala nè dimwè dyà ku mapà adi pambèlu pàà Mubidi awu, kî mbifwànyìnekù kwikala nè dikwacisha nànsha dikesè kùdi to. “Nànsha mémè ngààkula mu myakulu yà bantu nè ya Banjèlò, nciyi nè luse to, kabyèna binkwàcisha to. Nànsha mémè nè diitabuujà nè mwikale mwà kuumvwa maalu masokoka ònsò à Nzambi, kabyèna binkwàcisha to. Nànsha mémè mufile mubidi wànyì bwà kwoshiibwawù bu mulàmbù, mufile bintu byànyì byònsò kùdi bapèlè, nànsha mémè nè diitabuujà dyà kuntentemuna naadi mukùnà, ndi cintu cyanàànà.” Nwamònu anyi? Kanwèyemenyi bintu abi to. Nyumà Mwîmpè n’Kampàndà; N’Nzambi, Nzambi munda mwèbè, Mupèrsonà awu, Nzambi, udi ukenkesha buumùntù bwèbè bwònsò mu kaabujimà. Udi mushintùlùke; udi cifùkùibwà cipyacìpyà. Kantu kakesè kanà kònsò kàdi kabì, Yèyè neàkwambile nè nkabi, dîbà adi lekèlà; kùkènji to. “Taatù, ncìvwa nè meeji à kwenza nàнку to, Mfwilèku luse.” Nwamònu anyi? Nènku aci’s—aci’s n’Nyumà Mwîmpè.

⁸⁴ Nànsha wêwè mwakùle mu myakulu bishi, nànsha munyeeme bishi, nànsha wêwè mutùpìke munyi, nànsha wêwè mwenze *cikampàndà*, *cikansanga*, anyi *cikankènga*. Wamònu anyi? Cyònsò cyûdi mwènzè, kî mbifwànyìne kwikala nè musinga to pùikalà Nyumà Mwîmpè kàvwa munda amu bwà kukupiiisha pa bintu bidì bîmpè nè bibi to.

⁸⁵ Mpindyewu, ke bwà cinyi muntu udi apa ewu mmubingè. Lekèlà Nyumà Mwimpè àcyénzè. Kàdi mpindyewu (nudi numòna anyi?), mpindyewu, cidi cyenza eci...Lekèlaayi ncyàmbè nè dinanga, cimyamina nè dinanga nè—nè cilaaba maanyi nè Dìyi. Nwamònu anyi? Bu Nyumà Mwimpè mushùwashùwâlè mwikàle munda mwèbè, nunku kwèna mwà kucyèla mpatà to. Wèwè mwine udi mucimanyè, ncintu cyà muntu-nkààya pankaci pèèbè nè Nzambi. Nwamònu anyi? Udi mumanyè nè cintu kampàndà ncyenzèke. Udi mumanyè nè kùdi dishintuluka kampàndà, nànsha kakùyì nànsha cìmwè—cikwàbò cintu nànsha cìmwè, wèwè nkààyebè, udi dishintuluka adi. Nwamònu anyi? Wèwè mene ke udi mushintùlùke awu, munda mwèbè amu, nè udi mumanyè nè udi Nendè. Nànsha wèwè mwakùle mu myakulu, nànsha wèwè mutùpìke, mwelè mbilà, anyi ní ncinyi cikwàbò, udi mumanyè nè Nzambi ùdi nè wwoyi munda mwèbè, nè kwèna wenda nè meeji èbè wèwè mwine to, mmeji à Kìlistò àdi àkulombola nè Dìyi adi, ànu menemene mùshindù ùdiDi dìya awu.

⁸⁶ Mpindyewu's! Kàdi ndi mufwànyine... Bantu bôbò bàmba nè: "Èè dîbà adi, Mwanèètù Branham, kwèna witabuuja nè bìvwa bìkèngela bwà twètù kwakula mu myakulu anyi?" Nwamònu anyi? Dîbà adi udi mumvwe lubòko menemene cindi mfùma ku dyamba aci. Cyà bushùwà, ndi ngiitabuuja nè bìvwa bìkèngela bwà wèwè kwakula mu myakulu. Nènku bàmwè bàà kunùdi nwènù...Nwamònu anyi? Kàdi angàtaayi byòbì ebi, nè...Ndi mpeta byòbì ebi, bu mùdi kwènji katanci pa ntàntà wa kilòmèètà binunu bibidi nè nkàmà yinaayi eyi (nudi numòna anyi?), biikàle apa ku tabernacle eku. Ànu, wèwè kùyì mucyùmfwè to, dîbà adi ùnkonkè. Nwamònu anyi? Cìmfùndile wèwè kùyì muumfwè to. Ambà ànu cindi ngàmba kaaba aka aci. Nwamònu anyi? Nènku ndi...Nènku nwènù...Bu mwàkambà Pòlò nè: "Nùndondàayi mèmè mùndi ndonda Kìlistò emu." Nudi numòna anyi? Dîbà adi nwènù bamòne nè ndi mupiile, dîbà adi umùkaayi kùndi, nwamònu's, kwàjiki, bwalu ndi mufwànyine—ndi mufwànyine kwikala muntu udi kàyi wa kulonda to. Nwamònu anyi?

329. Bu wèwè mwà kuswà umvwijàku's. Bantu bàdi bàmba nè Mwanèètù Branham mmutàmbe nè muntu, ùdi mwà kufùka, nè Yesù ùdi mwà kwikala mufwànàngàne ànu nè Mwanèètù Branham.

⁸⁷ Mpindyewu, ndekèlaayi...Muntu mmwambe eci. Nànsha yèyè mufwànyine kwikala nganyi, ncyèna mumanyè to. Kàdi mèmè ndi mwanèènù wa balùme. Nwamònu anyi? Yesù m'Musùngidi webè. Mèmè ncyèna mwà kwikala Musùngidi webè to, bwalu Yèyè ùkaadi mumanè kukusùngila. Mpindyewu, udi pabwìpì menemene nè kwikala mu Bulelèlà mwaba awu, kàdi nànsha nànkù kule menemene nè Bulelèlà, muntu mwine udi mwabile muntu ewu eci nunku awu. Mpindyewu, cidi

ànu... Bwànyì mèmè mbyènze bu cyanza cyà muntu mukàjì udi mufunde, mfundilu mulenga wà dikèma. Nènku mvwa mufwànyine kwamba nè cìvwa ncyanza cyà muntu mukàjì, kì mmwòmò anyi? Mwanèètù Capps, kwènàku mufwànyine kwela meeji nè aci cìvwa cyanza cyà muntu mukàjì anyi? Cyanza cilenga be. Kàdi ncyèna mumanyè nè nganyì to. Nwamònu anyi?

⁸⁸ Mpindyewu: “Mwanèètù Branham, Yesù mmufwànyinekù kufwàngana neebè anyi, anyi wèwè udi Yesù, anyi cintu kampàndà cyà mùshindù awu anyi?” Mu ngumvwilù umwe wa mwàkù, aci’s m’Bulelèlà bwà menemene; mu ngumvwilù mukwàbò wa mwàkù aci mmufwilakanyi nè Kilistò. Ke dishiilangana didi pankaci pàa cilelèlà nè cyà mashimi adi’s. Bwà kumvwija mèmè ewu Mupèrsonà wà Mukalenge Yesù Kilistò, mbifwànyine kwikala mufwilakanyi nè Kilistò (nwamònu anyi?), bwalu Mupèrsonà wà Mukalenge Yesù awu mmusòmbe ku dyàbalùmè dyà Mutàmbe bunène wa mu dyulu, nè neàlwe cyàkàbidì mu bukòlè bunènè nè butùmbi. Kàdi bwà nè Mwoyi Wèndè wùvwà munda Mwèndè awu mwikàle pambidi pàanyi, nè pambidi pèebè wèwè udi Nèndè awu, aci’s m’Bulelèlà bwà menemene; nènku udi ulwa Kilistò.

⁸⁹ Nudi bavùlùke diyiisha dyànyì dyà baaMaasiyà bàà twànàtwànà anyi? Nwamònu anyi? Nudi...Mwàkù ewu *Maasiyà* wùdi wùmvwija nè...“mulaaba maanyi Awu.” Mpindyewu, ke cyùdi, wèwè nè Nyumà Mwimpè, udi ulwa mulaaba maanyi awu. Nwamònu anyi? Dìbà adi kùdi balaaba maanyi bàà mishindù yònsò.

⁹⁰ Mpindyewu tàngilàayi, pìikalàbi nè mbalaaba maanyi bàà mu Bible. Bààbùngì bàà kùdibò mbalaabiibwe maanyi... Nwamònu anyi? Cintu cyònsò mu kaabujimà cidi mu cinkùtunkùtù mùyòmbelè cinène cyà dikèma cyà... mùshindù wònsò wà cibwejàkàjì; nè—nè wà... Sàtaanà nè budimù bwèndè bwònsò mmuditwemù kàdi kucitentula ànu mu katòba, mu katòba nè katòba pàmwè nè kònsò. Kakùyì mpatà to kùdi mùshindù ànu wùmwèpelè wùdi mwà kwikala mutwishiiibwe; kenketa dīyì ku dīyì, ku dīyì nè ku dīyì! Ke mùshindù wùmwèpelè wùdi mwà kwikala naawù.

⁹¹ Kàdi bwànyì mèmè bu—bu muntu, William Branham, anyi—anyì muntu mulùme mukwàbò kanà yònsò ewu anyi mukàjì bwà kwikalayè Mukalenge Yesù Kilistò, Musùngidi wetù awu, aci’s ntùpàkànyì. Kàdi bwà kwikala mulaaba kùdi Nyumà Wèndè, udi utwàla Mupèrsonà Wèndè Yèyè mwinè wà Mwoyi Wèndè munda mwèbè awu... .

⁹² Byàkafwànyikijiibwa bilenga byà dikèma mu Eliyà nè Elishà, pààkangaciibwà Elishà muulu, Eliyà awu’s, mupròfeta wa kale awu, wàlukila Kumbèlu. Nè yèyè ùkaavwa mucyòke nè muzengèle; nè kùvwa dikalù dyà mvità dikùdika dyàmwàmwà dyà musùlù adi, nènku yèyè... bwà kubànda nèndè Kumbèlu nè

tùbalù twà kapyà. Kàdi nuvwa bamòne díbà adi, pàakasabukà Eliyà nè Elishà musulu awu apu anyi? Cilongelu cyà bapròfeta cìvwà kuntwaku munkaci mwà kubàtàngila. Ke Eliyà kwangatayè cinkùtù cyèndè nè, anyi, kutuutayè pa musùlu. Nènku pàakenzekabi nànkù, musùlù wàkaabuluka, nè yèyè kusabuka. Ke kwambilayè mupròfeta wa citende awu nè: “Ncinyi—ncinyi cyùdi wenda undondela? Ncinyi—ncinyi—ncinyi cyùdi ujinga?”

⁹³ Yèyè nè: “Mpìtù yìbìdì yà nyumà webè awu ayi yìlwe pambidi pàanyi.” Mpìtù yìbìdì yà mupròfeta wa bukolè awu ayi yìlwe pambidi pàanyi?

Yèyè nè: “Udi mulòmbe cintu cicolè be; kàdi wèwè mummòne pàndì nya apu, díbà adi Necilwe pambidi pèèbè.” Pa nànkù nudi mwà kudìfwànyikijila mùvwàye mutàngile mupròfeta awu’s.

⁹⁴ Mpindyewu, mu ditùkù adi, mupròfeta awu ùvwa Díyi, bwalu yèyè ùvwa dimwèneshiibwa dyà Díyi kùdì bàà pa buloba. Nwamònu anyi? Nè yèyè ùvwa mumanyè nè kùvwa nè cyà kulwa mudimu wà bwambi mutàmbe bunène, bwalu bìvwa bìlòmbe cintu citàmbe bunène. Nènku pàvwà Yesù pànu pa buloba, Yèyè ùvwa Eliyà awu. “Bintu bìndì Mémè ngèza ebi nenùbyènzè pèènu; nenwènzè binène bipite nè ebi, bwalu Ndi nya ku Taatù Wanyi.” Mpindyewu, neùcyènzè munyi? Mutàngile Yèyè’s! Yèyè ùdi Nganyi? Díyi! Nwamònu anyi? Mutàngile Yèyè’s!

⁹⁵ Mpindyewu, pàkaadibi bikafika ku difùkà dyà bintu, s’mbulelèlè. Kacya Yesù kì mmufùkekù buludi cintu nànsha cìmwè nè mucìfikishe ku diikalakù to. Yèyè wàkangata cintu dyàmbedi. Wàkangata màyi, kwenza mvinyò. Wàkangata dyàmpà nè kuvudija màmpà àbùngì. Wàkangata mushipa nè kuvudija mishipa yàbùngì. Kàdi Yèyè wàkalaya nè bintu binène bipite ebi bìvwa mwà kwenjiibwa. Nwamònu anyi? Nudi numòna anyi? Mpindyewu, bwà cinyi? Cìdi mu ditùkù dibì kutàmba mùvwàbi pàvwàYe pànwapa. Nwamònu anyi? Cìcìdi ànu Yèyè, kàdi ùkwàta mudimu nè tabernacle webè. Nwamònu anyi?

⁹⁶ Nè muntu udi munda mwèbè ewu, udi dilediibwa dyèbè awu . . . Wèwè udi John Doe; udi mulela mu ngondo *kampàndà*, nè udi mulediibwe mwìnshì mwà mùtootò *kampàndà*; uvwa mulediibwe mwìnshì mwà cintu *kampàndà*, nè aci cìdi neebè bwalu *kampàndà*. Cyà bushùwà menemene’s!

⁹⁷ Ndi mumanyè nè kale wàwa mvwa nè ciibidilu . . . Papa ùvwa nè ciibidilu cyà kwamba nè: “Ncyèna mwà kukùna bilùngà byà mpàtata abi pa díbà edi to, bwalu ngondo kèna mu díbà dyèndè to. Kwèna mwà kukùna bilùngà abi to, Billy.”

⁹⁸ Nènku mèmè kwamba nè: “Ncyèna mbikùna mu ngondo to, ndi mbikùna kaaba aka mu malaba’s!”

Yèyè nè: “Èyo, mwena meeji matwè cidimanyine wè, tùngunukà! Pawàpeta ndambù wa bisùsù ku mutù kwèbè aku

neùshiishè kuyila cintu kampàndà.” Mémè kwenza nàнку. Mémè kwenza nàнку.

⁹⁹ Ndi nnwàmbila nè: angàtaayi dibaya dinène nùditéèkè mwaba awu pa mashinda mu mifitù yà ngondo kàdi nùtangilè nùmonè cidì cyènzekà. Mashinda awu’s neáfwe buludi mpindyewu. Ditéèkaayi mu bukênkè bwà ngondo; nudi mwà kudishiya ditèèka mwaba awu lumingu lujimà; kabyàkuènzela bwalu bubì nànsha bwà kànà to.

¹⁰⁰ Tàngilàayi mbù awu pàdi ngondo awu ùshintuluka mwàmwa. Pàdi màyi à mbù...Pàdi ngondo ùfwà, màyi à mbù àdi àmulonda, pèndè’s ùdi kule nè buloba mu ntàntà wa miliyò yà kilómèètà. Kí ng’ànù aci to, pwekàbi mu ditùngà dyà Kentucky emu kàdi ùtùkije dilekà dyà mucì mwínshì mwà malaba too nè mùdi ulenga pa màyi à mukelè; nè ùtangile lushibàshibà alu, mu ndondo bule kaayi udilù lùsanganayibwa pàdi ngondo. . . pàdi mavwala à mbù àlwa kàdi tàngilà ùmonè mùdìwu àkàma, too nè lwà mwínshì mwà buloba amu. Bushùwà!

¹⁰¹ Kùnabi wèwè ànu cintu kampàndà cidì cilamba lwà pamutù pàà buloba. Ku mubàlù wà ngondo citàngile ùmonè mùdici citùkina mwínshì nè cìcivwija mutù làadishà anyi tuunèpà wènza. Cìkùnebi mùshindù mukwàbò kàdi ùtangile ùmonè mùdici cilamba pa mpàlà pàà buloba. Cyà bushùwà, cidì nè cintu kampàndà cyà dyaenza’s.

¹⁰² Mbwà cinyi Aalònà ùvwa nè dibwe dyà dilediibwa dyà yònsò wa ku bankambwà abu pa cibwikilu cyà pa cyàdi cyèndè apu? Tàngilàayi baamaamù abu dìbà divwabo bàtùula méyi pa kulela apu. Pàvwà baamaamù abu nè bakàji bàà beena Ebèlù abu mu didinyèngà dyà buledi bàwa bàtùula méyi pàvwà bàna abu bàlediibwa, àvwa àtèèka dìnà dyàbò; àvwa àlonda bwalu bwà dilediibwa dyàbò; àvwa àbàtèèka mu buloba bwàbò; àvwa àbàtèèka mu Cyèndèlèlè.

¹⁰³ Dimwè dyà ku matùkù àdi panshi aa pàndi ngàalukila nè nshàalaku ndambù wa cikondo kampàndà, ndi muswè kwangata cyena-bwalu aci. Menemene! Pashiishe tàngilàayi Yakòbò, pàvwaye ùpunga nè lufù mwaba awu, pàakatentekelàye bankambwà byanza nè kubàbèneshayè, yèyè’s ùvwa mwà kubàmbila menemene mwaba wùvwàbo mwà kusanganyiibwa. Nè aci’s cidì menemene bilondèshile dìnà dyàbò, nè ànu menemene bilondèshile dilediibwa dyàbò. Nènku bushùwà, cidì neebè bwalu kampàndà’s.

¹⁰⁴ Mpindyewu, ke kajila kèèbè kàà dilediibwa aku’s; ke cyùdi ncyòci aci, mulùme wa mubidi anyi mukàji wa mubidi. Kàdi paudì ulediibbulula cyàkàbidi, aci kí nkòndò kàà mwoyi kàà pambèlu aka to. Kàà pambèlu ke kaudì umòna, ulenga, umvwa, ununkila, nè utèèleja, kàdi lwà munda mwàci amu ke mùdi cyùdi wikalangana bulelèlè. Mpindyewu, eci cidì pambèlu apa eci, Sàtaanà ùdi ànu ùkuteeta nè ùkutuuta panshi

eku nè eku mu mùshindù wònsò ewu; kàdi lwà munda emu yèyè kèna mwà kucyenza to amba ànu wèwè mumulekèle ùcyènzà's. Bwalu mwómò emu udi nè diitabuuja, nè diitabuuja kadìtu difùmina mu kòndò kàà mwoyi kàà pambèlu aka to, kàtu kàlukakaja ngènyi's. Kàdi mu diitabuuja kamwèna dilukakaja dyà ngènyi to. Udi udìpetela kùdi Nzambi, nè wèwè udi mumanyè nè didikù. Nànsha cyòci cimwèka cyà mafi bishi, wèwè's ùdi ànu mumanyè nè ncyà bushùwà; cidi ng'EMU MMÙDÌ MUKALENGE WÀMBA. Nwamònu anyi? Nè kakwàkwikala cintu nànsha cimwè cyàcitàcisha to. Cintu nànsha cimwè kacyéna mwà kucitàcisha to; cidi mu njila kacya ànu citàngile kumpàlà buludì. Lutàtu kalwèna lùcyàmbila cintu to; cisebamù ànu njila buludì, bwalu Cidi n'Dìyi. Nè Dìyi didi Mwelè wà mvità, nè Dìyi didi dikòsa . . . Mwelè wà mvità wùdi ùpanda ùDishiya mudiikàdile ku bintu bikwàbò byònsò. Nudi numòna anyi? Bidi bikèngela cyanza cyà diitabuuja bwà kukwata Dìyi adi. Bidi bikèngela bwà diitabuuja kwikaladi. . .

¹⁰⁵ Mpindyewu nwamònu's, pàdi kòndò kàà mwoyi kàà munda aku. . . Munda mmwómò emu; pambèlu mpòpù apa. Ncibuulula mwómò emu, Bulelèlà abu's; pambèlu apa, ndilukakaja dyà ngènyi. Mpindyewu, kabyèna bìmwèka byà meeji bu twètù bafwànyine ànu kwamba nè: "Tudi tuya bònsò bwà kashàala bàà mu Assemblées anyi"? Mpindyewu, mèmè ntu munangè beena Assemblées de Dieu, ntu munangè ba-Unitaires, ntu munange èkèleeziyà yònsò ayi. "Mbwà cinyi butùdiku katùyì tuya ànu bònsò bwà kaswikakana naabò? Pàmwàpa kwenzakù bwimpè kampàndà." Ke dilukakaja dyà ngènyi adi, lwà pambèlu. Kàdi lwà munda amu, citàngilaayi. Panùdi numòna kaaba aka, eci—eci necipanganè, dībà adi. . . Tàngilàayi beena Assemblées. Bintu byàbùngi bidìbo benza ncyèna ngiitabuuja nè mbyà—mbyà mu Mifundu nànsha, nè mukumbàne mwà kubàjaadikilaci nè kì ncyà mu Mifundu to. Kàdi kùdi mitù bùngi cyanààna mipàyamù. Kùdi binunu byà bàna bèètù bàà balùme nè bàà bakàji bàà beena Assemblée abu bàdi biitabuuja eci, Dìyi edi, nè kabayi biitabuuja bidi Assemblées yilongesha nè mbilelèlà to. Kàdi's bàdi bàdisangana mu buntàtande.

¹⁰⁶ Ba-Baptistes, ba-Presbytériens, ba-Unitaires, nè bakwàbò bònsò abu, bàdi bàdisangana mu buntàtande mùdi musumbà wà bantu mudisangishe pàmwè nè bàdi bàlukakaja lungènyi pa bwalu abu. Nènku mbenzèle muntu dyèsè dipite bùngi. Ke mwepiskòpò ewu musòmbe kaaba aka, mutàngidi wa bònsò; pàdiye wamba cintu kampàndà, ncinyi cìkala kalumyàna kakesè aka nè cyà kwamba? Ùdi nè bwòwà bwà kwamba ní ncinyi cyònsò. "Ndi mutwè ku cyèbè. Èyowà, aci's ncyà bushùwà! Uh-huh! Èyowà's, Mwepiskòpò, anyi—anyi Mukulu mutàngidi, wèwè udi. . . aci's ncyà bushùwà menemene." Yèyè udi ùtwa ku cyèndè.

¹⁰⁷ Mòna, twàngatàayi bi kanwàyì wa maalà à kapyà mu

mùsèèsù emu, udi mwena ntanda yònsò ewu ùpicila mwaba awu mu mùsèèsù amu wàmba nè: “Mulalakanyi wa kale ewu, kêna nè bwà nsongo to.” Nda nendè kwinshì eku, ùmubweje mu bampùlùshì emu, kàdi umwasè mpètè, nè ùmuvwàdike cingoma’s. “Bèèt-wàbu, John, mbìmpè be bwà kukumòna cyàkàbìdì!” Nwamònu anyi? Kusungulujangana muntu nè mukwèndè’s.

¹⁰⁸ Yesù wàkamba nè: “Mmunyi munùdiku mwà kwikala nè diitabuuja panùdi nusungululangana?” Mùshindù awu, nudi bamanyè’s, nutùsengeleela, nusungulula kampàndà. . . Ncyèna ànu muvùlùke ànu mùshindù wùdibu bàmba mwàkù awu kuntwaku to. Kàdi, pàdi dijinga dyènù dyà kusungulujangana muntu nè mukwèndè. Nwamònu anyi? Kanwèna mwà kwenza nàнку to.

¹⁰⁹ Kàdi pàdi bantu bàdisanga mu bulongolodi kampàndà, bàdi bàsòmba pàmwè; nè muntu mukesè awu’s ùdi nè bwòwà bwà kufyotola mukana, bwalu mwèpiskòpò mmumane kwamba nàнку, mukùlù mutàngidi ùkaadi mumane kwamba nàнку. Kàdi kanùpeetudi muntu awu to, mwitabùùjaayi nè mmuntu mwìmpè; kàdi nwàvùluka misangu yònsò nè, Dìyi dyà Nzambì ndilelèlè nè bikwàbò byònsò bìdì bibèngangane naadi abi mbyà mashimi. “Dìyi Dyànyi diìkalè dilelèlè, nè dìyi dyà muntu yònsò diìkalè mashimi.” Nudi nucimòna anyi? Ke citùdi baswè kwenza ncyòci aci, nkuciiitabuuja.

¹¹⁰ Mpindyewu vùlukàayi nè, twètù katwèna Dìyi adi to, kàdi tudi Dìyi adi’s. Uh-huh! Mpindyewu nwacyùmvù anyi? Yesù kàvwa Nzambì to, kàdi Yèyè ùvwa Nzambì. Yèyè ùvwa Muntu, kàdi pààbì’s Ùvwa Nzambì. Ùvwa mwà kudila, kàdi Ùvwa mwà kubiisha bafwè. Ùvwa mwà kudila bwà muntu kampàndà mufwè nè kumubiisha kàbìdì. Yèyè ùvwa Yèhowàh-yilè, Yèhowàh-laafà, Yèhowàh Maanàsè; Yèyè ùvwa Yèhowàh, byònsò mu kaabujimà. Yèyè ùvwa Yèhowàh, kàdi nànsha nàнку Yèyè ùvwa Muntu. Ùvwa ùkòòkesha buloba, nè mwenze buloba, kàdi kàyì nè kaaba kàà kutèeka mutù Wèndè to. Yèyè nè: “Nyuunyi yìndi Mèmè mwenzè yìdi nè maswa, kàdi Mèmè ncyèna nè mwaba wà kutèeka mutù to. Mikenge, yìndi Mèmè mufùke, yìdi nè meanà mu buloba, kàdi Mèmè ncyèna nànsha naawù Mèmè mwine to, nànsha mene bwà dijiikiibwamù.” Ncyà bushùwà. Byàkakèngela bwà Yèyè kusomba lukità lwà muntu kampàndà bwà kujiikiibwamù.

¹¹¹ Yèyè ke wàkafùka matrice à mukàji yònsò udiku ewu, Yèyè kàakadi nè matrice à kulediibwamù to, byàkakèngela bwà kusombaye matrice à mukàji kampàndà; Yèyè wàkafùka buloba, kàdi kàvwa nè mwaba wà kujiikiibwamù to, byàkakèngela bwà kusombaYè ciinà mu malaba, bwà kujiikiibwamù, cyà Yozefù wa ku Arimatea. Nwamònu anyi? Bìvwa—bìvwa bìkèngela bwà—bìvwa bìkèngela bwà bòbò kusomba mwaba kampàndà, pèndè Yèyè mwikàle Nzambì, bijaadikiibwe nè Yèyè ùvwa Nzambì.

112 Mpindyewu, nudi bumvwè anyi? Katwèna... Twètù tudi baaMaasiyà bàà twànàtwànà, kàdi kí n'Yesù awu to. Yèyè ùdi Taatù wetù; twètù tudi ànu balaabiibwe nè Nyumà Wendè cyanààna, nènku ke bwà cinyi Mwoyi Wendè... Nènku aci cidi cifikisha bantu. Nwamònu's, wèwè kùyi musòmbe nè mwelàpu meeji bîmpè to, cidi cifikisha bantu ku diitabuuja nè: "Èè, mulumyànà ewu's mmufwànyine kwikala Maasiyà awu." S'ki cidiye cyà bushùwà.

"Kampàndà udi apa ewu ùdi mwà kwikala yèyè." Ke cidìbo bùbìdì bwàbò. Nwamònu anyi? "Èè, mmunyi mùdìbo mwà kwikala bàbìdì bajimà?" S'badikù binunu's. Nwamònu anyi?

113 Kàdi nudi numòna's, Mwoyi Wende wàkatàpuludiibwa mu Ditùkù dyà Mpenta. Pààkapwekà Dikunji dyà Kapyà adi, Dyàkapanduluka bu ndimì nè kusòmbe pamutù pàà yònsò wa kùdìbo, Nzambi ùDyàbulula munkaci mwà bantu Bèndè, bwalu Èkèleeziyà nè Kilistò bàdi Umwe, ànu mùdi mulùme nè mukàjèndè biikàle umwe amu.

330. Mwanèètù Branham, mmunyi mùndì nè cyà kuleeja mukàjàànyì nè ndi bulelèlè mmucyùka nè kàbìdì ngènta... anyi nshààla nè Dìyi (Aci's)—nshààla—nshààla nè Dìyi, kàdi yeyè muciiikàle ànu nè lukonko lwà mùshindù ewu lwàmba nè: "Kwèna utèèka mu cyenzi byùdi uyiisha anyi wítabuuja bwà cinyi?"

114 Èè dîbà adi, pìikalà mukàjèèbè, pìikalà mukàjèèbè ùkwambila nànu pàdiye... pàdiye nè bukenji bwà kwamba nànu, cîmpè cyà wèwè kwenza nkudìlongolola's. Nwamònu's, nwamònu anyi? Dîbà adi yèyè—yèyè ùcyamba ànu mu meeji mabi, wàvùluka nè, Bible mmwâmbè nè: "Bìvwa bitàmbe bwîmpè bu dibwe dyà mpelu dikulembèleja mu nshìngù nè wèwè kwinyijiiibwa mu ndòndò wa màyi à mbù pamutù mene pàà kulendwisha mutàmbe bukesè wa ku bôbò aba, bàna bàànyì." Mpindyewu, aci cidi ànu wenù...?...

115 Nènku bìdi mwà kwikala nè mukàji ewu kí mmuntu wa mùshindù awu to. Pàmwàpa mmushiilàngàne. Pàmwàpa yèyè mmuntu mwîmpè. Pàmwàpa yèyè ùdi ànu ùkuteeta bwà kumòna ciwènzà.

116 Mpindyewu, shààla mumunangè nè mulekèlè àmonè Yesù munda mwèbè. Enzà nànu. Wamònu anyi? Tùngunukà wèwè ànu cyanààna. Ndambù... Ndi mufile kaacifwànyikijilu kakesè mu dindà emu bwà muntu udi... Musangu kampàndà mukàji mutekète ewu ùvwa—ùvwa mupetè Nyumà Mwîmpè. Ùvwa muntu mukesè wa kalolo kàà menemene. Bôbò... Yèyè nè... Èè, yèyè's ùvwa nè nsòmbe luwa lutàtù, nè bàyèndè ùvwa kanwàyi wa maalà à kapyà. Ke pa nànu, mukàji kutùngunukayè ànu mwèndè nè kale; kumutwàlayè. Kwambayè nè: "Wèwè muswè kuya mu èkèleeziyà, Munanga wanyì, ndàaku's!" Kàdi mpindyewu, yèyè kuya ku cinwinù, lwà kwînshì eku ku Brown

Derby wa kale aku, lwà kwínshì eku. Kutùngunuka ànu mwèndè nè kale. Pa nàнку bàvwa búngwila kuntwaku díbà dyònsò, bàvwa nè ciibidilu cyà kwikala baaBonifers. Bààbúngì bàà ku beena kale mwab'ewu nudi bavùlúke pàvwà Bonifer nè cinwínu kwaka mu disangu dyà. . . Mpindyewu bàdi bàcibiikila nè Brown Derby, ngèèla meeji nè mmwómò's.

117 Pa nàнку, kacya ànu bakùláme kuntwaku, kàdi katanci aka anyi, dilòòlò kampàndà kujuukakù lukonko bwà bwalu bwà èkéleeziyà nè bwà beena Kilistò. Umwe wa ku bakwàciki bàà maalà wa kale uvwa musòmbe mwaba awu kwambayè nè: “Kakùcyèna kàbìdi cintu pààci nè mbeena Kilistò to. Nè cintu bu nàнку kacitukù to. Bònsò aba mmusùmbà wà beena lubombo,” yèyè nè: “udi ubàmòna pambèlu apa bànwà mfwankà, bànwà maalà, benza cintu cimwècimwè citùtù twenza eci, nènku,” yèyè nè: “bàdibiikila mùdìbo beena Kilistò. Cintu bu nàнку kacitukù to.”

118 Mukwàciki mukwàbò wa maalà ewu kujuukayè è kwamba nè: “Anji indilà kakesè! Kùdikù umwèpelè ùndi mumanyè.”

Bòbò nè: “Nganyi awu?”

Yèyè nè: “Mmukàjàànyì.” Nwamònu anyi? Mukàji awu ùkaavwa mulwè mutwè mukelè. Mulùme ùvwa uumvwa ditwa dyawu díbà dyònsò.

Yèyè nè: “Ndi mwa kudya lupiku bwà nè yèyè mwediibwe ku diteeta. . .”

Yèyè nè: “To, yèyè ùcidi ànu mwena Kilistò; mèmè nènñùjaadikilèci.” Yèyè nè: “Ndi nzwambila citwenzà; túbandaayi kumbèlu, nènku nènñùleejè nè mmwena Kilistò anyi to.” Yèyè nè: “Túbandaayi kumbèlu, nè mpindyewu, twenzè ànu nè tudì bakwàcike bikolè byà menemene. Netùditwàle ànu bu nè tudì bakwàcike bikolè byà menemene.” Kukookola ku ciibi, kubwela bènda bàtetukila pa bintu byònsò nè—nè. . . “Nkwasa mmitèèka mùshindù ewu bwà cinyi?” nè bikwàbò byònsò. Ke kubàlongolwelayè bònsò nkwasa nè (benyi bèndè, nudi bamanyè's)—nè kuteetayè bwà kubààkidila bilenga ànu nè mwèndè pèndè mwònsò. Yèyè nè: “Ndi muswè ùtwènzèlèku ndambù wa cyà kudya cyà dilòòlò.” Nàнку ke bòbò. . . Kupàtukaye bwà kuya kalongolola ndambù wa cyàkudya. Yèyè nè: “Tudi baswè mayi nè munyìnyì.” Mulùme ùvwa mumanyè nè bàvwa naabi, ke kulongolola munyìnyì nè mayi. Pààkafikàye ku mèèsà aku, kubitàngilayè mùshindù ewu, kwambulayè dilòngò dyèndè adi, kàdi kutaayishaye bintàkanyì abi panshì apu, yèyè nè: “S'udi mumanyè, nè mèmè ncitu munangè àànyì mayi mùshindù awu to. Balùmyàna juukàayi tùpàtukè mwab'ewu tuye nànsha byà munyì,” mùshindù awu—mùshindù awu.

119 Kupàtukabò è kusòmbabò panshì mùshindù awu, nudi bamanyè's. Ke mukàji kupàtuka; kwambayè nè: “Munanga

wanyì, mfwileku—mfwileku luse mûndi ncìyì mukulàmbile bîmpè to; nkulàmbilèku makwàbò kàbìdì.”

¹²⁰ “Kaa, macimbu’s, wêwè’s uvwa mumanyè nè mêmè ncìtù muswè byà mùshindù awu ànu kwònsò eku,” bamònàngàne nè kwenza myandà yà lukutukutu mùshindù awu. Bààkapàtuka kuntwaku, nè kusòmbabò panshì, kàdi kwenza maalu bu nnè bàvwa bakwàcìke. Kumumvwabo munda amu mwenze bu ùdi udinungeenana, munkaci mwà kwimba musambu nè díyì dyà panshì menemene nè:

Yesù ùdi nè cyà kwambula nkùrusè nkààyendè anyì,

Bònsò bàà pa buloba bàya bènda bakùpa mabòkò anyì?

Kùdi nkùrusè bwà muntu nè muntu,

Nè kùdi nkùrusè bwànyì mêmè.

Nèngàmbule nkùrusè mulàmbula ewu,

Too nè pààmpèèsha lufù budìshikaminyi.

Mukwàciki wa maalà umwe kutàngila mukwèndè, kwambayè nè: “Mmwena Kìlistò; ùdi naabù!” Ke mukàjì mukesè awu kulombolayè bàyendè, poopàmwè nè bakwàbò abu kùdì Kìlistò dilòlò adì. Nwamònu anyì? Bwà cinyì? Nwamònu anyì? Ikàlà ànu wa kalolo kàà menemene. Vùluka ànu nè, Yèyè mmumanyè byònsò bìdìku.

¹²¹ Pa nàнку, mwanèètù wa bakàjì, anyì mwanèètù wa balùme, nànsha yèyè mufwànyìne kwikala nganyì, anyì mwanèètù wa balùme, kì cìdiye apa, bwalu mmukonke bwà bwalu bwà mukàjèndè, ikàlà wèwè ànu mutwè mukele; mukàjèèbè nèapetè nyòòtà pìikalàye nè cintu kampàndà munda mwèndè amu bwà kwikalayè nè nyòòtà. Kabìyì nàнку to, wàvùluka nè, wèwè nè muntu mubì, nèupete wa mwîmpè awu mu Bukalenge bwà bidimu cinunu. Tùngunuka wèwè ànu nè kuya; bilèma byònsò nèbìlongolodiibwèmu.

331. Mwanèètù Branham, utu ulongesha nè Mukàjì-musèla kèna nè cyà kuya mu èkèleeziyà nànsha umwe paùdì wèwè kùyì uyiishamù anyì, anyì ànu mu tabernacle, mu ngaakwilù mukwàbò, tabernacle anyì? (Ùdi nè mukwàbò, mbwena kwamba nè “ngaakwilù mukwàbò.”)

332. Kàbìdì, utu ulongesha nè kabyèna bikèngela bwà twètù kuneemekela dyà—dyàlumingu anyì diikisha, bu mùdì kukwàta mudimu, kulòba, anyì bikwàbò anyì? Anyì... (Ndi mufwànyìne kwamba nè aci cìvwa dyàlumingu. Bivwa bimwèke ànu bu nè dyàlumingu bwànyì mêmè. Anyì ànu kwìnshì menemene aku ncìfwànàngàne nè... anyì dyàlumingu, ngèèla meeji nè ke mùdìbì, diikisha anyì maadyàlumingu. Èyowà, maadyàlumingu, ke mùdìbì bimwèka anyì? Matùkù à cijila—matùkù à cijila, mu dyàlumingu nè mu matùkù à cijila.)

122 To! Udi mutùpàkàne. Nwamònu anyi? Lèkèlaayi ntungunuke bwà ndwandàmùne ànu mûndi ngenda mfikakù.

Utu ulongesha nè Mukàji-musèla kèna nè cyà kuya mu èkèleeziyà mukwàbò kanà yònsò ewu paùdi wèwè kùyi uyiisha—uyiisha anyi kàbìdi, mu ngaakwilù mukwàbò nè, mu tabernacle anyi?

123 To! Ncyèna ndongesha nàнку to. Ncyèna ngiitabuuja abi to; ncyèna nciitabuuja to. Tudi nè bambi basòmbe kaaba aka bàkaadi batangàlake mu ditungà dijimà emu, nènku ndi ngiitabuuja nè bàdi citùpà cyà Mukàji-musèla awu. Ndi ngiitabuuja nè muntu mulùme anyi mukàji ùdi mwà kuya mu èkèleeziyà mwaba kanà wònsò wùdiye muswè kuya awu udi ulongesha Dìyi. Nè ndi ngiitabuuja nè, bòbò kabàyi balongesha Dìyi mu kaabujimà to, nè kùyi mwà kuya mu èkèleeziyà mu mungà mwaba wùdibo bàlongesha Dìyi mu kaabujimà to, nda mwaba wùdibo balongesha citùpà cyà Dìyi too nè pawàpeta mwaba wùdibo balongesha Dìyi mu kaabujimà. Nda mu èkèleeziyà cyònsò cyùdi wenza nànsha ciikàle cinyi. Enza nàнку.

Kàbìdi utu ulongesha nè tudi nè cyà—tudi nè cyà... kabyèna bikèngela bwà twètù kuneemekela dyàlumingu to, anyi ditùkù kanà dyònsò dyà cijila, anyi—anyi dikwàta dyà mudimu, anyi mùdi dikwàta dyà mudimu, anyi dilòba mu dyàlumingu?

124 Ndi ngèèla meeji nè mmpèkaatù bwà kulòba, nè kulemba, nè kwenza mudimu mu dyàlumingu paùdi mwà kuya mu èkèleeziyà. Mpindyewu, ndi ngiitabuuja nè udi ushipa mikenji yà Nzambi. “Kùdikù dìyi ditùma bwà byà nàнку awu anyi?” Èyowà’s, mukalenge! Mpindyewu, mu Dipungila Dikùlukulu tuvwa nè cifwànyikijilu cyà ditùkù dyà Nsabatu. Byònsò bìvwa... Nè Yesù kàakalwa bwà nwènu kulama matùkù à Nsabatu to. Ditùkù dyà Nsabatu dyà kale òvwa diisambòmbò, òvwa ndekeelu wa lumingu. Dyàlumingu nditùkù dyà mwandamukùlù, anyi ditùkù dyà kumpàlà dyà lumingu, dyàkabiika Yesù ku lufù adi.

125 Ncyèna ngiitabuuja nè mbìmpè bwà... Mpindyewu, wèwè usanganyiibwa ntàntà mule mu cipèèla mwaba kampàndà, nè mwikale pambèlu pàapa mu lwendu lwà bulembi, kakùyi èkèleeziyà pabwìpi apu to, cintu nànsha cimwè cyà bwena aci, nènku kakwèna cintu nànsha cimwè cyùdi mwà kwenza to; nènku bu nè uvwa munkaci mwà kulòba, ndi ngèèla meeji nè abi mbifwànyine kwikala bìmpè. Kàdi wèwè pabwìpi mu cimenga, anyi mwaba kampàndà wùdi èkèleeziyà munkaci mwà kusambidisha, bikèngela ùbwele mu èkèleeziyà mu mishindù yònsò, mwaba kampàndà.

126 Nè ndi ngiitabuuja nè, bwà cidì citàngila dikwàta dyà mudimu, ngèèla meeji nè ngombe yèyè mupòne mu ciinà, anyi bikèngela kwenza cintu kampàndà mu dyàlumingu, ndàku

ùcyènzè, cyôci ciikàlè cintu kampàndà cyùdi kùyì nè mùshindù mukwàbò wà kwenza to, bikèngela kucyènza mùshindù awu. Kàdi wèwè ànu ucyènza, kàdi windila too nè ku dyàlumingu bwà kucyènza, anyì ucyènza ànu mùshindù awu, udi mupùile. Nwamònu anyì? Katwèna nè cyà kwenza aci to, tudi nè cyà kuneemeka ditùkù dyà cijila adi.

¹²⁷ Nènku mpindyewu, vùlukàayi nè, ndaayi mu èkèleeziyà mwaba kampàndà, mwaba kampàndà. Bu...Ndi—ndi mufwànyine kutèela èkèleeziyà kampàndà wa cyenamàngumba, kàdi ncyèna muswè kucyènza to, bwalu èkèleeziyà ewu, cintu cimwèpelè cìndiku mumanyè cìdibo balongesha cìndi ngùtabuuja ncyà nè, bàdi bàmba nè bàdi bìitabuuja nè Yesù Kilistò m’Mwànà wa Nzambi. Èè, mémè ntu ngùtabuuja nànkù. Dilongesha dyàbò dyònsò dikwàbò dìdì...Bàtu bìitabuuja mu...nè dijìmjilangana dyà mpèkaatù dìdì nku màyi. Mpindyewu, kí mba-Unitaires to; bàdi bènza cintu cimwècimwè aci, kàdi kí mbòbò beena bwalu bündi ngàakula to. Bàdi bìitabuuja difùkuludiibwa dyà ku màyi adi—adi, nè bikwàbò. Kàdi mémè ncyèna ngùtabuuja abi to. Kàdi bòbò, kaa, bàdi bìitabuuja nè cintu kampàndà cyôci nè dyondopa dyà kùdi Nzambi munda mwàci aci ncyà kùdi dyabùlù. Nè bàdi bìitabuuja mu byònsò...Bòbò ke bàmwèpelè—bòbò ke cintu cimwèpelè cidiku, nè cintu cimwèpelè cidì cikèngela wèwè kwenza nkufùnda ànu dìnà dyèbè mu mukàndà awu. Nè wèwè kùyì naadimu to, udi mujìmine. Mpindyewu, mémè ncyèna ngùtabuuja aci to. Kàdi kòkò kakùyì mukwàbò èkèleeziyà kwàkuya to (Ncyèna mwà kuyamù bwà kudyula to), ndi mufwànyine kuyamù nè meeji à nè bwikadi bwànyì, nènku mémè musòmbe ku luseke lwà muntu kampàndà, bwà nè Kilistò uvwa munda mwà mwoyi wànyì awu wàmòna mwà kwikala nè bwenzeji pa muntu kampàndà muntwamu. Ndaayi munkaci mwàbò, kàdi kanwàbanyanganyi naabò bupidyà bwàbò to.

333. Mwanèètù Branham, ndi muswè kupeta Nyumà Mwímpè. Ndi muswè kumanya cyà dyenza. Ndi nè bujitu bwà dikù dyànyì bwà kusùngidiibwadi. Nènku mwanèètù wa bakàji awu mmufùnde dìnà dyèndè.

¹²⁸ Wèwè muswè kupeta Nyumà Mwímpè, lekèlè nkwanbìlèku cintu kampàndà, Mwanèètù wa bakàji munanga, pawikalà kaaba aka. Nènku—nènku—ndi... (Mwanèètù Neville, awu ncidimba cyà èkèleeziyà ewu anyì? Kwìnshì kwàka...?...) Nànsha mémè ncyèna—ncyèna mumuvùlùke to. Kàdi pawikalà—pawikalà kaaba aka, Mwanèètù wa bakàji B-o-u-g-h, pawikalà kaaba aka, lekèlè nkwanbìlè’s. Bible mmwàmbè nè: “Bàà disànka ng’aba bàdi nè nzala nè nyòòtà yà bwakàne...” Udi mubènèshìibwe be ànu bwà kuMujinga. Nwamònu anyì? Mpindyewu, wàvùluka nè, kí nnè udi—udi—udi muMupetè to, kàdi bàà disànka ng’aba bàdi nè nzala nè nyòòtà Yèndè, “bwalu bòbò nèbùjiibwè.” Shààla ànu naayi.

¹²⁹ “Cìndì nè cyà kwenza bwà dīkù dyànyì ncinyi’s?” Kwàta mudimu nè diitabuuja dimwèdimwè dyúdi ukwata naadi mudimu bwèbè wèwè mwinè adi, bwà dīkù dyèbè. Ùbàlambule kùdi Mukalenge nè wītabuuje nè mwoyi wèbè wónsò nè nenùsungidiibwè. Cyènzekè...Kùcilekèdiku cilwa ànu pa ngeelèlù webè wa meeji wa mubidi ewu to, cipwekèshè munda menemene amu, kandòndò aku, dībà adi mbèèbè wèwè. Nzambi mmukupèeshabù paùdi naabù lwà munda emu.

¹³⁰ Cyònsò cyúdi naaci mu mwoyi wèbè emu nè ucilomba, paùdi usambila, itàbùùjà nè udi upeta cyúdi ulòmba aci. Mpindyewu, kwèna mwà kucyela kàbìdi mpatà to. Kwèna mwà kucīitabuuja nè kucyèla mpatà musangu wùmwèwùmwè awu to. Mbanganyì bàdi bamanyè nàнку? Kwèna mwà kwitabuuja nè kwela mpatà musangu wùmwèwùmwè awu to. Bikèngela wītabuuje nè cyúdi wèwè ulomba aci, udi ucipeta, pashīishe Yèyè mmwàmbè nè necīikale mwà kukupèebwa. Pa nàнку udi ànu wītabuuja bwà dīkù dyèbè cyanààna, nènku nebàcipetè.

334. Mwanèètù Branham, bwà mwanèètù wa balùme bùdi munyì bu mùdìbì—bu mùdìbì nè kwèna—kwèna uyiisha pa Mpungi? Udi muvùlùke mulayì wùvwà mumpèeshe ku tèlefònè bwà bwalu bwèndè nè Mpungi Mwandamutekète ayi anyì?

¹³¹ Ncyèna mubùvùlùke to. Ncyèna muvùlùke nè cìvwa ncinyi to. Kàdi cyònsò cìdìci aci, lekèla Billy Paul àmanyè nè ncinyi. Cyònsò cìmvwà mulayè aci, nencyènzè. Ncyèna mvùluka to. Nudi bamanyè’s, ndi...Mìngà misangu ntu mbwela, pàmwàpa mu mēbà à bufùku, ngàndamuna mabīikila makùmi àsàtù, makùmi ànaayi musangu wùmwè, nudi numòna’s, pa nàнку ncyèna mvùluka ku dilòòlò nè dilòòlò dyònsò, mìngà misangu pàndi pabwìpi apa, pa nàнку ncyèna mmanya nè ncinyi to.

Kàdi mbishi bwà mwanèètù wa bakàji wa cyena Kàtòlikè nè mwanèètù wa balùme? Twasàkidila.

¹³² Kaa, muntu ewu ngwa kule pambèlu pàà cimenga, kule menemene mu Texas. Ndi...Èè, mwanèètù wa bakàji, pawìkalà—pawìkalà wa ku Texas nè wèwè mupetè mukàbà wà mèyi ewu, anyì kwòkò mukàbà wà mèyi, ngèèla meeji nè kakwàkwikala mukàbà wà mèyi pa cyòci eci to, kàdi wòwòkù...(Bàdi munkaci mwà kukwàta mukàbà wà mèyi anyì? Nudi nuwùkwàta anyì?) Èyo, pīikalàbo...Mukàbà wà mèyi...Dībà adi ndi nnwàmbila mùdi bwalu. Nwènu...Pa mukàbà wà mèyi ewu, panwàsangana eci, nwàvùluka nè: “Kàdi bishi bwà mwanèètù wa balùme ewu...pa bidì bitàngila Mpungi Mwandamutekète?” Ncyèna mvùluka bwalu abu to, ànu mèmè mulayè bwà kumumòna anyì cintu kampàndà mu Mpungi Mwandamutekète ayi. Bu mèmè mwà kwikala mulayè, nèmmumònè; bwalu ncìvwa muyiishe Mpungi Mwandamutekète

ayi to, Mvwa muyiishe *Difestò Dyà Mpungi*. Nwâkumvwa bwalu abu's.

¹³³ “Kâdi mbishi bwà mwanèètù wa bakàjì wa cyena Kâtòlikè nè mwanèètù wa balùme? Twasàkidila!” Ndi nkwabwila, Mandamu C-o-r-n-i-l-s-e-n... Inābānzà awu yēyē kaaba aka, àmòngane nè Billy Paul mu dindà emu. Kâdi—kâdi kabiyi nānku to, èè, nēngiikale—nēngiikale—ncyēna—ncyēna ngumvwa cidici to (nudi numòna anyi?); cidi ànu ndukonko cyanānà. Ncyēna—ncyēna mwà kucyūmvwija to (nwamònu anyi?), cidici, bwalu mvwa mulayè cintu kampàndà bwà mwanèndè wa balùme nè Mpungi nè bwà mwanāàbò wa bakàjì wa cyena Kâtòlikè; kâdi ncyēna—ncyēna—kí ncindwilè mu meeji àanyi emu mpindyewu bwà kucivùluka to. Mònganà ànu nè Billy.

Eci cidi nè cyà... Aci's cidi ànu dilòmbà dyà disambila. Cifila dīnà dyà muntu awu cyamba nè: “mutù wùsaamà nè mutù wà kapàla.” Pa nānku aci cìvwa ànu... Ànu bwà kubāsambidila cyanānà, ngèèla meeji. Eyo.

335. Bu wèwè mwà kuswa umvwijàku dibàkà nè dishipa dyà dibàkà. (Nkaadi mumane kwikala nè alu. Eci's nkonko mwandamutekète, nkonko mwandamukùlù pa cipesè cimwè cyà dibèji.) **Bu wèwè mwà kuswa umvwijàku dibàkà nè dishipa dyà dibàkà.**

Nkàadi mumvwije.

336. Mòsà nè—nè Eliyà pa buloba mpindyewu anyi? Mòsà nè Eliyà bàdi pa buloba mpindyewu anyi? Bàdi mu Àmèrikè anyi?

¹³⁴ To! Nwamònu anyi? To, kabèènapù to; kabààkwikalapù to pàdi Èkèleeziyà kàyi muumùshiiḽbwe to, dībà adi Mòsà nè Eliyà... Mbanganyi bàdi bùm vwa aci? Eyo. Nēnku tūmonāyibi. Kabèèna bafunde dīnà pa elu nānsha, pa nānku... Eyo. Piikalàbi ní nganyi udi mwelè nkonko eyi... Ngèèla meeji nè yidi mwandamutekète mujimà; ndi mufile... mufunde mwandamutekète. Eyo!

337. Umvwijàku dishiilangana pankaci pàà “Dīnà dyà Yesù,” nè “Dīnà dyà Yesù.” (Anji indilaayi kakesè.) **Umvwijàku dishiilangana pankaci pàà dīnà “Yesù” nè “Dīnà dyà Yesù.”**

¹³⁵ Èè, ónsò àbidi neikale ànu mwomùm wè piikalàbi nè mmangàciḽbwe mu mshindù wùm wè wùm wè awu (nwamònu anyi?), mangaciḽbwe bwà Mupèrsonà wùm wè wùm wè awu, dīnà Yesù, nè *Dīnà dyà Yesù*. *Dīnà dyà Yesù* nè dīnà—dīnà *Yesù* ncidiYe Yèyè aci's. *Dīnà dyà Yesù* didi dyàkula bwà Mupèrsonà awu, pa nānku mbifwānyine kwikala cintu cimwècimwè aci... Ndi ngèèla meeji nè aci ncifwānyine... Aci kaciyèna cyūmvwika cyà meeji anyi? Nwamònu anyi? *Dīnà Yesù* ke Mupèrsonà Yèyè mwinè, nè *Dīnà dyà Yesù* didi dileeja Mupèrsonà awu. Nwamònu anyi?

¹³⁶ Ambà tǔng, dínà dyànyì ng'William. Ke mèmè awu. Èyo. Mpindyewu, wèwè udi wamba. . . Ndi ngàakula. . . *Dínà dyà William*, dǐbà adì's wèwè udi untèela mèmè. Ke dínà dyànyì ndyòdi adi. Nwamònu anyi? Mpindyewu.

338. Dínà dyà Mukalenge ndishintùlùkekù mu bipungu bishùlèshùlàngàne anyi?

¹³⁷ Èyowà's, àyowa! Musangu kampàndà dyàkabiikidiibwa—Yèyè wàkabiikidiibwa nè NDI. Wàkabiikidiibwa nè n'Yèhowàh, nènkù Yèyè mmushintùlule misangu yàbùngì. Musangu wà ndekeelu wàkashintuludiibwàdi mpàakalwà Nzambì mubidi nè kwangata dínà dyà muntu.

¹³⁸ Yèhowàh, NDI, nè ònsò awu, mmyànzù bwà Dínà kampàndà. Nwamònu anyi? Ní uvwa mubàtíjiiibwe mu dínà dyà Yèhowàh, bìvwa bikèngela kwikalaci Dínà dyà Yesù Kilistò. Ní wàkabàtíjiiibwa mu dínà dyà Yèhowàh-laafà, Yèhowàh Maanàsè, nè Yèhowàh-yilè, ònsò awu, bìvwa bikèngela kwikalabi Yesù Kilistò. NDI ke Yesù Kilistò.

¹³⁹ Vùlukaayi nè, mwimane mwaba awu ditùkù adi, ke Yèyè kwamba nè: “Nudi nwamba munùdi badyè manà mu cipèèlà. . .”
“Baataatù bèètù bàakadyà manà.”

“Kàdi's mbafwè!” MwàkambàYe's.

¹⁴⁰ Bòbò nè: “Èè, tudi bamanyè mpindyewu nè udi mupàle, bwalu wèwè ewu udi ànu muntu wa kàyì nè bidimu bipíte pa makùmi àtaanu to, kàdi wamba mùdi mumòne Abraham.”

Yèyè nè: “Kumpàlà kwà Abraham kwikalayèku, NDI.” Nwamònu anyi? Yèyè nguwuwa NDI awu. Nènkù myànzù yònsò nè mènà àvwàku matàngilè Nzambì àywa menza Dínà dyà buntu òmwèpelè, Mukalenge Yesù Kilistò. Èyo.

339. Mpindyewu: Cikondo cyòci cijika pàakakàngudiibwà Bitampì, dǐbà adi cidi. . . Bu nè cikondo ncijikè (mfwilaayiku luse) pàakakàngudiibwà Bitampì, dǐbà adi Bukalenge bwà bidimu cinunu pààbù—dǐbà adi Bukalenge bwà bidimu cinunu mbujikè pààbù, kí mmwòmò anyi?

¹⁴¹ To, to! Cikondo kacìvwa cijike pàakakàngudiibwà Bitampì apu nànsha. Nudi bacyùm vwe bibi. Cyàkenzeka ncyà nè, maalu masokoka àkabuuludiibwa, kí ncikondo cijike to. Nwamònu anyi? Tàngilààyi ànu cyanàànà. Tàngilààyi nè ntèmà yònsò mpindyewu, nènkù newèlè mukàbà wèbè wà mèyi awu pawikalà mucyàngàcile ku mukàbà wà mèyi. Nwamònu anyi?

¹⁴² Cikondo kaciyènakù cijike pàcidi ànu. . . Ewu ùdi nè cyà kwikala mwena paanyimà pàà Bukalenge bwà bidimu cinunu anyi cintu kampàndà, udi mwelè lukonko elu. Bwalu nwamònu anyi? Tudi nè bidimu cinunu paanyimà pàà Èkèleeziyà mumanè kuya Kumbèlu nè mwalùkile pa buloba. Pashìshe cikondo cidi cijika mu Maulu Mapyamàpyà nè Buloba Bupyabùpyà.

143 Mpindyewu, Bukalenge bwà bidimu cinunu kî m'Maulu Mapyamàpyà nè Buloba Bupyabùpyà to. Nekwikalè ànu kàbidì mpèkaatù paanyimà pàà Bukalenge bwà bidimu cinunu. Bukalenge bwà bidimu cinunu ncifwànyikijilu cyà Noà ùbwela mu bwàtù, nè mwambula pamutù, kàdi's wàkaya nè Ham nè bakwàbò abu luseke lukwàbò. Nè mpèkaatù mwinè wàkapàtukila mu bwàtù amu. Nwamònu anyi?

144 Kàdi Henòkà, mutentèmùnyiiibwe awu, ùvwa cifwànyikijilu cyà Mukàji-musèla wàkabànda awu, kî ng'ewu wàkambwibwa pamutù pàà màyi awu to. Pa nàнку mpèkaatù neikalè ànu ku luseke lukwàbò lwà Bukalenge bwà bidimu cinunu alu, kàdi kî mmu Bukalenge bwà bidimu cinunu to. Nwamònu anyi? Mu Bukalenge bwà bidimu cinunu mùdi ditalala. Nwamònu anyi? Kàdi bwalu bwà mpèkaatù nebàbujikijè ku luseke lukwàbò lwà Bukalenge bwà bidimu cinunu alu, nè pashiishe cikondo necyènguluke.

145 Nènku mpindyewu, dikàngula dyà Bitampì Mwandamutekète byàkafidiibwà kùdi Nyumà Mwimpè abi, Bitampì Mwandamutekète bìvwa ànu bwà kumanyisha cyàkashiyàbo mu bipungu byà paanyimà pèètù abi.

146 Mpindyewu, ànu mwàkateeta mwena tèllòji munène kampànda bwà kumfinyina panshi pa bwalu abu, yèyè nè: "Mwanèètù Branham, wèwè. . . dîngà ditùkù Nzambi neakupè bwalu busokome bwà Bitampì Mwandamutekète abi. Bitampì Mwandamutekète abi nebiiikale cintu kampànda citùdi katùyiku banji kuyiilapù kantu to, nè neciikale cintu kampànda cidi kaciyi nànsha mu Bible to." To, to! Kabyàkwikala nàngu to, bwalu wèwè mwenze nàngu, aci ncifwànyine kucivwija. . . Mémè mukwambilè nàngu, ndi mufwànyine kwikala mupròfetà wa mashimi, bwalu (nudi numòna anyi?) Dìyi edi. . . Mwaba awu. . . Byònsò bidì—bidì. . . Dibuuulula dijimà dyà Yesù Kilistò ndikumbànàngàne ànu menemene mu Dìyi edi. Nwamònu anyi? Nènku piikalàbi nè Bitampì Mwandamutekète abi bìvwa bitàngila èkèleeziyà mwandamutekète ayi, bìvwa bikèngela bwà kwikalabi bimanè kupita, bwalu tudi mu Cikondo cyà Èkèleeziyà wa Laòdikiyà. Nènku Bitampì Mwandamutekète bìvwa ànu munkaci mwà dibuuulula byàkadibo bashiye kale wàwa, nènku byàkakàngula byàkadibo bashiye abi; cyàkashiyà Luther aci; cyàkashiyà Wesley aci; nè balongolodi bònsò abu, nè beena Mpenta, too nè ku cikondo cyà mpindyewu eci.

147 Mpindyewu, cintu cidi cìlondà cidi cishàala nditentemuniyibwa dyà Èkèleeziyà, dyalukila dyà Mòsà nè Eliyà, bukòokeshi bwà Bukalenge bwà bidimu cinunu pa buloba kùdi Mukàji-musèla nè Mubàki munda mwà bidimu cinunu, nè pashiishe Cibàsà cyà Cilumbulwidi, nè pashiishe dibutudiibwa dyà mu kaabujimà dyà mpèkaatù. Kàadyàkwikalaku kàbidì musangu awu to.

¹⁴⁸ Mpindyewu, kî...Kujika...Bitampì kabyàkajikijakù cikondo nànsha. Cikondo anyi mivù too nè ku paanyimà pàa Bukalenge bwà bidimu cinunu. To! Nekùtungunukè ànu nè kwikala cikondo too nè paanyimà pàa Bukalenge bwà bidimu cinunu.

340. Bukalenge bwà bidimu cinunu bùdi nè cyà dyenza nè bidimu cinunu abi anyi? Kî mbifwànyîne kwikala lukòngò lujimà anyi?

¹⁴⁹ To! Lukòngò lujimà lukòsa mu Bible lùdi bidimu makùmi ànaayi. Kàdi Bible mmwàmbè nè: “Nènku bàvwa nè mwoyi nè bàakakòòkeshà nè Kilistò bidimu cinunu.” Neciikalè bidimu cinunu pa buloba, bwalu bidimu cinunu pa buloba bìdi ànu bìbadiibwa bu cikondo cìmwè cyanààna, bwà mùdi Nzambì ùbipàlakaja, bu ditùkù òmwè. Bidimu cinunu pa buloba bìdi ànu ditùkù òmwè kùdi Nzambì, mùdi Nzambì ùbala bikondo. Mbanganyì bàdi bùmvwà aci mpindyewu?

¹⁵⁰ Pa nànkù, nditùkù dyà Nsabatù adi piikala Èkèleeziyà kàyì kàbìdi ùkwàta mudimu ùlwisha mpèkaatù to. Nè Sàtaanà mmuswikìibwe bwà ntàntà mukesè, bidimu cinunu cyanààna, bwalu bantu bèndè bònsò bàdi mu ifernò, nè byèndè... Èkèleeziyà udi pa buloba mmupikùdiibwe nè ùdi ànu mu Bwikadi bwà Kilistò amu, pa nànkù yèyè kèna nè cintu nànsha cìmwè cìdiye mwà kukwacilapù mudimu to. Pa nànkù, kî mmùnyòòlòlò to, bu mungàmbì, mùnyòòlòlò wà micì, mmùnyòòlòlò wà bwalu bukolè; yèyè kèna nè cintu nànsha cìmwè cìdiye mwà kwenza to. Kèna nè dikwàcisha anyi ditèkemena to, mwindile ànu dibìishiibwa dyà bantu bèndè; dîbà adi bàdi batàpùlùdiibwe bu mikòòkò nè mbùji.

341. Mukalenge-mukàji wa ku Sheba kàakalwa kùdi Solomò bwà kumwela diteeta—kumwela diteeta bwà yèyè mwine kudijandwila nè—nè dîna dyà Mukalenge òvwa bulelèlè Solomò anyi to? (Ncyèna ngèèla meeji nè ndi mucyùmvwè to. Anji indilaayibi.) Mukalenge-mukàji wa ku Sheba kàakalwa kùdi Solomò bwà kumwela diteeta bwà kujandula yèyè mwine nè dîna dyà Mukalenge òvwa Solomò anyi to? (Ncyèna—ncyèna pàmwàpa ngùmvwà elu nùnkù to. Ànu...Mfwilàayikù luse ànu bwà katancì kakesè cyanààna. Lekèlaayi ndùbalùlùlè.) Mukalenge-mukàji wa ku Sheba kàakalwa kùdi Solomò bwà kumwela diteeta bwà kudijandwila yèyè mwine nè dîna dyà Mukalenge òvwa Solomò anyi to?

¹⁵¹ To! Yèyè kàvwakù mwele diteeta bwà kujandula nè—nè Dîna dyà Nzambì òvwa n’Solomò to. Solomò òvwa mfùmù. Wàkalwa, è kwamba, yèyè—yèyè kwamba nè: “Bulelèlè Nzambì ùdi nè mfùmù Wèndè nè cisàmbà Cyèndè.” Nwamònu anyi? Wàkalwa nè wàkateeciibwa...Wàkateeta Solomò pa dipà dyèndè, bwalu yèyè òvwa nè bintu munda mwà mwoyi wèndè bivwà Solomò

mumubuulwile, byàkaleeja nè ùvwa mfùmù wa kùdì Nzambi pa buloba.

¹⁵² Nudi bavùlùke muntwamu, ngèèla meeji, mu—mu—mu . . . Kùvwaye mufùmìne, mu buloba bwà—bwà—bwà—bwà Sheba kwakafùminàye aku, bantu bàvwa mwà kulwa, nudi bamanyè's, nè—nè kulonda bwà bintu binène bìvwa munkaci mwà kwenzeka ebi, byà nè bàvwa nè Nzambi kuntwaku uvwa mulaabe mfùmù wabò, nè mu . . .mwàkadi mfùmù mulaabiibwe kùdì Nzambi. Ncyèna ngèèla meeji nè wàkadyàmbidila nè dìnà dyà Solòmò, anyì, dìnà dyà Nzambi òvwa Solòmò nànsha, bwalu bu byòbì nànkù, aci's cívwa cifwànyìne kumuvwija cyàkàbìdì mumpàngaanù. Nwamònu anyì? Pa nànkù, yèyè—yèyè's ùvwa mwà kwikala mwenze cyòci aci. Munda mwà mwoyi wèndè ùvwa mwà kwikala mudyàmbidile nè Nzambi ùvwa Solòmò, Solòmò ùvwa Nzambi, bwalu mukàjì awu ùvwa mumpàngaanù ànu kwìnè kwònsò aku. Kàdì pààkamubuulwilà Solòmò munsokòntù wà mu mwoyi wèndè, ku di—dipà dyà dijingulula; òvwa bawò bàbìikila, dibà adi nè, lungènyì. Wàkajingulula cyòci aci. Wàkamanya nè Nzambi ùvwa nè Solòmò, bwalu dibà adi . . . Bàvwa nè . . . Yèyè wàkajandula . . . Bu yèyè mwà kulwa nè cyòci aci mu meeji èndè . . .

¹⁵³ Bu—bu muntu ewu, mwedi wa lukonko ewu, yèyè ùkonka nè: “Wàkamanya dibà adi nè bulelèlè Solòmò . . . dìnà dyà Mukalenge òvwa bulelèlè Solòmò anyì?” Nwamònu's, Solòmò kàvwa Mukalenge to; ùvwa mujandwile aci kùdì bantu, bwalu bàvwa bakuukwila Yèhowàh, nè kùvwa mushèètè wà cipungidi munène awu, nè dipungila dinène, mu mushèètè wà—wà cipungidi mùvwa mèyì matùma à Mukalenge. Nè bàvwa mwà kwikala bàmulondele bwà Mukùnà wà Sinàayi nè myaba mishìilàngàne mùvwayi mwà kwikalangana amu. Nè pashìishe, ùvwa mwà kumòna nè Nzambi—nè Nzambi wa dipungila adi ùvwa munda mwà muntu ewu, bwalu yèyè ùvwa—yèyè ùvwa nè dijingulula òvwa ànu dyà Nzambi. Nwamònu anyì? Pa nànkù yèyè ùvwa mumanyè nè—nè Nzambi ùvwa mu Solòmò. Kàdì mpindyewu, bìvwa bifwànyìne kubadiibwa mùshindù awu bu mwedi wa lukonko mukonke nànkù's. Kàdì nè: “Yèyè ùvwakù mumanyè nè dìnà dyà Mukalenge òvwa bulelèlè Solòmò anyì?” Pàmwàpa kabàvwa bacifunde ànu mùshindù wùvwàbo bèèla meeji to. Nudi numòna anyì? Pa nànkù ndi ngèèla meeji nè pàmwàpa bàvwa mwà kwamba—kwamba nùnkù ewu nè: “Nè Mukalenge ùvwa munda mwà Solòmò.” Èyo, ncyà bushùwà ùvwamù. Bwalu pìikalàbi nè ke lukonko ndwòlò alu, cyà bushùwà! Ùvwa mumanyè Nzambi, bwalu wàkamba dìyì adi. Nè kàvwa mwà kukuukwila nzambi mukwàbò nànsha umwe to. Nènku ndi ngèèla meeji nè yèyè—yèyè wàkamba nè ùvwa misangu yònsò ànu mwà . . . Wàkamòna bwà cinyì . . . Wàkapanga mwà kweyela; kàvwa nè nkonko mishààle mu yèyè to. Solòmò wàkabuulula ànu cintu cyònsò mu kaabujimà, nè wàkamanya

nè Nzambi ùwva nendè.

342. Tuvwa —tuvwa basèlàngàne kùkaadi bidimu makùmi àbìdì nè cimwè kùdì tubàdì twà ditalala. Bìwva—bìwva cilèma anyi?

¹⁵⁴ Èyowà, bìwva cilèma bwà nwènù kwenza nànkù. Dibàkà mbwalu bwàbèndè bwà mu nzùbu wa Nzambi. Kàdì bu mùdìbì nè nudi basèlàngàne, dìbà dinùwvwa basèlàngàne bulelèlè ndyôdì edi: nudi basèlàngàne panùdì nwenzelangana malaya ewu nè ewu, panùdì nulayangana muntu nè mukwèndè nè nudi. . . nè nenwàngatanganè muntu nè mukwèndè. Tubàdì twà ditalala tudi ànu mwà kunùpèèsha mukàndà wà dinwànyishila, awu's mmukàndà wà mikenji, bwà nwènù kushààla pàmwè bu mulùme nè mukàjèndè bwà kwepuka dibanjijangana dyà mulùme nè mukàjì. Kàdì paùdì ulaya mwànà wa bakàjì ewu, nè ewu. . . wèwè ulaya mulùme awu nè newikale nè nsòmbelu wa lulamatu kùdiye, nè umwangata bwà kwikalayè bààyebè, dìbà adi ke dinùdì basèlàngàne. Nudi bavùlùke nè, ngàkacyùmvwija lumingu lushààle elu, ngèèla meeji nè bìwva nànkù. Nwamònu anyi? Paùdì ulaya mukàjì awu. Nwamònu anyi?

¹⁵⁵ Nànsha mene mu Bible wa kale—wa kale awu, bu muntu mulùme yèyè mubangile mushikankùndè, nè (s'nudi bamanyè mikenji pa bwalu abu. Mòna's, bìwva ànu cintu cimwècimwè nè masandi. Mmùvwàbì cyà bushùwà's!) pàvwàye ùlaya, ke cìvwàku.

¹⁵⁶ Lukonko lwàkeedibwa dikwàbò ditùkù nè: “Dishipa—dishipa—dishipa divwa ncintu cyôci cimwècimwè nè dishipa dyà dibàkà anyi?” Nwamònu anyi? Panùdì nunkonka nkonko ayi, balundà bàanyi, kanwèna bamanyè cidìbì bingenzèlè to. Ndi nè balundà bàabùngì basòmbè kaaba aka bàkaadi basèlàngàne misangu yìbìdì anyi yìsàtù. Nuvwakù bamanyè nè ndi ngàakula nè mwanàanyi mulela wa balùme sungasunga, Billy Paul anyi? Ndikù mufwànyine kwela Billy Paul paa nyimà anyi? Nànsha kakesè! Billy Paul wàkasèla mwànà mukesè wa bakàjì kampàndà, kàdì kulwayè kùndì, è kwambayè nè: “Papa, s'ndi muswè kusèlangana.”

¹⁵⁷ Mvwa munkaci mwà disukula kàshinyi kàanyi; mèmè nè: “Nkàtùkile apa nè macimbu we,” mèmè kutùngunuka ànu nè disukula kàshinyi kàanyi aku mùshindù awu.

Yèyè nè: “Ndi muswè kusèlangana.”

Mèmè nè: “Kaa, keba kwà kuya ndàaku,” mèmè kutùnguka ànu nè bìmvwa ngèza mùshindù awu. Kukùdimukayè è kulondelayè mamwèndè, nè mamwèndè kàdì kumuseka. Nudi bamanyè cyàkenzayè anyi? Kupàtukaye nè kànà kakesè kampàndà kaciikàle kàya mu kàlaasà kapwèkèlè nè kusèlanganabò. Twètù kushipa dibàkà adi, tatwèndè wà mwànà wa bakàjì ewu nè mèmè mwinè. Twètù kushipa dibàkà adi, kàdì's ùwva ànu musèlàngàne byà mwomùmwè. Yèyè's

mmwanàanyi wa balùme udi musòmbe kaaba aka munkaci mwà kunteeleja mpindyewu. Mpindyewu, aci's mmwòmò menemene.

158 Kulwayè kùndi nè mwànà wa bakàji udiyè nendè mpindyewu ewu, mukàj'-à-mwanàanyi. Mwikulwanyi wa balùme... Yèyè nè: "Papa udi muswè kunsèlesha anyi?"

159 Mémè nè: "Nànsha byà munyi." S'mmwanàanyi mulela wa balùme sungasunga. Nudi nwela meeji nè aci kacýèna cinsùnsulula tupese pàndi mvùluka nè mvwa ngènda nendè mwambula mu mabòkò nè ngèza cyònsò cimvwàku mwà kwenza aci, nè mémè mvwa byònsò bibidi kùdiye tatwèndè nè mamwèndè anyi? Nudi nwela meeji nè aci kacýèna cinshipa pàndi ncyàmba apu anyi? Kàdi's m'Bulelèlà. Cyà bushùwà's! Mwanàanyi wa balùme udi musòmbe apa munkaci mwà kuteeleja ewu... Mukàj'-à-mwanàanyi nè mwikulwanyi mukesè udi musòmbe apa mpindyewu ewu... Kàdi's ndi mumwambile nè mbibi (nwamònu anyi?), bwalu bidi bikèngela bwà mémè kwenza nànkù. Ndi muswikùbwe ku Dfyi adi.

160 Nènku ndi ngàmbe nè, mbanùsèlèshe kùdi nzuji wa tubàdi tukesè anyi? Bivwa bikèngela kunusèleshabò kùdi èkèleeziyà, kùdi mwambi. Ke cintu cyà kaneemu cyà dyenza bwà mwena Kilistò ncyòci aci. Kàdi bu mùdibi nè wèwè ukàadi mumanè kwenza mulayi awu, nè mucipù, nè basèlàngàne kùkaadi bidimu makùmi àbidi nè cimwè, ndi ngèela meeji nè bidi ànu bimpè.

Wèwè udi wamba nè: "Èè ndi..."

161 Lukonko ndufwanyiine kwikala nè: "Bivwa bikèngela bwà mémè kulwa kusèlangana cyàkàbidi anyi?" Pawikalà muswè. Kwikadi nè cintu nànsha cimwè mu meeji èbè cidi citàcishà diitabuuja dyèbè to, bwalu mwòmò mwikale cintu kampànda, kwèna mwà kulubuluka kutàmbe apu to; udi wimanyina ànu apu. Pàdi cikonkelu aci cilwà, ke mwaba wùdi ushìikila awu, ànu mwaba awu. Kàdi mpindyewu, bwanyi mbifwanyiine kwikala ànu bimpè.

162 Muntu wàkambàtiiza mu Dìna dyà Mukalenge Yesù Kilistò kamana-kamana wàkangiipata mu èkèleeziyà, bwalu ncivwa mwà kutwà ku cyèndè pa bwalu bwà bayiishi bakàji nànsha. Aci kacýàkamfikishakù ku dibàtijiibwa dyà cyàkàbidi to. Nwamònu anyi? Nànsha kakesè. Nwamònu anyi? Bidi ànu bimpè.

163 Kàdi vùlukàayi ànu nè, bintu ebi bidi munkaci mwa kuntàpa ku mwoyi. Ndi nè balundà bàanyi bàà katapula-katèeka mwab'ewu, balùme nè bakàji bàdi bafwanyiine kwangata byàbò...kutèeka byàbò...kutonkona mèsù ààbò nè kuàmpeèsha bu mémè mwà kubàlòmbawù (èyowà's, mukalenge!), wa bwalu mbasèlàngàne misangu yibidi, mingà misangu, misangu yisàtù, basòmbe mwab'ewu mpindyewu. Nè mwanàanyi mémè sungasunga wa balùme, mwikulwanyi sungasunga, wanyi mwikù... nè mukàj'-à-mwanàanyi úndi munangè...Tàngilàayi Billy, mùshindù mene wùmvwà

mushààle ku luseke lwèndè nè mùshindù mene wùdiye mushààle ku luseke lwànyi, kàdi bwà kwamba bulelèlà anyi bulelèlà, mbulelèlà bwà bulelèlà.

¹⁶⁴ Ndi nè. . . Ndi mufwànyine kupàtuka mwab'ewu leelù ewu nè kubìkila bàmwè bàà ku beena Assemblées de Dieu aba anyi bàmwè bàà ku bantu aba nè kubàmbila nè: “Ndi nè. . . Ndi. . . mvwa mu ntùpàkànyi kwònsò eku, ncyàkushààla nè Dìyì adi to, nènshaalè neenù.” Pàmwápa ndi mufwànyine kwikala muntu mumanyike bikolè menemene ànu mu cità nè cità nè dipà dyà Nzambì edi. Bwà kufila bwenzeji bwànyi bwònsò kùdi bùmwe bwà ku malongolodi awu, mvwa pàmwápa mufwànyine kupeta dìnà dinène munkaci mwàbò. Ncyèna ncyùka bwà dìnà dyànyi munkaci mwàbò to. Ndi mubànangè, aci's mbulelèlà. Kàdi bìdi bikèngela ngiikale mwambi wa bulelèlà. Ndi—ndi—ndi mufwànyine kwikala mwena lubombo bu mèmè mwà kwenza nànkù.

¹⁶⁵ Nè mvwa mufwànyine kwikala mwena lubombo bu mèmè mwà kwimana kaaba aka bwalu mwanàanyi mulela wa balùme sungasunga udi musòmbe apa ewu uvwa mulayè nsongàakàji awu, nè mèmè kwamba. . . Piiikalàbi—piiikalàbi nè kacya kabávwa bapicile ku musingà to, nànsha bu yéyè mene musòmbe nè mukàji awu, anyi mulààle nendè, nsongàakàji awu, anyi cyònsò civwàku aci, pààkenzayè ànu mucipù awu apu, ùdi musèlàngàne, ikalè Billy Paul anyi kiiikadi Billy Paul. Aci's mbulelèlà menemene's! Yéyè mmusèlàngàne ànu pàvwàye mwenze mulayi awu apu. Nànsha byòbì nè mmèmè, bìdi ànu byà mwomùmwe.

¹⁶⁶ Bikèngela twikale nè meeji matòòke. Mèmè nciyi mwà kwikala nè meeji matòòke kùdi mwanàanyi wa balùme to, ncyèna mwà kwikala nè meeji matòòke kunùdi to. Mèmè nciyi ne meeji matòòke kunùdi to, ncyàkwikala nè meeji matòòke kùdi Nzambì nànsha. Nè ndi muswè bwà nwitabuuje nè cìndi munwàmbile cidi mmwènenenu wanyi mwimpè wa meeji matòòke. Kanùdifwànyikijidikù cintu kampàndà cikwàbò ku cyòci eci nànsha, cyambaayi ànu mùshindù wùndi mucyàmbe ewu (nwamònu anyi?), bwalu nènswàmbilè Bulelèlà.

¹⁶⁷ Mpindyewu, ncitu nyiikila neenù bònsò mùshindù awu to misangu mivùle, bwalu nudi bàna bàanyi, mùndi nnùbìkila. Ndi munùlelèle Kilistò ku Èvànjeeliyò. Nè patùcidi bònsò pàmwe kaaba aka apa, ànu kasumbù kèètù twètù kasòmbe mwab'ewu, ndi—ndi nnukùngulakù mitù ndambù mukesè. Kàdi ndi muswè kunwambila nè: kàdi panùdi nulwa kùndi nunkonka cintu kampàndà, nènswàmbilè nè mwànyi mwònsò cyà citàmbe bwimpè cìndi pàanyi mumanyè's! Cyòci ciikale mu Dìyì, nànsha cyòci cìmpiiisha, ndi nè mapondu àbùngi àdi nè cyà kukungudiibwa kùndi. Menemene!

¹⁶⁸ Kàdi panùdi nunkonka cintu kampàndà, nènswàmbilè.

Mémè munwàmbilè cintu kampànda, nènnwambilè ànu Bulelèlà. Ntu misangu yònsò ànu nteeta kwikala nè nsòmbelu wa mùshindù awu. Mùshindù awu ke wùndi muswè kwikala nè mwoyi nè kufwà mùshindù awu, bwà kwikala nè meeji matòòke kùdi muntu kanà yònsò.

169 Mwànà mukèsè wa bakàji mmulwe kùndi ànu matùkù mashààla aa; mukàji neebè kèna kaaba aka mpindyewu to. Tom Simpson, bààbùngi bèènu mbamumanyè. Tom mmuntu wa maalù mimpè; nànsha umwe wa ku bantu bèndè kèna kaaba aka to. Ndi ngèèla meeji nè bantu bònsò abu mbaalùkile, ambà ànu Fred yèyè muciiakàle mwab'ewu. Ndi... Fred Sothmann, ncyèna mumanyè ní ùcidipù anyi to, kàdi ndi—ndi ngèèla meeji nè bàcidipù. Kàdi Tom Simpson, bóbò... yèyè mmufùmìne ku Canada nè—nè Fred. Nè bóbò... Nudi bamanyè Mwanèètù Fred, mulubuludi wetù.

170 Nè Mwanèètù Tom, bààbùngi bàà kunùdi mbamumanyè kaaba aka. Nè Tom's mmuntu wa maalù malenga; mmulùmýànà wa mwimpè be; nènku ke mùdi kàbidi Màndàmù Simpson. Bu yèyè ànu mwà kutèèlejaku cìndi mmwàmbila, yèyè pèndè neèndè cyàkàbidi. Nènku mmusòmbe mu dikalù dyà balèma adi mucibùkile panshi. Neèndè bu yèyè ànu mwà kwenza cìvwà cyambiibwe bwà kwenza aci. Kàdi tàngilàayi ànu cyanààna nùmonè ní kì ncilelèlà. Nwamònu anyi? Mpindyewu. Kàdi's bikèngela énzè cìvwàbo bamwambile bwà kwenza piikalàye ùzùka bwà kucyènza.

171 Nè umwe wa ku bânà bèndè bàà bakàji batekète, bânà bàà bakàji bàà kalolo... Mémè... Pàvwàbo ànu tuntu tukèsè menemene apu, Mvwa mwà kubàmbula pa cibelu cyànyì apa nè kunaya naabò. Mpindyewu's bàkaadi bakolè bikolè; bàkaadi bakàji bàà bamwèke aba, bàà mvùla dikùmi, dikùmi nè yìbidi. Ke pa nànkù, umwe wa kùdìbo kulwayè kùndi wàmba nè: "Mwanèètù Branham, mvwa mulòòte cilòòtà." Ki kundondelaye cilòòtà aci. Ke yèyè nè: "Aci cidi cyumvwija cinyi?"

Mémè nè: "Ncyèna mumanyè to, Munanga wanyì. Nènsambilè, nè bu Mukalenge mwà kucimpa, nènkwàmbilè."

172 Yèyè nè: "Èyo!" Ndambù wa matùkù kwalukilayè, kwambayè nè: "Wàpecì cilòòtà aci anyi?"

Mémè nè: "To, Munanga wanyì, ncyèna mucipetè to; Yèyè kí mmucimbuulwile nànsha."

173 Paanyimà pàà bu lumingu lujimà anyi mbingu yìbidi nànkù awu kwalukilayè, wàmba nè: "Mwanèètù Branham, udi wàmba munyì bwà cilòòtà aci?"

Mémè nè: "Ncyèna mumanyè to." Èè, mbyenzè ànu bu nè ùvwa bu mutekèshìlbwe mu mabòkò's. Mémè... .

174 Nudi bavùlùke nè, panùdi nunkonka bwà mémè kunwàmbila cintu kampànda, nè nciyi ncipeta kùdi Mukalenge to, mémè

pàányi ndi ntekeshiibwa mu mabòkò. Kàdi ncyàkwikala mwena lubombo, anyi mwena mashimi to, nènnwambilè bulelèlè. Yéye mwà kungambila, nènnwāmbilè; Yéyè kàyi mungambile to, ncyàkwamba to. Ke cyònsò cìndì mwà kwenza aci. Nènku ndi muswè nungitabùùjè mùshindù awu.

¹⁷⁵ Nènku mpindyewu, mèmè kudyambidila nè mvwa mumanye civwà cilòòtà aci ciswa kwamba mu meeji àànyì, kàdi ngaamanyì bishi. Bikèngela mmòne cintu aci cyàkàbidì. Nè muntu nànsha umwe wa kunùdi kèna mwà kufunkuna munu pa dībà nànsha dimwè anyi mwaba nànsha ùmwè, ùnkaadiku munwāmbile dyumvwija dyà cilòòtà mu Dìna dyà Mukalenge civwà kaciyi ànu mùshindù awu menemene to. Eyowà's, mukalenge! Kacya ncitukù munwāmbile cintu kampàndà mu Dìna dyà Mukalenge citù kaciyi cyenzèke kàbidì to, ànu mùshindù awu, bwalu ndi—ndi. . . N'Yéyè. Nènku dībà adi kí mbujitu bwànyì mèmè to, n'Yéyè; mbujitu Bwèndè.

¹⁷⁶ Mèmè nè: “Tàngilà, Trudy, amba tǔng bu twètù tuya ku Arizona. Kàdi bu—bu mèmè mwà kulwa kukwambila nè paùdì mupàtuke kuntwaku, ‘EMU MMÜDÌ MUKALENGE WAMBABA, mwakùnyèbè wa balùme neikalè. . .’? Johnny mwànà awu, ùntù nyobola bwà mùdiye nè difù dyèndè bwàshì dībà dyònsò.” Mèmè nè: “Ambabi tǔng bu bóbò mwà kumudyata ku màshinyi mu mùsèsù? Ke mèmè kwamba nè: ‘Udi mumanye ciikalà mwà kwenzeka anyi? Nebàmudyatè ku màshinyi mu mùsèsù.’ Nènku ukàadi wenda useemena kùndì, nè—nè newikalè mwà kwamba nè: ‘Mwanèètù Branham. . .’ ‘Ndàaku, ùye nendè kùdì Mwanèètù Branham,’ èyowà's wè. Nè pashìishe nèye wenda ukèbangana naanyì, nè nèunsanganè mwimàne pa bibàndilu, ngàakula nè muntu muvwàle nkooci mutòòke. Nè pashìishe nèntentekele Johnny mwànà awu byanza; yéyè nealukilè ku mwoyi cyàkàbidì nè kunyeamakana lùbilu.”

Mpindyewu, yéyè nè: “Pashìishe upàtuke ùye ku Wesètè, nènkù katancì aka, dǐngà ditùkù udi umvwa mamwèbè wela mbilà mikolè, tatwèbè wèlā mbilà mikolè, nè utàngila, nè Johnny mwànà mmudyata ku màshinyi. Ncinyi cyùdì mufwànyine kwenza?” Nwamònu anyi? Udi ungiitabuuja mèmè. Nwamònu anyi? Nènku ndi muswè wikale naanyì dyyemena. Ncyàkwambila cintu nànsha cimwè ànu ku dicinka to; nènkwambile bulelèlè, cyanàànà ncyèna ngamba cintu nànsha cimwè. Kì mèmè kwamba nè: “Pashìishe ulwa kùndì wamba nè: ‘Kaa, Johnny mwànà. . .’ Anyi, ulwa kùdì mamwèbè, ‘Kaa, Johnny mwànà mmuzaaza ku màshinyi. Mmufwè! Mmufwè!’”

¹⁷⁷ “Ngàngàbukà ùlwa, ùmubuulula mèsù, ùkenketa mwoyi wèndè, mweyelu wèndè. ‘Mmufwè. Ndàayi nendè ku nzùbù wa bitàlù.’”

“Cyùdì mufwànyine kwenza ncinyi? Newāmbè nè: ‘Indilā ànu kakesè! Indilā ànu kakesè! Nèmmwambule mu mabòkò

àànyì; tubange kwenda.” Amen!

“Uyaaya kwepi, Trudy?”

“Ncyêna mumanyè to.”

“Cyûdi naaci ncinyi? Udi nè mwakùnyèèbè mufwè awu mu mabòko. Túngunukà wèwè ànu nè kwenda kupweka nè müsèèsù. Bantu bàdi bamba nè: ‘Mwànà wa bakàji wàwa mmupàle anyi?’ To, mukalenge!” Yèyè ùdi nè EMU MMÛDÌ MUKALENGE WÀMBA. Cìikalà mwà kwenzeka ncinyi?

¹⁷⁸ “Katanci aka anyi, wambila tatwèbè nè mamwèbè nè: ‘Indilaayi, netùsangane Mwanèètù Branham. Yèyè neikale mwimàne pa bibàndilu ùyiikila nè muntu mulwàte nkooci mutòòke. S’ki yèyè awu mwimàne mwaba awu mene. Tàngilàayi nùmonè cidi cyènzeka.’ Kakùyi mpatà mu meeji èbè to. Ubanda mwaba awu wamba nè: ‘Mwanèètù Branham, udi mumanyè cyúvwà mungambile anyi?’”

“Èyowà’s, Trudy. ‘Johnny, biika!’” Ûtùpika wàsa lwendu ùpweka nè müsèèsù.

¹⁷⁹ “Kàdi ambàbi tǔng bu mèmè ànu mwà kukwambila bintu kampàndà ku didicinkila bìndi ngèèla meeji nè mbilelèlè, nè kukwambila mu mùshindù awu, EMU MMÛDÌ MUKALENGE WÀMBA, nè cyôci ciinè kaciyi cyà bushùwà to, nè kaciyi cyènzeka to, kaciyi cyènzekakù to; dîbà adi udi mufwànyine kuumvwa bwôwà bwà lufù lwà mwànà mukesè wa balùme awu. Kwèna mufwànyine kumanya nè neùlwe nendè anyi to.”

¹⁸⁰ Nzambi ngudi muntùme mwaba ewu bwà kunùkwàcisha, nè ndi muswè kwikala dikwàcisha kunùdi. Nènkù nànsa cyôci cìtapa, cìtapa ku mwoyi anyi ní ncinyi cyônso, bikèngela ncyàmbè nànsa bishi.

¹⁸¹ Kàdi mpindyewu mu bwalu bwà dibàkà nè dishipa dyà dibàkà, ndi munùlòmbe bu mwanèènù wa balùme, shààlaayi nè ditalala too nè panwànguumvwa. Nùmvù anyi? Túngunukaayi ànu nè kwikala nè mwoyi ànu mwènù nè kale. (Ndi ngàngata dîbà dipitepìte búngì kuntwaku.)

¹⁸² “Tuvwa basèlàngàne kùkaadi bidimu makùmi àbìdì nè cìmwè (èyowà) . . . tubàdì twà ditalala.” Mwanèètù wa bakàji munanga, Mwanèètù wa balùme munanga, musangu kampàndà ngèndàmùshìngà kampàndà ùvwa ùndondela nè wàkabwela mu èkèleeziyà kampàndà (ùvwa mwena Kilistò) lwà mu Connecticut mwàmwa anyi mwaba kampàndà kuntwaku, èkèleeziyà munène menemene, kubwelayè ànu bwà kusambila. Kacivwa . . . Yèyè ùvwa mwena Mpenta to, kàdi wàkabwelamù bwà kusambila. Ki yèyè nè pààkabwelàye muntwamu nè kutwàye binù mu èkèleeziyà bwà kusambila . . . kwamba mùvwàye wènda ùya, ùvwa mucyòke, mùmvwè cisà, yèyè’s ngèndàmùshìngà, nè ùtu wenda ùsùmbisha bintu, nè kwambayè nè ùvwa . . . ùsùmbisha ku byàpù. Kàdi kubwelayè muntwamu bwà—bwà kusùmbaku

bintu kampàndà anyi cintu kampàndà, nè pashiishe kupicilayè ku èkèleeziyà awu, kudyàmbidila nè: “Nénye. . . Ngèèla meeji nè nêmbwelè bwà kusambila.” Ciibi ncyèci bwâshi; yêyè nè kubwelayè. Kààkatèèlejamù muntu mukwàbò, ke kutwàye binù panshì nè kukùtula disambila. Paanyimà pàà yêyè mumanè kusambila mwaba awu, kushààlayè bu dibà dijimà nàнку awu, kwambayè nè, dyàkàmwè kuumvwayè biibi kampàndà bidituuta anyi cintu kampàndà; kudyàmbidilayè nè ùvwa mulami wa citanda anyi cintu kampàndà wa èkèleeziyà awu. Yêyè nè, paanyimà pàà katancì yêyè kumòna, ke kulwakù. . . Yêyè kuumvwa muntu kampàndà wàkula. Kudifindayè kuntwaku nè kutàngila, kàdi kukènzakanayè bwà kumòna ní ùvwa mmulami wa èkèleeziyà. Ùvwa mmuntu mulùme nè mukàji biimanè kumpàlà kwà cyoshelu bakwàtàngàne ku cyanza muntu nè mukwèndè, bàmba nè: “Ndi nkwangata, munanga wanyì, bwà wikalà mukàjàànyì wa dibàkà wa lulamatu.” Nwamònu anyi?

Mukàji nè: “Ndi nkwangata, munanga wanyì, bwà kwikala bààanyì wa dibàkà dyà lulamatu.”

“Mòna’s,” mwàkambàye, “eci’s ncintu cikolè mwà kucyùmva,” yêyè nè, mwena Mpenta ewu, yêyè nè: “mulùme ewu nè mukàji bàsèlangana kabàyi nè muyiishi to.” Nwamònu anyi? Ke pa nàнку kusòmbayè panshì nè kwindilayè; nè paanyimà bôbò bamanè kwenza malaya àbò bwà kwikalabo nè lulamatu muntu kùdi mukwèndè, ànu lufù ke lùvwà lufwànyine kubàtápulula, kwelanganabo mabòkò kunshìngù, kutwàngana mishìku, kukùdimuka nè kwasa lwendu bàpàtuka bènda bàtwa ndimwemwe. Yêyè nè: “Anjì indila kakesè!” Yêyè nè: “Mémè ndikù bu ndi nsunsuma bwà kumanya cintu kampàndà; ndi mwenyi.” Yêyè nè: “Nwènu bônso nudi baselangane?”

Bôbò nè: “Èyowà’s!”

“Kakùyi muyiishi?”

Yêyè nè: “To!” Yêyè nè: “Tudi basèlangàne kùkaadi bidimu makùmi ànaayi.” Yêyè nè: “Tudi basèlangane mwab’ewu mene ku cyoshelu eku kùkaadi bidimu makùmi ànaayi, nènku cidimu cyònsò tutu twalukila nè twenzulula malaya ètù mapyamàpyà.” Aci’s mmeeji mîmpè. Nwamònu anyi?

¹⁸³ Kàdi bwà kwikala basèlangàna, paùdi umulaya, yêyè ùdi wàngata dîyi dyèbè; udi wàngata dîyi dyèndè; nè Nzambì ùdi ùnukwàta ku dîyi dyènu bônso. Nwamònu anyi? Kàdi kùlayikù ànu wèwè. . . [Katùpà kàà mukàbà wà mèyi munda mutupù—Muf.]

343. Pàdibo bàcikòsa mu. . .Nsukì mmile—mmile pàdiyi mikòsa mumpàlà anyi? (Mpindyewu, anjì indilaayi kakesè, ngànji ngàngatè elu nùнку.) **Nsukì mmile pàdibo. . .**

¹⁸⁴ Èè, ndi—ndi. . .Pàmwàpa mbaswè kwamba nùнку ewu: “Nsukì mile yìcidi ànu mile pàdiyi mikòsa lwà mumpàlà anyi?” Kayicyèna kàbìdi mile to, mmikòsa. Nwamònu anyi? Kàdi ànu

bu muntu uvwa nè mùpanù mukòsa misangu yisàtù awu kàdi mucikale ànu mwipi bikolè. Wamba nè? Wamba nè? [Muntu kampàndà ùdi wàkula nè Mwanèètù Branham—Muf.] Kaa, ke cidibo munkaci mwà kwakula aci. Ànu muntù nyòbola mwanàanyi mutekete wa bakàji, yèyè kwamba. . . Mèmè ntu mbibikila nè “bisuba” abi, nudi bamanyè’s, myalala yà nsukì, anyi ní ncinyi cyònsò cidiku aci, nudi bamanyè’s, mipicile lwà mumpàla emu.

¹⁸⁵ Èè, ndi ndifwànyikijila bânà bakesè abu bàdì bàkòsela yàbò mumpàlà. . . Wèwè, pàmwàpa mamwèbè ùvwa mwà kukwambilaci, wamònu’s, yèyè muswè bwà wèwè kwenza mùshindù awu. Ngèèla meeji nè mbifwànyine kumwèka ndambù mukesè bu—bu mukàji kampàndà uvwa munkaci mwà kutàngidila mu lumwènù lwà mashinyi luleji-lwà paanyimà yèyè ùkaadi mupicishe pa bidimu makùmi àbìdì nè bitaanu nè muswè bwà kuyikòsela mumpàla mùshindù ewu, ùmwènèka bu mwànà kampàndà mukesè. Tàngilà kùnweku kúyaayà aku, yàayà, kí nkúvwà usanganyiibwa to. Nwamònu anyi?

¹⁸⁶ Nè mpindyewu, kàdi kukosa nsukì, nê—nê—nê—nènnwambilè eci. Ncyèna mwà—ncyèna—ncyèna nè Mufundu nànsha wùmwe—nànsha wùmwe bwà kwamba nè udi mwà kuyikòsa ndambù kàdi kùyi mwà kukosa mikwàbò to. Ncyèna—ncyèna nè Mufundu bwà cyòci aci to, ncyèna—ncyèna mwà kunwambila aci to, mwanèètù wa bakàji, anyi mwanèètù wa balume, nànsha yèyè mwikale nganyi.

¹⁸⁷ Ndi ngamba cintu cimwèpelè. Mvwa njinga. . . Mpindyewu, ndi mumanyè nè bânà bàanyi bàkaadi benzè cyòci aci kàbìdì, Leebèkà nè Sarah, ngàkamòna pàakakosabo nsukì yàbò lwà mumpàla emu, nè kuyèza bipya kuyituma paanyimà apa mu dikoshi, nè kwenza bintu ebi bipicila mumpàla emu, nunku ewu. Ncyèna—ncyèna, ncyèna—ncyèna. . . Mpindyewu, ncyèna mbèèla paanyimà to. Nwamònu anyi? To, mukalenge! Bwànyì mèmè, mvwa kujinga bwà kabàyi mene kulengessa kashoolà mu nsukì yàbò ayi tp nànsha kakesè. Kàdi pàdìbo naayi yònsò mile, milembèlèlè mùshindù ewu, kàdi bàkòsa ànu mumpàla mwàyì lwà mwisù mwàbò, bânà bakesè nè. . . Ncyèna—ncyèna mufwànyine kumanya nè mbifwànyine kwikala. . . ? . . . Ncyèna mufwànyine kwela meeji nànkù to. Nwamònu anyi? Ndi. . . kàdi panùdì nupeta. . . Bu nwènù mwà kucyèza, ndi. . . bwènù nwènù bânà bèètù bàà bakàji, ndi mufwànyine ànu kuyilekela mùdì Mukalenge muyènzè amu. Nwamònu anyi?

¹⁸⁸ Nè mu bushùwà bwà bwalu, ndi mumanyè nè bakàji mbaswè kumwènèka balenga; aci’s mbufùki, nè aci—aci’s ke cìvwà cikèngelà bóbò kwikala. Nwamònu anyi? Bivwa bikèngela kwikalabo mùshindù awu. Nè pa nànkù, abi’s mbimpè, kàdi kwikadi ànu—kwikadi. . . mu ngakwilù mukwàbò nè, kúfwànyanganyi nè bàà pa buloba to (nwamònu anyi?); kutentudikù bàà pa buloba to. Bintu bibi. . . Udi muswè

kuyikòsa, mùshindù awu, kàdi mpindyewu kùkòshi nsuki yèbè to. Wèwè nè bipya bilembèlèlè, anyi—anyi nè ncinyi cyònsò cìdì mu nsuki yèbè, wèwè yilekèlè ànu mile. Kùyikòshikù mu mùshindù wà yifwànangana nè bàà pa buloba. Panwikalà ànu bàà bakesè bàà bakàjì aba. . .

¹⁸⁹ Taatù wanyi mukwàbò ùvwa nè mwànà mukesè wa bakàjì mu—mu New York mwàmwa. Ùvwa nè nsuki yà mitàmbe bulenga. Yìvwa bu yà mifìkùlùke bikolè nè yèyè ùvwa ùyènza bipya. . . Maamù wanyi ùvwa mukùmbàne bwà. . . Bipya byèndè abi bimutwà paanyimà apa too nè mu binù. Nènkù mwànà wa bakàjì mukesè ewu ùvwa nè bipya byà mùshindù awu kàbìdì; dyèndè ùvwa Jacqueline. Nènkù ùvwa musaamune citùpà cyàyì muyìpwekeshè nùnkù ewu nè muyikòse nùnkù ewu. Nènkù mvwa. . . Kùkaadi bidimu bitwè ku dikùmi nè bitaanu, anyi dikùmi nè mwandamukùlù, anyi makùmi àbìdì. Nènkù mvwa nè ciibidilu cyà kudikonka nè, mbwà cinyi kàvwa ànu ùyisaamuna yònsò nkòngò ùyìpingaja paanyimà, nùnkù's yìvwa milenga kumòna kutàmba kwikala naayi mùshindù awu, mimulembèlèlè bu mùdì baaMùyàpàndì bàà cyena-leelù aba naayi matùkù atùdì nè mwoyi aa, nudi bamanyè's. Nènkù. . . Kaa, ncyà bushùwà, ncyèna ngèèla meeji nè ndi mufwànyine kucyènza to. Cintu cyònsò cìdì cifwànàngàne nè baaMùyàpàndì abu, bàdì bàmwèka bu nè kí mbàà pa buloba ebu to, nànkù lekèlè. . . cilekèlaayi ànu mùdìci amu. Èyowà's wè!

344. Mémè nè bàyaanyi katwèna nè mmwènenu mufwànàngàne pa Bible to, Malelèlè, bu mùdì Bulelèlè bùdì uyiisha ebu. Yèyè kèna ùmvwa to. Bìvwa bìkèngela bwà mémè kuya nendè mu maèkèleeziyà pàndì nciyi ngiitabuuja dilongesha dyàbò adì anyi? Ndi nè lutàtù lwàbùngi pa bwalu ebu.

¹⁹⁰ Èyowà! Wèwè mwikàlè mukàjì wa mulùme ewu, nè yèyè kàyì ùkupiisha to, kwèna—kwèna nè cyà kumupiisha to (nwamònu anyi?), bwalu mulùme mmujidìibwe kùdì mukàjèndè. Nwamònu anyi? Nènkù ndi ngèèla meeji nè, yèyè ùya ku èkèleeziyà kampàndà wa cyena-màngumba anyi cintu kampàndà bu nànkù awu, yèyè muswè bwà wèwè kuyamù nendè. . . Nudi numòna anyi? Wèwè kùyì mwikàlè. . . Wamònu's, kakwèna cintu nànsha cimwè cìdì mwà kukwenzela bibi to, bwalu wèwè kwenà uya bwà kutèleja cidìbo bàmba aci to wèwè mwine, bwalu s'udi mwàmbè mwab'ewu nè kwenà witabuuja dilongesha dyàbò adì nànsha. Nwamònu anyi? Pa nànkù kayàkukwenzela bwalu to, kàdi udi ànu uleeja kaneemu kùdì bàyeebè. Wèwè udi udilekelela kùdiye, nè pàmwàpa mu kwenza kwà nànkù, wèwè—wèwè newikàlè. . . Bòbò bàlongesha nè bènza bintu kuntwaku. . . Wèwè's udi mulongeshiibwe maalu matùmbùke bikolè kutàmba abi; newikalè mutwè mukèlè bikolè; yèyè neàmòne nè nealwe kùdì Mukalenge. Ndi ngèèla meeji nè ndi ànu mwà kuya. Nzambì wanyi, tàngilàayi mpindyewu dìbà ditùdì's!

345. Zekàayi 4 nè Bwàkabuulwibwà 11.3-12, ùdì wàkula bwà

muntu umwèumwè awu anyi? Mònaayi Zekàayi 4.12-14 nè Bwàkabuulwibwà 11.4. Mbafùndekù dìnà dyàbò, mwanèètù wa balùme nè mwanèètù wa bakàjì bàà mu èkèleeziyà ewu.

¹⁹¹ Tùmonèbi, Zekàayi 4. Kaa, èyowà's, ke micì yà olèvà yibìdì ayi. Eyo, micì yibìdì yà olèvà ayi nè Bwàkabuulwibwà 11 bidì . . . Kaa, èyowà's, s'ki cyòci aci. Cintu cimwècimwè aci. Mbùbidì bwàbò's. Aci—aci's—cidi m'Mòsà nè Eliyà, micì yà olèvà yibìdì ayi.

Wàsambidilakù wetù . . . Aci's ndilòmba dyà disambila.

Numfwilaayiku luse, eci ncyèna mwà kucibala kumpàlà kwà . . . Ncitàngile malanda à mu dikù. Eyowà, tèeka aci pàmwè nè cikwàbò aci. Ncyèna mwà kubala aci kumpàlà kwà bantu nànsha. Abi bìdì mu muyiikì wà paa nkàayawù wà bàbidì byòbi biine, nànkù—nànkù . . .

346. Mwanèètù Branham, mbibì bwà—bwà . . . (Eci cidi cyàmba cinyi? Bibì bwà *cinyi*? mu dyàlumingu? Kwenza mudimu anyi?) **Mbibì bwà kwenza mudimu mu dyàlumingu anyi?**

¹⁹² Ndi mfùma ku dicyùmvwija. Ngombe yèyè ùsanganyiibwa mu ciinà, mupàtùle, kàdi kumusàkidi mu ciinà ànu bwà kumupàtula mu dyàlumingu to!

Mwanèètù Branham, nèuyiishè mwab'ewu mu dyàlumingu dilwalwà edi anyi?

¹⁹³ Aci's cidi ànu ndukonko cyanààna. To, Mwanèètù wa bakàjì, Mwanèètù wa balùme, nànsha yèyè mwikàle nganyì. Mpindyewu, eyi nyìvwà ànu yimwè yìvwà yìsanganyiibwa mwaba ewu. Mvwa nè cyà kwikala muyishye—muyishyè, anyi muntu kampàndà muyèle mu dibùki amu.

Mwanèètù . . . Eci mbwèbè wèwè, Mwanèètù Capps. “Udikù mwà kwimba: *Katwàkukùlakaja To* anyi?” Ndi nè cyà kwikala naalu mu . . . Ndi nè ndambù wa mikwàbò ayi micyòmpakaja.

347. Mwanèètù Branham, muntu kampàndà mmuswè bwà kumanya nè mbwà cinyi kùvwa (m-u-t- . . .) mutèèdùbwe mu Bible. Ndi ngitàbuuja nè wèwè udi Habàkùkà 2.1-4. (Angata aci, Mwanèètù Neville, Habàkùbà 2.1-4) **Bàbalekù bwalu ebu nè bàbùlonge, nshapità mwi3 . . . ngèèla meeji nè dìnà nè bifwànyikijilu byà nshapità yìnaayi ayi, ngèèla meeji—ndi ngèèla meeji nè ngwèwè.**

¹⁹⁴ Mpindyewu, pàdiye wènda ùkèbangana naaci apu, cidi mmu Habàkùkà 2.1-4. Mwanèètù wa balùme anyi Mwanèètù wa bakàjì, yònsò udi mwèlè lukonko elu awu (kakwèna dìnà to), abi mbimpè, ndi—ndi muswè bwà nwènù kukonka bintu abi. Ndi mmanya cidi pa mwoyi wènù (nwamònu anyi?), nènku dìbà adi nènkwàmbilè. To. Nwamònu anyi? Kabìvwa bifwànyine kukèngela bwà wèwè kwikala nè dìnà dyèbè mu Bible to, nwamònu's. Kàdi, nudi numòna's, bu mùdibi ànu nè wèwè udi

mu Bible, kùdi . . . Paùdi ànu munda mwà Kilstò, udi mu Bible; udi munda Mwèndè, nudi numòna's, mu Bible. Nwamònu anyi? Paùdi ànu wèwè munda mwà Kilstò, díbà adi udi mu kaabujimà kàà Bible. Nwamònu anyi? Wèwè udi mu mwaba wèbè mujimà awu paùdi munda mwà Kilstò. Bónsò mbúmvwè aci anyi?

¹⁹⁵ Wámupecì anyi, Mwanèètù Neville? Cinyi? Èyowà. Habàkùkà—Habàkùkà . . . Ncyèna mumubalè to. Elu lùvwa ànu lutèèkùibwe ànu mwómò emu, ngèèla meeji, mu dindà emu. Habàkùkà 2.1-4. Ki cyòci aci. Habàkùkà 2—Habàkùkà 2, nè ku 1 too nè ku 4:

Nèngìmanè pa cibùmbà, nènku ndishìkikèku pa kàleyì, nènku nnéntàngile bwà kumòna cùikalàye mwà kungambila, nè cingùkalà mwà kwandamuna ndi—ndi . . . pàndì mudyùdùbwe.

Nènku MUKALENGE kungandamuna, è kwamba nè: Fùnda cìkèèná-kumòna, cìfunde citòòkesha pa mabwe, bwà wácibala wàmòna mwà kunyeema.

Bwalu cìkèèná-kumòna cìcìdi ànu bwà cikondo kampàndà cimana kulongolola, kàdi ku ndekeelu necyàkulè, nè kacýàkushima to: nànsha cyòci cijàngulùke, wèwè cindile; bwalu mèmè nèndwe bushùwà, nè ncyàdyàkujànguluka to.

Mònaayi, musùùkà wèndè ùdi mudìbàndìshe awu kì mmujaaràme munda mwèndè to, kàdi mwakàne nèikale nè mwoyi ku diitabuuya dyèndè.

¹⁹⁶ Èè, mpindyewu, ndi—ndi mwà kudifwànyikijila muntu munanga udi mukonke eci ewu . . . Nudi numòna anyi? Mmuntu kampànda udi munnangè, cyanààna kàvwa mmufwànyine kufùnda aci to. Nwamònu anyi? Mpindyewu, ncyèna mufwànyine kwamba nè wanyì . . . Bible kèna ùtèèla dínà dyànyì—dínà dyànyì nè, *William Branham* to, anyi kutèèla dínà dyèbè nànsha wèwè mwikale nganyì to, kàdi tudi ànu munda Mwèndè's. Nènku ebi . . .

¹⁹⁷ Nènku mpindyewu, nudi numòna myaba yà ciibidilu yà kuleedila, mu Bible, yìdi yàmba bintu kampànda. Nudi numòna anyi? Mpindyewu, bu nwènù mwà kutàngila, maalu-malonda àdi ènzekula mu Bible. Nwamònu anyi? Mpindyewu, twànjàayi ànu kunùpèèsha Mufùndu bwà muntu kampànda mpindyewu. (Ndi mmòna bààbùngì bàà kunùdi bàcìfùnda.) Mpindyewu, mu nshapità mwi3 wa Maatàayi Munsantu, mMwámbe nè: “Nènku pàakabiikilà Nzambi Mwan'Èndè bwà kupàtuka mu Èjiipitù bwà cyàkaakulàbo aci cyàmòna mwà kuula nè: ‘Ndi mubiikile Mwan'Àanyi Mu Èjiipitù . . .’” Mpindyewu, wèwè nè—nè Scofield anyi Bible mukwàbò kanà yònsò wa dileedila ewu, wèwè mwà kulonda dileedila adi mwaba awu, mulongo wà méyi à kumpengà kwà dibèji awu, nebàkwàluje kale mwaba wàkabiikilàYe Yakòbò, Izàlèèlà awu, pambèlù pàà

Èjiipitù. Nwamònu anyi? Kàdi Yakòbò ùvwa mwan'Èndè wàkabiikilaYè bwà kupátuka mu Èjiipitù awu; nè Yesù kàbìdì ùvwa Mwan'Èndè wakabiikilaYè pambèlù pàà Èjiipitù. Nànkù (nwamònu anyi?) Dìyì dyà Nzambi kadyènakù nè ndekeelu to. Nwamònu's, tudì tudifwànyikija twètù biinè mu Bible nè bashiilàngàne. . . Mbanganyì bàdì bavùlùke mukenji wànyì pa didifwànyikija nè ngiikàdìlù ya bwena Kilistò, mu Phoenix, mu Arizona, mùndì muciyiishe? Eyo, bààbùngì bèènu mbawùpete pa mukàbà wà mèyì. Nwamònu anyi? *Mufwànyikijùbwe nè Ngikàdìlù wa bwena Kilistò.* Nwamònu anyi? Udi mwà kudifwànyikija mwaba wònsò wùdì muswè mu Mfùndu awu pawikalà mwena Kilistò, nè pawikala kùyì mwena Kilistò to, udi mwà kudifwànyikija mu Bible. Nwamònu anyi? Pa nànkù ndi ngèèla meeji nè pàmwàpa aci ncifwànyine kukwàcisha. Ndi muswè kwangata yàbùngì yà ku yòyì eyi nè mwànyì mwònsò.

348. Mwanèètù Branham, bàmwè bàdì bàmba nè luse lùkaadi lujikè nè muntu nànsha umwe kèna mwà kusùngidiibwakù to. Mpindyewu, eci ncilelèlà anyi? (Ndi nè disànkà dyà mùndì mupetè elu nùnkù.) Tudi tutàngila nè tusambila. . . Tudi tutàngila milongo yà babèèdì, nè mbimwèke ànu bu nè bàmwè bàcìdì ànu bàpeta luse.

Mpindyewu, ke lukonko lwà kumpàlà ndwòlò alu, udi nè yìbìdì.

¹⁹⁸ “Luse lùkaadi lujikè anyi?” Kanwèdikù meeji awu to! Nwamònu anyi? Tùngunuka wèwè ànu nè kwenza cyònsò cyùdì pèèbè mwà kwenza aci too nè pawikala muumùshùbwe. Nwamònu anyi?

¹⁹⁹ “Tudi tumòna mu mulongo wà babèèdì bàmwè bàpeta luse.” Bushùwà's! Luse, biibi bìdì bwàshì. Nwamònu anyi? Ndi ngèèla meeji nè mwaba wùdì mupetèle eci, meeji aa mmawànyine kwikala pankaci pàà. . . Nwamònu's, ncyèna nè dìbà dyà kupèèsha ònsò wà ku Mifùndu eyi kaaba kààyì kajaalàme to, (nudi numòna anyi?), cyònsò cyà ku bintu ebi cìdì nè kaaba kààcì kàà cyà bushùwà. Bòbò. . . Mu mulongo wà babèèdì nudi nusangana luse, cyà bushùwà.

²⁰⁰ Bu mèmè mumanýè nè Yesù ùvwa ùlwa mu mapingaja emu, mvwa mwà kwikala ngèna ànu cintu cìndì munkaci mwà kwenza mpindyewu mene eci (nwamònu anyi?), mutùngùnùke ànu nè kuya mutàngile kumpàlà. Luse lùtu misangu yònsò ànu lùkàngùdìbwe. Nwamònu anyi?

²⁰¹ Nènku mpindyewu, mwaba wùndì ngèèla meeji nè nudi nucyùmvwa, cìdì pabwìpì nè dijikija dyà Bikondo Mwandamutekète byà Èkèleeziyà nè Bitampì Mwandamutekète biikàle bilamunyiibwa. Nwamònu anyi? Bitampì Mwandamutekète, bìdì bimwènèsha bìdì byènzeka bìdì nè. . . bìdì byènzèke. Cikondo cyà Mwandamutekète cyà Èkèleeziyà, tukaàdì ku ndekeelu kwà Cikondo cyà

Mwandamutekète cyà Èkèleeziyà. Pândi ngàmba nè *ndekeelu*, kî mbwena kwamba nè mpa díbà mene edi, kasunsa aka mene to. Nudi bavùlúke nè, Bible mmwambè, kale mu bikondo byà—byà Mukalenge Yesù, Pòlò mmwâmbè nè: “Bwalu cikondo cikaadi pabwîpî.” Nudiku nufika ku dyumvwa nè ntoo nè ku díbà kaayi divwâci mu cikondo cyà Nzambi anyi? Aci civwa mmakèèlèlè. Cyànyì cikondo, kùkaadi bidimu binunu bìbìdì. Nwamònu anyi? Cikondo cikaadi pabwîpî. Nwamònu anyi? Cidi Nzambi ubiikila nè *cidi pabwîpî* kî ncutùdì twètù tubiikila nè *cidi pabwîpî* to. Nwamònu anyi?

²⁰² Pa nàнку tũngunukaayi ànu nè kwitabuujà, tũngunukaayi ànu nè kusambila, tũngunukaayi ànu nè... Nzambi ùcidi ànu nè luse lukàngula; tũngunukaayi ànu nè kutùkinamù nè lùkàsà lwònsò. Nzambi neimanyike pàákumbanà cikondo cyà kwimanyika. Nwamònu anyi?

349. Mpindyewu. Mwanèètù Branham, mbilelèlè nè kabìvwa bikèngela bwà muntu nànsha umwe kuyiishayè to pa kuumusha wèwè anyi? Tudi bamòne wèbè—tudi bakumòne ujidila bantu ku mudimu wà Nzambi. Twètù tudi—katwèna twitabuujà nè uvwa mufwànyine kwenza nàнку bu nè kakùvwa . . . bu nè kabàvwa nè cyà kuyiisha to.

²⁰³ Luse wè! Mwanèètù wa balùme, mwanèètù wa bakàji, muntu yònsò udi mukwambìle nè muntu nànsha umwe kèna nè cyà kuyiisha to pa kuumusha mèmè, ncyà bushùwà nè ndi mufwànyine kwikala muntu wa wènza luse kùdì Nzambi nè byònsò abi. To! Muntu yònsò anyi. . . udi umvwa dibìikila dyà kùdì Nzambi pa mwoyi wèndè, àdìtwè mu mudimu wa bwambi àbange kuyiisha; tudi naabù dijinga.

²⁰⁴ Bantu bàà Nzambi mbalaabìbwe maanyi pa buloba bujimà bwà kuyiisha Èvànjeeliyò. Nwamònu anyi? Mèmè ndi ànu lusàkàlàbwà lukesè lùmwèpelè pa lusenga lwà ku màyi munkaci mwà abwe manène àbùngì. Nwamònu anyi? Pa nàнку ndi. . . Kùdì ànu bààbùngì bàdì batàmbe kukumbanyina, batàmbe kukumbana, batàmbe ku cintu kampàndà cikwàbò bwà kuyiisha kumpita mèmè; Ndi ànu muntu mukesè umwèpelè, mupwekèle mwikale nsanganyibwa mwaba ewu. Ndi lutete lwà blé lùmwèpelè mu diyeeba dijimà. Nwamònu anyi? Pa nàнку aci cidi ànu. . . Nudi bamanyè cìndì muswè kwamba aci!

²⁰⁵ Muntu kanà yònsò udi mubiikidiibwe kùdì Nzambi ewu ùdì nè cyà kuyiisha Èvànjeeliyò.

350. Mmunyi mùdiku mwena Kilistò mwà kubwela mu ndòndò wa dinanga dyà Nzambi?

²⁰⁶ Balà Dìyì nè sambilà. Balà Dìyì dyà Nzambi nè sambilà. Nèndwijakajè, nèmpetè ànu bùngì bwònsò bùndì mwà kupeta abu.

Ndi mutùme lukonko lùmwèpelè, kàdi mulwèle (m-u-b-...) mu mùshindù wùdì kawùyi mwimpè to. Ndi muswè bwà kumanya ní wíkala mwà kwenza disangisha dyà dyondopa bangabanga nè wèwè kuumuka mu cimenga. Kabiyi nànkù to...bikèngela kwenza...Ndikù mwà kupeta muyiiki wà bàbìdi neebè anyi?

²⁰⁷ Mpindyewu, byôbì biinè, ndi ngèèla meeji nè muntu ewu ùvwa mu muyiiki wà bàbìdi mu dindà emu. Mu bushùwà bwà bwalu, tuvwa nè masangisha à dyondopa; tuvwa kàbìdi nè masangisha à dyondopa.

351. Mwanèètù Branham, swàkù ùmvwijè Kolintò wa Kumpàlà—Kolintò wa Kumpàlà 11—11, nè mvensà mwi4 too nè ku mu 6. Aci kacýena cyàmba nè (k-u-t-a-...) kutàpulula—kutàpulula (c-i-b-...) cibwikilu nè nsukì, anyi nsukì mile ke cibwikilu cimwèpelè cìdì cìtùkèngela?

²⁰⁸ Mpetèlèbi Kolintò wa Kumpàlà 11. Tùmonebi, Kolintò wa Kumpàlà 11.4. Ùdi wàmba nè: “Panùdì nusambila...” Kaa, èyowà’s, yèyè...Bàdi naaci kaaba aka. Bàdi bàmba nè: “Mu kusambila anyi mu kwamba kwà bipròfètà, tudikù mwà kwangata nsukì yètù—tudikù mwà...” Tùmonebi, bàdi nè mulongo mwela mwaba awu mu cintu kampàndà mwab’ewu.

Mu kwamba kwà cipròfètà—mu kwenza kwà cipròfètà, tudikù mwà kwangata nsukì yètù patùdì...? Hmm. Udi—udi mwàmbè nè: Tudi mwà kwikala nè nsukì yètù ku mutù anyi kuyùmusha patùdì twamba cipròfètà anyi?

²⁰⁹ Wèwè—wèwè nè cifulu cyà nsukì, udi mufwànyine kwenza nànkù, kàdi ndi—ndi mufwànyine...anyi muvwàle cimwè cyà ku bifulu byà nsukì byà Baamùyàpàndì ebi, anyi cintu kampàndà, kàdi... Bu mémè mwà kumwèka bimpè nè cifulu ku mutù, ndi mufwànyine pàmwàpa kulwata cimwè mémè mwinè, kàdi cìdì...kí ncifulu cyà nsukì cyà Baamùyàpàndì to, kàdi cì—cifulu cyà nsukì.

²¹⁰ Kàdi aci cìdì ànu cimpè. Wèwè kùyì nè nsukì to kàdi mwikàle naaci dìjinga. Bu wèwè mwà kucilwàta, bìdi ànu bimpè menemene. Èyowà’s, mukalenge! Mukàjì kampàndà, nsukì yôyi kayiyi mile bikolè to, yèyè muswè kwelamù cifulu cyà nsukì cyà postiche, ndi mufwànyine kwamba nè, cilwàtá’s, Mwanèètù wa bakàjì.

²¹¹ Muntu mulùme yèyè ùkwàcika cimpumpu cikolè nè bikwàbò, nè ùkèba bwà...mùshindù kampàndà...nànsha mene bwà mmwènekulu wendè kùdì mukàjèndè, yèyè muswè kulwata cifulu cyà nsukì, cilwàtè’s. Èyowà’s mmwómò. Kakwèna cintu cibì nànsha cimwè mu cyòci aci to (to, mukalenge!) ànu mùdìbì bifwànyine kwikala bwà mènù èbè awu, anyi dibòkò dyà cindundu, anyi ní ncinyi cikwàbò cyònsò. Bufùki bwòbò nè cikampàndà—bukunyenge cintu nè cintu kampàndà ciikàle mwà kukwambulwisha ciwàlà, abi’s bìdi ànu bimpè menemene.

Kàdi mbâmbè mwab'ewu nè: “Tudi mwà kwikala nè nsuki yètù ku mutù anyi kuyùmusha patùdi tusambila anyi twamba bipròfetà anyi? Aci cìdi cyùmvwija cinyi menemene?”

²¹² Èyo, balàaku, Mwanèètù Neville . . . ùvwa mwi4—4 too nè ku 6, èyo, èyo.

Mulùme yònsò udi usambila anyi wàmba cipròfetà, . . . mutù wèndè mubwikila, ùdi ùfwisha mutù wèndè bundù. (Mbwena kwamba nè, yèyè nè nsukì mile. Èyo.)

Kàdi mukàji yònsò udi usambila anyi wàmba cipròfetà nè mutù wèndè kawùyi mubwikila ùdi ùfwisha mutù wèndè bundù, . . . (Mbwena kwamba nè mwinè awu mbàyèndè). . . bwalu aci cìdi mene cyònsò ànu mùdìbi bu nè yèyè ùvwa mukungùle nsuki.

Bwalu mukàji yèyè kàyì mubwikila to, àdikungwishè kàbìdì nè nsukì: . . . (Yèyè muswè kubebula nsukì yèndè, ùmufikishè ku dikungula dyà nsukì yònsò ayi koong. Nwamònu anyi? Yèyè kàyì mwà kwikala nè. . .) . . . kàdi byòbì kabìyi bundù bwà muntu mukàji kwikala —biikàle bundù bwà muntu mukàji kukòsayè nsukì yònsò anyi kudikungwishayè mu mutù to, ìkalè mubwikila.

²¹³ Ncyèna mmòna cintu nànsha cimwè mu diikala nè nsuki anyi dyumusha dyà nsukì mwaba awu to, ànu mukàji yèyè muswè. . . Yèyè ùdi wàmba nè, yèyè wàmba nè ùdi nè cyà kuyìkòsa, dìbà adi mulekèlaayi àyikungùle yònsò. Nwamònu anyi? Bwalu yèyè kàyì mwenze nànkù to, mulekèle ìkalè nè nsukì yèndè ayi; bwalu nsukì yèndè ke cibwikilu cyèndè. Kàdi bwà muntu mulùme kwikalayè nè mutù wèndè mubwikila, nsukì mile bu yà muntu mukàji, mwimàne mu cyambilu, mmufwànyine kumweka bu muntu mukàji kuntwaku. Nwamònu anyi? Pa nànkù yèyè kàvwa nè cyà kwikala nè aci mùshindù awu to. Nwamònu anyi?

²¹⁴ Aci's—aci cìdi cyùmvwija nè bàdi nè nsukì ku mutù anyi myumushaku. . . Ndi ngèla meeji nè muntu awu mmufwànyine kwikala mutùpàkàne mu kwela kwà meeji mwaba awu nè cìvwa cyùmvwija nè—nè muntu mulùme wàmba cipròfetà nè mutù wèndè mubwikila, dìbà adi ùdi ùmusha cibwikilu cyèndè. Nwamònu anyi? To. Kì mbwena kwamba nè ùvwa nè nsukì mile to, mbwena kwamba nè, yèyè mubwikila. . . Mpindyewu, udi ubala too nè kwìnshì ndambù, wèwè udi mwelè lukonko awu, nènkù newùsanganè nè mutù wà mukàji awu mbàyèndè. Mbanganyi bàdi bamanyè nànkù? Nè mutù wà mulùme n'Kilistò; ki bwà cinyi, bìvwa bìkèngela bwà muntu mulùme àkosè nsukì yèndè bwà Kilistò, bwalu munda Mwèndè mùdi bònsò bàbìdì mulùme, mukàji, nè bònsò. Yèyè's ùdi byònsò taatù, maamù, mwanèètù wa bakàji, mwanèètù wa balùme, bònsò. Kàdi mu muntu mulùme mùdi buntu bulùme nkààyaabò. Kì bwà cinyi, yèyè ùdi nè cyà kuyìkòsa bwà Kilistò; kàdi mu mukàji yèyè mùdi bukàji nkààyaabù, bwà wàmòna mwà kwikala nè cibwikilu

cyèndè; bwalu bàyendè ùdi kumutù kwèndè. Yèyè m'mukalenge wèndè, mukòokeshi wèndè; pa nànkù ki bwà cinyi, mukàji udi nè cyà kwikala nè nsukì mile.

²¹⁵ Nènku dībà adi yèyè wàmba nè ùdi nè cyà, bikèngela àyìkòsè yònsò, dībà adi mulekèlè àkungulè nsukì yèndè. Ke yèyè nè, pìikalàbi bundù anyi dipwekeshiibwa dyà milongo bwà mukàji, udi nè cyà kwikala nè mmwènekèlu mulenga awu, kàdi kwikala nè nsukì yèndè yònsò mikungula, dībà adi mulekèlaayi ikalè nè cibwikilu cyèndè ku mutù; ikalè nè nsukì mile. Nwamònu anyi? Pa nànkù cidi. . . Muntu kanà yònsò. . . Byònsò bìdi bìcyùmviwija anyi? Ndi njinga kwamba nè, bìdi byumvwika bìmpè anyi? Ambàayi nè: “Amen,” pìikalàbi nànkù, panwikala bacyùmwa. Nwamònu anyi? [Disangisha didi dyàmba nè: “Amen.”—Muf.] Èyo.

352. Mwanèètù Branham (Tudi ànu nè tusunsa dikùmi cyanààna mpindyewu.)—**Mwanèètù Branham, katwèna nè muyiishi nànsa umwe mwaba wutùdi basòmbele to, kàdi tudi nè mudimu wà dyela dyà mikàbà yà mèyi ànu mu dyàlumingu dilòlò. Bivwa bikèngela bwà twètù kuya nè bânà bèètù ku èkèleeziyà mukwàbò bwà kàlaasà kàà Dyàlumingu anyi? Masangisha à mikàbà yà mèyi mmakùmbàne anyi?**

²¹⁶ Èè, aci ciikalè bilondèshile mùshindù wùdi bânà bèèbè bàya. Nwamònu anyi? Mpindyewu, wèwè mwikàlè nè bânà bèèbè, biikàlè bitende, nè wèwè uya naabò mu musùmbà wà mùshindù kampàndà kuntwaku, wikalà ànu mwà kubàpàya bintàkanyì mu mitù bìvwabò—bìvwabò—bìvwà kabìyi bikèngela bwà bóbò kumanya to; ncyèna mufwànyine kwenza nànkù to. Bóbò—bóbò bamwèke bu nè bàdi bàyiila bikùmbàne ku mikàbà yà mèyi nè bikwàbò. . . Nè wèwè, wamba nè, udi ubatèeka mu èkèleeziyà wa Kàtòlikè, uya naabò ku èkèleeziyà wa Kàtòlikè, uya naabò ku cintu kampàndà bu nànkù; ncyèna mwà kukubela nànkù to. Wamònu anyi? Bóbò. . .

²¹⁷ Kàdi mpindyewu, wèwè mwikàlè nè èkèleeziyà mukèsè mulenga kuntwaku udi pàmwàpa ùbèngangana neebè pa bintu bibidi anyi bisàtù, nè bânà bèènù balela mbaswè kuya mu kàlaasà kàà Dyàlumingu, bóbò beena Èvànjeeliyò mu kaabujimà, anyi cintu kampàndà, èè, aci's cidi ànu cimpè menemene. Kàdi nwamònu's, kàdi paùdi ufika pa kaaba kàà nè. . . Mbilondèshile mùshindù wùdi bânà bèèbè bàcyàngata. Nwamònu anyi? Tàngilàayi nùmonè cidi bânà bèènù bènza, cidi, mùdibo bàbinduluka ku cyòci aci's.

353. Tùmonèbi. Wèwè kùyii nè èkèleeziyà wa kuya to, bivwa bikèngela bwà wèwè kutèeleja ànu mikàbà ya mèyi cyanààna anyi?

Èyowà! Aci cidi. . . Ndi mwà—ndi. . . Aci's ncifwànyine kwikala cimpè.

354. Bikèngela bwà bânà bèènù balela bàpetè dilabula bwà kupeta Nyumà Mwimpè anyi? Bòbò—bòbò—bòbò bamòne Mukenji wà cikondo cyà nshùikidilu, bàdi nè Nyumà Mwimpè anyi?

²¹⁸ Muntu nè muntu ùdi nè cyà kwenza dilabula! Bânà bèèbè kabèèna mwà kubwela mu mûngà mùshindù to ànu mùshindù wùm wèwùm wè wùdi mubwelèle awu. Nwamònu anyi? Bikèngela bàlediibwe cyàkàbidi. Kakwèna biikùlù mu Bukalenge bwà Nzambì to; bònso mbânà balela. Bàdi nè cyà kwikala naadi, bàdi nè cyà kwenza dilabula nè Nzambì bwà kubwela, ànu mùshindù wùm wèwùm wè neebè. Mpindyewu ndi ntekemena nè ndi mwà kuumvwa eci. Cìdi . . .

355. Munanga wetù: (Tùmonèbi.) Pa bìdi bitàngilà Mufùndu wà Efèsò 4.11 too nè ku 13, twètù bònso (Tùmonèbi.)—tudi tupetela dipwàngana cishiki dyònsò dyà bansantu ku mikàbà yà mèyi, anyi bikèngela twikalè mwaba ewu, wùdi mapà à Nyumà munkaci mwà kukwàta mudimu nè midimu mishilèshilàngàne yà èkèleeziyà, bwà kutwija bapwàngàne anyi? Myoyi yètù mmiitàbùuje Diyì dyònsò dyà Mukalenge.

²¹⁹ Mpindyewu muntu ewu ngwa mu Oregon. Mpindyewu, munanga wanyì. . . Ngèèla meeji nè ndi mumanyè nè nganyì. Nwamònu anyi? Cìdi . . . Kaa, èyowà's, mmwómò, ndi cyà bushùwà mumanyè. Mwânà webè—webè wa balùme . . . Muntu ewu yèyè kaaba aka, ndi mumanyè nè udi . . . Wèwè kùyipù to, ncifwànyine kwikala mu dyàlumingu dishààle. Nwamònu anyi? Elu ndufwànyine kwikala lwà kacya ku dyàlumingu dishààle. Kàdi webè—webè mwânà wa balùme awu's ùtu wèndesha ndèkè wa batàngidi bàà meetu, wamònu's, nè bìdi . . . ùtu ùkòntonona . . . Yèyè's . . . Ngèèla meeji nè yèyè ke uvwa mubùikidishè bwà kuya kalemba mbudi pàmwè neenù mu Oregon, mùdi . . . Nènku ndi ngèèla meeji nè eci ncyà bushùwà. Mpindyewu, ndi mumanyine muntu ewu ku difùndilangana nè ku . . . nè pa nànkù . . .

To! Mbaswè kulwa mu èkèleeziyà emu bwà dipwàngajiibwa. Nwamònu anyi? Bìdi nè tudì—tudì tubwela mu bwobùm wè muntu nè mukwèndè kaaba aka mu èkèleeziyà emu, kàdi dipwàngajiibwa didi dilwa pankaci pèètù nè Nzambì. Mashì à Kìlistò ke àdi àtùpwàngàja mu Nyumà Mwimpè.

²²⁰ Mpindyewu, mu èkèleeziyà ùdi wàmba nè: “. . . mùdi mapà àkwàta mudimu.” Mpindyewu, katwèna nè mapà àbùngì menemene àkwàta mudimu mwab'ewu to, kàdi tudì nè àmwè à ku òwò awu. Tudì nè dipà dyà myakulu, nè—nè dipà dyà cipròfeta (àbìdi anyi àsàtù majimà).

²²¹ Ngèèla meeji nè Mwanèètù Higginbotham ewu, nànsha yèyè penyì, ùdi nè dipà dyà dyakula dyà mu myakulu. Nè tudì nè Mwanèètù Junior Jackson neetù, nènku yèyè ùtu wàkula mu

myakulu. Nè pashiishe tudi nè bàbidi anyi bàsàtù bàà ku bòbò bàdi bàndamuna. Mwanèètù Neville ewu kàbidi, mpaasàtà wetù, ùdi wàkula mu myakulu nè misangu mikwàbò wàmba bipròfetà, nè Mukalenge ùtwàla pambidi pèndè. . .

222 Ànu ditùkù adi yèyè kwamba cintu kampàndà. Kubiikilayè ku tèlefonè mu nzùbu kampàndà mùmvwà nsanganyiibwa, nè wàkamba cipròfetà pa muntu kampàndà, kumwambila nè muntu kampàndà mukwàcike maalà ùvwa mwà. . . kùvwa mwà kwenzeka dishintuluka dinène mu yèyè dyàkàmwè anyi cintu kampàndà cyà mùshindù awu. Nè muntu awu mmupàtùke mu Nzùbu wa baa Kanwàyi, mucikàle ànu kanwàyi, kàdi munda mwà matùkù makùmi àsambòmbò nè mwandamukùlù kî mmulengekù nànsha maalà à kapyà to, anyi ki mmwangàte bwanga nànsha bùmwe bwà bwalu abu, anyi ní ncinyi to. Awu's ùvwa m'Mwanèètù Neville ùbàmbila cipròfetà.

223 Pa nàнку tudi. . . Tudi nè ndambù wa mapà àkwàta mudimu munkaci mwètù, nènku netwikalè nè disànkà dyàbùngì dyà kubwela mu bwobùmwe nè yònsò wa kunùdi, udi nè mùshindù kampàndà, bu mùdi wenza mudimu, anyi muswè kulwa bwà kubwela mu bwobùmwe neetù, cintu kanà cyònsò citùdi mwà kwenza aci, tudi nè disànkà dyàbùngì bwà bwalu abu. Nwamònu anyi? Kàdi mpindyewu dipwàngajiibwa ndyà Kilistò.

Mpindyewu, tùmonebi, bwà lukwàbò lùmwe anyi yìbìdi mikwàbò.

356. Mwanèètù Branham, udikù mwà kuswà bwà kuumvwijakù ndambù cimfwànyì cìkwàta kùdi Mwanèètù Arganbright anyi? Lukonko lùmwe: lwibìdi mpa—cimfwànyì ciibìbi ku cimanu, bukènkè bùdi bukunyùngùlùke abu, cijèngù aci, nè bikwàbò.

224 Èè mpindyewu, nènwambile bwalu's. Mmufunde dìnà dyèndè, kàdi kèna mwab'ewu mpindyewu to. Tudi tucyùmvwà's. Mmwanèètù wa balùme nè Mwanèètù wa bakàji Jackson bàà ku Àfrikè wa ku Sud; bàkaadi bapinganè. Pa nàнку tudi tuumvwa cyòci aci; tudi bacyùmvwije.

357. Ndibà kaayi diikala èkèleeziyà udi...Ndibà kaayi diikala èkèleeziyà udi mwenze...udi (m-u-f-...) mufwè mu cikondo cyà dikènga dinène nè mub-...mwà kubìshiiibwa? Nebìndile kàbidi too nè ku dibiishiibwa dyà ku lufù dyà bantu babì anyi? Nebiikalè cyàkàbidi nè mwoyi mu Bukalenge bwà bidimu cinunu anyi?

225 Mpindyewu, alu's ndukonko lwimpè. Lukùmbànyine kutàmba nè cikondo cìndi mufwànyine kulùpèesha, kàdi ànu bwà ngààmòna mwà kupeta. . . Nwamònu anyi? Ncyèna nè. . . Ndi mupetàku nànsha byàbisàtù bìbidi byà yìmvwà mubange naayi mu dindà emu, mwenze mèbà àbidi. Ànu yàbùngì bikolè mu mùshindù wà kùyiku ànu mwà kuyàngata yònsò. Nudi numòna anyi? Nènku ndi muswè kwangata ànu bùngì bùndi

mwà kufùdisha abu, nciyi mmòna ànu kùdiyi to. Ndi mumanyè nè kùdi kàbìdì yimwè yà mimpè menemene muntwemu yivwà nè cyà kumanyika, bu mùdì dimiinu dyà nyòka bwà kumvwijiibwa, nè bikwàbò; kàdi nèndwijakajè bwà kubwela mu elu nè lukasa lwònsò.

226 “Èkèleeziyà wàkafwà mu cikondo cyà dikènga dinène (nwamònu anyi?) neikalè mu dibiiikà dyà ku lufù anyi?” Dibiikà dyà ku lufù diibìdì, dibiiikà dyà ku lufù diibìdì.

227 “Nebindile kàbìdì too nè ku dibiiikà dyà ku lufù dyà bantu babì anyi?” Baakàne nè babì nebàbiishiibwè mu cikondo cimwècimwè aci.

228 “Nebiiikalè cyàkàbìdì nè mwoyi mu Bukalenge bwà bidimu cinunu anyi?” To! Nè bafwè bakwàbò kabààkiikala nè mwoyi to munda mwà bidimu cinunu. Mpindyewu, aci’s nciipi ànu cyà menemene eci, kàdi ndi mutwishiibwe. . .

358. Cìdì Pòlò ùswa kwamba ku budìshikaminyi nè budiiikadidi mu Kilistò nciyi? Mmùshindù kaayi udi budìshikaminyi ku mikenji?

229 Èè, kwèna muswikiibwe kùdi mikenji to. Twàmbèbi tǔng, cileejilu, cintu cimwècimwè eci ncyòci eci; nèngumvwije mu mùshindù wà mu bufùki ewu, nè lùkàsà lwònsò. Cileejilu, mwaba ewu bàmba nè, paùdì upweka nè mùsèèsù, kilòmèètà makùmi ànaayi nè mwandamukùlù ku díbà ke lùbilu lùdì mwà kunyemesha ndwólù alu. Èyo mpindyewu. Mpindyewu mèmè muyeemeshe mu mùsèèsù emu lùbilu lwà kilòmèètà makùmi àsambòmbò nè yinaayi ku díbà, ndi mupiishiibwe kùdi mikenji. Kàdi mèmè mupweke nè mùsèèsù ànu mu lubilu lwà kilòmèètà makùmi ànaayi nè mwandamukùlù ku díbà dimwè, ncyèna nkwaciibwa kùdi mikenji to. Nwamònu anyi? Ke budìshikaminyi mu Kilistò abu (nwamònu anyi?), cintu cimwècimwè aci.

230 Kwèna muswikiibwe kùdi mikenji díbà dyònsò. . . Mèmè nciyi ngiiba, nshima, nnwa mfwankà, ngènda masandi, cyònsò cyà ku bintu abi kuntwaku, ncyèna muswikiibwe ku mukenji nànsha wùmwe to. Nwamònu anyi? Ndi mudìshikàmìne ku mikenji; ndi munda mwà Kilistò.

359. Udi umvwa munyi bwà bwalu bwà dikontonona dyà lulelu’s?

231 Mvwa nè ndambù wa ayi mu miyiiki yà bàbìdì mu dindà emu. Mbipiciibwe nè mèmè muyiikile neenù—neenù pàà nkààyeenù pa bintu abi (nwamònu anyi?), pa bintu abi, bwalu kùdi myàkù nè bintu bìdì bikèngelà bwà mèmè kwamba, bìndì. . . Mbipiciibwe nè mèmè mubyàmbè bu mulùme nè mukàjèndè. . .

232 Nènkù kùdi mùshindù wa kucyenza mu mùshindù mujaalàme. Ndi mufwànyine kuwàmba, kàbìdì, bwà bantu bònsò. Kùdi matùkù bùngì kampànda mu mwoyi wà mukàjì

àdiye kàyi mwà kwimita to. Nudi bumvwè anyi? Èyo. Bwà cinyi. . .

²³³ Mpindyewu, kùtu misangu mikwàbò kwimita mwâ—mwânà kufwànyine kushipa muntu mukàji; bu yèyè mwimite mwânà mbifwànyine kumushebeya. Bikèngela ùtabaleela aci kàbidi. Nwamònu anyi? Nàнку ikàla nè ntèmà menemene ku bwalu abu. Nwamònu anyi? Nwamònu's, aci's nkutwàla mwoyi, ke cyùdi mutèèkiibwe pa buloba apa bwà kwenza.

²³⁴ Mukàjèèbè yèyè nè tùsaamàsaamà, nè mukwàbò, mwânà, mufwànyine kumushebeya, ncyèna—ncyèna—ncyèna mufwànyine kucyènza to. Ncyèna ngèela meeji nè Mukalenge mmuswè bwà wèwè kwenza nàнку to. Nènku wèwè—wèwè lwàkù kùndi pàà nkààyeebè bwà maalu awu; tucyènza mu muiyiki wà bàbidi pàà nkààyetù. Nyiikilanganè neebè pàà nkààyeebè (udi umòna anyi?) nènku ndi mwà kuumvwa. . .

²³⁵ Nwamònu's, muntu-nkààya yònsò, ndi mwà kwamba nè bàdi bànsima anyi to. Nwamònu anyi? Bàdi bàndondela bintu bishilèshilàngàne. Mbipicìibwe nè mèmè mukumòne ànu. . . Nwamònu anyi? Bwalu wèwè udi ubùpatula patòoke mùshindù ewu, kwèna mumanyè to. Mbwalu kùdi muntu-nkààya nè bintu byà mùshindù awu; ndi mwà kumanya, ní bàdi bàmba bulelèlè anyi to. Nwamònu anyi?

360. Bwà cinyi—bwà cinyi Sàtaanà neàsuuludiibwe mu cikondo cikesè paanyimà pàà bidimu cinunu byà Bwàkabuulwibwà 20 kùdi 3, nè Bwàkabuulwibwà 20.27?

²³⁶ Bwà cinyi neàsuuludiibwè? Mbwà kuya kasangisha bantu bèndè ku dibìkà dyà ku lufù diibìdi, bwalu bidi bikèngela bwà Sàtaanà àpicile pèndè ku—ku cilumbulwidi. Nwamònu anyi? Ùdi nè cyà kupiishiibwa.

Kaa ekelekèlè, ewu mmukàndà mùle tètè nè—nè yòyi ayi. Ncyèna ngiitabuuja nè. . . Kadi's mukwàbò mukàndà ngwòwò ewu mùle tètè naayi. Lekèlaayi ngàngate yimwè mwab'ewu, nè lùkàsà lwònsò menemene, menemene's.

361. Mwanèètù Branham, swàkukù umvwijèku Byenzedi 9 mvensà wa 7 nè Byenzedi 20. . . Byenzedi mvensà wa 22. (Udikù mwà kumumpetela anyi, Mwanèètù Neville.) Swàkukù umvwijèku Byenzedi 9 mvensà wa 7.

²³⁷ Mpindyewu, pàdiye munkaci mwà kwenda kuwùkeba apu, mmònebì ní ndi mwà kwangata lukwàbò ànu lùkàsà. Nukàadi nwenda nucyòka anyi? Ndi mumanyè nè nukàadi nucyòka's.

Swàkukù ùmvwijèku bwalu busokoka bwà ditentemunyiibwa dyà Mukàji-musèla. Mùshindù wènzekabi nè mmwaba kaayi, mwaba mene, ùyaaya Mukàji-musèla. Ayi kî nkonko milenga yà kunanga anyi? Abi's mbilenga byà dikèmà. Ndi mufwànyine ànu kushàala mwimàne kaaba aka ditùkù dijimà. . .

Katanci kakesè cyanààna mpindyewu, mvensà. . . Byenzedi 9 mvensà wa 7. Twasàkidila, Mwanèètù Neville. 9 mvensà wa 7:

*Nè bantu bàvwà bènza nendè lwendu bàakashààla
biimane kabayi cyà dyamba, munkaci mwà kutèeleja
dìyi, kàdi kabayi bàmòna muntu nànsha umwe to.*

²³⁸ Mpindyewu, ndi mumanyè kunùyaaya aku. Nwamònu anyi? Mpindyewu, mwaba ùdi ùlondà mmwâmbè nè bôbò. . . cyanza mwandamuna. Mpindyewu, ncyèna—ncyèna mumanyè nè cidì cyenzèke kuntwaku ncinganyi to. Ncyèna ànu mwà kunwambila to, bwalu mwaba wùdi wùlondà ngwàkumvwabo. Wùmwe, kabààkacimòna to, nè mwaba ùvwà ùlonda, bààkacimòna kàdi kabààkacyùmva nànsha. Mbanganyi bàkaadiku bamòne cyòci aci kumpàlampala mu Bible? Mémè nkaadi mumòne, kàdi ncyèna mwà kucyumvwija to. Nwamònu anyi? Ndi. . . Nebikèngele bwà Mukalenge acimbuulwilè. Ndi—ndi munwâmbile katanci aka nè, nebikèngele bwà ngiikalè nè meeji matòòke kunùdi. Nwamònu anyi? Ncyèna mumanyè to. Mfwilaayikù luse. Mémè—mémè nciyi mwà kucyumvwija to, nèngiikalè nè meeji matòòke makumbàne bwà kunwambila nè ncyèna mwà kucyumvwija to. Kàdi ncyèna—ncyèna mwà kuyàkula pàndi—pàndi nciyi mumanyè nànsha.

²³⁹ Ncyèna mwà kuumvwija aci to, bwalu mwaba ùmwèpele mbâmbè nè bààkamòna Bukènkè kàdi kabààkatèelejakù Dìyi to, anyi cintu bu nànkù; nè mwaba wùvwà wùlondà, bààkamòna. . . bààkumva Dìyi kàdi kabààkamònakù Bukènkè nànsha. Ncyèna mwà kucyumvwija nànsha. Nwamònu anyi? Ncyèna—ncyèna mumanyè cyàkenzekà to, nè ncyàkumanya to pàdi Mukalenge kàyì mucimbuulwile nànsha; ànu mùdibi nè ncivwa mwà kunwambila bwalu bwà dibàkà nè dishipa dyà dibàkà nànsha. Ncivwa mumanyè to too nè pààkacimbuulwilàYe.

²⁴⁰ Nènkù nànsha mu dindà emu, Mukalenge Nzambì, Mufùki wa maulu nè buloba mmumanyè nè eci mbulelèlè, mu dindà emu Yèyè mmujikije cintu cyònsò nkòong, ùngambila bwà dibàkà nè dishipa dyà dibàkà. Ncyà bushùwà. Ke bwà cinyi ndi ngàmba nè, ndekèlaayi ncisangishè cyònsò pàmwè. Kenkètaayi. . .

²⁴¹ Pàdi cimwè cyà ku bintu ebi bu mùdi dimiinu dyà nyòka, pààkacindeejabo, ncivwa—ncivwa mwà kucimòna nànsha, cintu nànsha cimwè; kàadi mémè kutùngunuka ànu nè kulonda aci, nènkù katanci aka anyi. . . Pashìishe kukèngelabi bwà wèwè kuya kule menemene pà nkayeebè, nè pashìishe Nyumà Mwîmpè kubanga kucibuulula. Mpindyewu, ndi muswè bwà muntu àteetè kucipiisha mpindyewu. Nwamònu anyi? Kèna mwà kwenzakù nànkù to.

362. Swàku ùmvwijèku bwalu busokoka bwà ditentemunyibwa dyà Mukàji-musèla.

²⁴² Ànu dishintuluka cyanààna, nwamònu's, dyà mibidi yètù. Mpindyewu, twâmbààyaaku nè yètù. Nudi bamanyè cindì njinga

kwamba pândi ngamba nanku awu apu's? Ncyêna nè meeji à kwikala kunyangakaja cijila to. Ncyêna nè meeji à kwamba nè *yètù* to; Ncyêna nè meeji à kwamba nè èkèleeziyà ewu to; ndi nè meeji à kwamba mwena kwitabuujà yònsò.

²⁴³ Abraham, yêyè ùvwa mwindile mwânà mulaya, uvwa mumulaya awu. Ncyà bushùwà anyi? Nè Èkèleeziyà mmwindile Mwânà mulaya. Mukàji-musèla (mmwómò anyi?), Mukàji-musèla mmwindile ùkèba Mwânà mulaya.

²⁴⁴ Kumpàlà kwà mwânà mulaya awu kulwayè kùdì Sarah nè Abraham, byàkakèngela bwà mibidi yàbò kushintulukayi. Ncyà bushùwà anyi?

²⁴⁵ Yêyè's ùkaavwa mukolè bikolè mu mùshindù wà nè kàvwa mwà kupeta mwânà to. Kàcìvwa kàbìdì nè tujilu twà mabèèlè mu mabèèlè amu to; mabèèlè èndè awu àkaavwa mafùbìdìle. Matrice èndè kaàvwa mwà kwimita to; yêyè ùvwa nkumba. Yêyè kàvwa mwà kupeta mwânà awu to; mwoyi wèndè uvwa mukùlàkàji bikolè bwà kutwàla bìsaamà byà lulèlu. Pa nanku cyàkenzekà ncinyi? Nzambi wàkamushintulula kumwaluja ku nsongàakàji kampàndà wa citende. Nè Wàkenzela Abraham cintu cimwècimwè aci, bwalu Wàkamba nè mubidi wèndè wùvwa ànu mufwè wètù wà menemene ewu. Nwamònu anyi? Nènkù byàkakèngela bwà Yêyè kushintulula mubidi wàbò bwà kwakidilabo mwânà mulaya awu.

²⁴⁶ Nènkù katwèna mwà kwakidila Mwânà mulaya awu to udi mutùlaya leelù ewu mu mibidi yitùdì basòmbelemù eyi to; mibidi eyi's mmpèkaatù.

²⁴⁷ Kondo kàà mwoyi kàà ntwadijilu aka kàdi kàkòntonona mubidi ewu ku lumono, lulabulu, lulengu, lununku, nè luumvu, nènkù bìdì bitùkèbela lutàtù lwònsò elu; tudi tulukakaja lungènyi nè bikwàbò byònsò. Kàdi mubidi mupyamùpyà awu, wùdì wùfùmina ku dilediibwa dyà cyàkàbìdì ewu (kí nkondo kàà mwoyi kàà kumpàlà aka to, nekajimine). . . Ncintu kampàndà cyà munda aci cìdì nè mwoyi. Bantu bònsò bàdì bàcyùm vwa bàmbè nè: "Amen." [Disangisha dìdì dyàmba nè: "Amen."—Muf.]

²⁴⁸ Kí mbyà pambèlu ebi, lumònu, lulabulu, lulengu, lununku nè luumvu to. Kí mbyòbì to. Mbilongolwela lufù nè nebifwe, kàdì cìfupà cyèbè cyà munda aci, lwà munda emu, munda emu, ke muntu udi kàyì mwà kufwà awu. Nwamònu anyi? Nènkù's ke muntu kùdì mwoyi mupyamùpyà wùbangila nyêyè awu, ku dilediibwa dipyadìpyà edi; nènkù cìdì cìibaka muntu mukwàbò mu cimfwànyì cyà muntu ùdì wèwè ewu, mu nyùngulukilu wa mwoyi awu. Nwacyùmvù anyi?

²⁴⁹ Pa nanku mu mùshindù mushààdile wùdì munda emu, nènkù ncinyi aci? Dìyì dilaya kumpàlà kwà difùkà dyà dyulu nè buloba. Nè mu nyùngulukilu amu, ewu ùdì ànu ùleeja ciibùlòji; awu newùleejè cyà cilelèlà aci, Dìyì adi. Nwamònu anyi? Nènkù cintu cimwècimwè aci cìdì . . . Anyi, ditentemuka dyà Mukàji-musèla

neciikale ànu cintu cimwècimwè aci. Dìyì didì munda mwèbè adi, mubidi neùdifwimbile ku Dìyì adi, nè cintu cimwècimwè aci cyàkenzeka kùdì Sarah.

²⁵⁰ Kumpàlà...Pàvwà mubidi wà kale wùvwaye naawù awu, mubidi wa kumpàlà awu, bìvwa bìkèngela bwà wòwù kushintuluka bwà wàmòna mwà kupatula mwànà wa balùme. Nwacyũmvù anyì? Mubidi awu kawùvwa mwà kucyènza to. Mubidi ewu kawèna mwà kucyènza to, pa nàнку newikale nè cyà kushintuluka mùshindù wùmwèwùmwè awu bwà kwakidila Mwànà.

363. Necyènzeke munyì, nè ndìbà kaayì didì . . . mpenyì pàdì . . . Mukàji-musèla ùyaaya kwèpi?

²⁵¹ Ùyaaya mu Butùmbi, mu Dyulu bwà Didyà dyà Dibanji, ànu mu cifwànyikijilu mùvwà Izàkà nè Leebèkà amu, pàakayà Leebèkà bwà katwilangana nè Izàkà apu. Vùlukàayi nè Eliyèzà, ùdi mpindyewu ùleeja mukenji wàkapàtukila kùdì Abraham awu, Eliyèzà wàkapatuka bwà kupeta mukàji-musèla bwà Kilis-. . .bwà Izàkà. Wàkapeta Leebèkà mulenga kumòna awu mu cyàshimà cyà ibaamulòlò, nsongàakàji mukèsè wa dikòbà difiike, wènda ùpàtuka nè nyingù wa màyi mwambula. Ke Eliyèzà kusambilayè, kwamba nè: “Mukalenge Nzambi, mpèèshèku lwendu lwìmpè mpindyewu nè ntuucisheku dyàkalenga bwà mfùmwanýi, Abraham.”

²⁵² È kwambayè nè: “Ndàaku, kumwangàcidìku munkaci mwà beena Pelèshèètè emu to; kumwangàcìku to.” Mupetèlè mwab’ewu munkaci mwà cisàmbà cyèndè, bìleeja nè Mukàji-musèla wa Kilistò nè Kilistò bàdi nè bulongo bwà mu mashi, bwalu Leebèkà nè—nè Izàkà bàvwa bânà bàà muntu ku baataatù.

²⁵³ Ke pa nàнку kupwekabo, nè Leebèkà mulenga kwisù ewu kupatukaye bwà kasuna màyi; ke kusambilayè; nè Leebèkà kunwisha kaameelu màyi nè bikwàbò byònsò. Nè pashìishe, nenùmonè nè Leebèkà ùvwa nè. . .Disungula dyà ndekeelu divwa nè cyà kulwa kùdì Leebèkà. Yèyè kulòmba nsongàakàji kùdì taatù; kulòmbaye nsongàakàji kùdì maamù; nè kakùvwa nànsha umwe wakiitaba to. Bàvwa baswè bwà kwanjiye kushàala katanci. Yèyè nè: “Kanùmpùmbishi ku mudimu wànyì to.”

²⁵⁴ Nènku byàkakèngela bwà Leebèkà kwenzaye disungula, bwalu yèyè wàkamba nè: “Nsongàakàji’s ùkaadi mukolè; mulekèlaayi àdyenzèle disungula.”

²⁵⁵ Nènku mbenzè ànu bàmwomekela bwalu, nè lùkàsà lwònsò dipàngadika dyèndè kwangaciilwadi; kwambayè nè: “Nyààya.” È kubàndaye pa kaameelù nè kuya katwilangana nè. . . Tàngilàayi, kaameelù mene kààkanwishàye màyi aku ke kòkò mene kààkamwambula bwà kuya nendè kùdì mubàki nè ku dyàkalenga dyèndè dyònsò. Nènku kaameelù mene aku, bukolé

mene bwà (nyama awu mu Bible ùdi ùleeja bukolè) . . . Nènku Bukolè mene butùdi tupèèsha màyi nè tutùmbisha abu (Amen! Nwamònu anyi?), màyi, mwoyi, kutùmbisha, Dîyi, ke cintu mene cidi citwàmbula citùbweja mu buloba bwà Butùmbi bwà katwilangana nè Mubàki. Èyowà's, mukalenge! Amen!

Bindile dilwa dya ditùkù dya disànkà dya
 Bukalenge bwà bidimu cinunu adi,
 Pààlwà Mukalenge wetù mubènèshìibwe,
 kwangata Mukàj'Endè-musèla udi mwindile
 awu kuya nendè.

²⁵⁶ Kàdi vùlukàayi nè, Izàkà ùkaavwa muumuke ku nntentà nè ùvwa mwimàne pambèlu mu budimi munkaci mwà dyanina paanyimà pàà mapingaja. (Amen!) Pààkamònaye Leebèkà wènda ùlwa . . . Nè Leebèkà kacya kàvwakù mwànji kumumòna to nè yèye kacya kàvwakù mwanji kumumòna to, kàdi civwa ndinanga ànu ku dyosha dya dísù dya kumpalà adi. Yèyè mukàjì wàkamunanga nè yèyè mulùme wàkamunanga, nè ùvwa mene mubwikila. Amen! Kaa, ekèlekèle!

²⁵⁷ Kàdi tàngilàayi, pààkamumònaye, mwoyi wèndè wùvwa mùle tètè nè disànka. Yèyè kàvwa mumanyè nè ùdi ùkasèdiibwa kùdi nganyì mene to, kàdi ku diitabuuja's. Amen! Nènku—nènku—nènku vùlukàayi nè, Yesù neashiyè Bukalenge, nè twètù katwàkutwilangana Nendè mu Butùmbi to, netwikale nè cyà kutwilangana Nendè mu mpeepèlè, pankaci pàà maulu nè buloba, mwaba wùdi mwalàbàle bwà kutùpikula. Ke kutwilanganayè nè Leebèkà munkacinkaci, pankaci pàà nzùbu wa baa mùkàjì nè wèndè nzùbu's. Amen! Kumwangata kuya nendè mu nzùbù mwèndè, nè kumusèlayè, nè kushààlayè mupyanyi wa byónsò bivwà tatwèndè naabi abi. Amen! Kaa, bipwàngàne, bipwàngàne ànu menemene. Èyo.

Lukonko: **Nzambì ùtu ùtápulula mulùme nè mukàjèndè mu . . . ?**

²⁵⁸ Mbipicìibwe nè ncìyi—ncìyi mubale elu nùnkù to. Nwamònu's, nwamònu anyi? Cidi—cidi . . . mbifwànyine kwikala nè ndi nè cyà kwamba dîyi kampàndà. Nudi numòna anyi? Ndi munùmanyè nwènu bônso, kàdi ebi—ebi—ebi bìdi bikwàciibwa pa mikàbà yà mèyi (nudi numòna anyi?), pa nànkù mbìmpè ncì—ncì—ncìcyàmbì to. Ncintu kampàndà pa bìdi bitàngilà . . . Muntu wàkacifùnda awu, nudi bamanyè cidici's; nènku's mbìmpè bwà mèmè—mèmè kukumòna mu muyiiki wà bàbìdi. Nwamònu anyi? Mbìmpè bwà ncìikadi . . . Ncyèna ngèèla meeji nè mbifwànyinekù kwikala bìmpè menemene bwà kubala aci to. Nwamònu anyi? Bìdi—bìdi ànu bìmpè, muntu awu, kèna nè bwalu bubì nànsha bùmwè to; mbeelee lukonko lùdi lùkèèngela, kàdi ndi—ndi ngèèla meeji nè bivwa bitàmbe kwikala bìmpè bwànyì mèmè bwà kutàngila bwalu ebù mu muyiiki wà pàà nkààyetù wà bàbìdi. Kanwènaayiku bafwànyine kwela meeji

nàнку awu anyi? Ànu yònsò udi. . . Udi mudìmanyè, nànsha wèwè mwikàle nganyi.

²⁵⁹ Kaa, ekèlekèle! Kaa, s'tukààdi bamanè kupicisha dîbà dyètù's, balùmyàna wa yààya. S'mbi—s'mbîmpè bu twètù mwà kujikija nè kuya ku didyà dyètù dyà mundaamuunyà. Nudi baswè nè nshaalè mwimàne dîbà búngì kaayi. . . dikàpàkapà edi? [Muntu kampàndà ùdi wàmba nè: “Ditùkù dijimà.”—Muf.] Kaa, ekèlekèle, ekèlekèle! Ànu—ànu, èyowà's, ànu, pàmwàpa ànu kakesè cyanàana. Piikalàbi nè ní nganyi udi nè cyà kuya lùkàsà lwònsò awu, kanùlekedikù byàdidyà byènu byà mundaamuunyà bishila to. Kàdi bu wèwè—bu wèwè. . . Nènku—nènku pàmwàpa nèngiikale mwà kudùila lwà ku Blue Boar, anyi ku Pryor kwàka, anyi yimwè yà ku myaba ayi, nè pàmwàpa kabàakunùtàcisha to. Byòbì bikèngela bwà wèwè kuya, Nzambi àkubènèshè; ndi ngùmwa. Nwamònu anyi? Nènku nengàngate ànu bu mùdi, nèngiikale mwà kulekela *eyi* ànu mwaba ewu, nènku ke yònsò yìndì nè cyà kwandamuna. Pashùishe nèngiikalè—nèngiikalè mwà, *eyi* nùнку, nèngiikalè bu, kwangata tusunsa tukwàbò tutwè ku dikùmi nè tùtaanu, pashùishe nènnyè, nèngiikalè nè cyà kuumuka.

364. Ndi nè bàna bàà bakàji bàbìdi basèdìibwe kùdi muntu mu d-i-n-g-. . . nè bàdi bìitabuuja Mukenji ewu. Bòbò. . . màngumba, (Ncyà bushùwà.), nè bàdi bìitabuuja Mukenji ewu nè bàdi bàWùtwa nyama ku mikòlo, nè bàkaadi bapetè. . . Bivwa bikèngela bwà kwenzabò cinyi? Mbapetè dikàndameena. Netwènzè cinyi?

²⁶⁰ Lamàayi ngimànyinu wenù! Kakùyì mpatà to. Leejàayi meekala ènù. Kì cyòci aci; kanùbàlekeèdi to. To, mukalenge! Ncyèna ngàmba nè, kanwikadi nuya munkaci mwàbò, kwenza bwobùmwe, anyi cintu kampàndà cyà mùshindù awu, panùdi ànu mwà kubwela mu bwobùmwe to; kàdi pàkaadìbo bàfika ku dishintulula byàdidyà, nudi bamanyè's, nkuci kèna mwà kudyà nè kabangu-nyuunyi to.

365. Mwanèètù Branham, udikù mwà kuumvwija Maakò 13.27 anyi bu wèwè mwà kuswa anyi? Kàbìdi, Mwanèètù Branham, kàdi bishi bwà bantu bàà mu Bwàkabuulwibwà 20.7 nè 9, aba. . . bàdi bàlwisha bansantu mvità abu? Mbafùmìne penyi? Nekwikaleku bàambwibwà kuntwaku bu—bu mu díkù dyà Noà anyi?

²⁶¹ Bwàkabuulwibwà 13 anyi. . . To. Maakò 13.27, Mwanèètù Neville. Bwàkabuulwibwà 20. Udi nè Bible webè mwaba awu anyi, Mwanèètù Capps? Bwàkabuulwibwà 20, nè bìdi bimwèka bu 7 nè 9. Ndi ngèèla meeji nè ndi, pàdìbo munkaci mwà kupeta. . . Mwaba ewu, yèyè ùdi nèndè kaaba aka mene. Bwàkabuulwibwà, cìvwa ncinyi mpindyewu? Maakò 13.27, 13.27.

Nè pashùishe yèyè neatumè banjèlò bèndè, nè. . . neasangishè basungula bèndè pàmwè ku mpeepèlè

yinaayi ayi, nènku nebiikale...nè bitùpà byà kule menemene byà buloba bwà kwikala...nè too nè ku bitùpà byà kule menemene byà dyulu.

...bitùpà byà kule menemene byà buloba too nè ku bitùpà byà kule menemene byà dyulu.

²⁶² Aci cidi cyàkula bwà dibìikà dyà ku lufù, ditentemunyibwa, diya dyà muulu. Yèyè neàtumè banjèlò Bèndè bwà kusangishabò. Nukààdiku beelè meeji ku cidi banjèlò abu anyi? Huh? Baamisànjeelà. Yèyè neàbasangishe pàmwè, neàbisangishe (nwamònu anyi?), ùbàtwàla, ùbàswikila pàmwè ku bitùpà byà kule menemene byà buloba too nè ku bitùpà byà kule menemene byà Dyulu, Dìyi dìvwàku adi, dimwènèshìibwe pa buloba. Nwamònu anyi? Nwacyùmùvù anyi? Dìyi dyàmànyì kwakudiibwa; s'ki Dyòdi edi dimwènèshìibwe. Nwamònu anyi? Èyo, Mwanèètù Capps. Tùmonèbi.

Nènku pààkajika bidimu cinunu abi, Sàtaanà ùvwa...wàkalekelediibwa mu bùlokò bwèndè amu,

²⁶³ Èyo. Ndi mfùma ku dyumvwija aci, kî mmwômò anyi? Mùshindù wikalàye mwà kulekelediibwa mu bùloko bwèndè ku ndekeelu kwà bibimu cinunu.

Èyo, ndi nè lukwàbò mwaba ewu mene. Anjì indilà kakesè.

366. Mwanèètù Branham, civwa cyà kùdi Nzambi, anyi civwa cyà ku byenzi byànyì sungasunga pàvwà bintu bìvwà byenzèke abi, pàvwà (m-u-t-...) muteciiibwe...? Aci civwa...? (Mònabi ní udi mwà kujandula aci's. Ncifùnda bìmpè, kàdi kàlaasà kàànyì kalonga nkakesè. Cidi cyàmba cinyi mwaba awu?...?..Ncyèna—ncyèna ngèèla meeji nè ndi mwà kwandamuna alu to. Mwanèètù Capps anyi ncyèna mwà kujandula...Mmwàmbè,) Civwa...? (Ambà ànu ní—ní civwa...bu nè ùvwa mungàngà mukàjì. Cintu kampàndà cyà dyondopangana.) Civwa cyà kùdi Nzambi pangààkiimanyikà dyondopangana, anyi civwa ncilèmà cyànyì?

²⁶⁴ Ncyèna mufwànyine kumanya to. Mbipìciibwe nè mémè mumòne cyòci aci mu muyiiki wà bàbìdi. Nwamònu anyi?

Mpindyewu, kwondopangana's ncintu cijaalàme, kwikala mungàngà's. Ndi mwà kwamba...Mpindyewu, muntu awu kacya...Ncivwa mulwàlùje paanyimà ànu bwà kwamba nè ncyèna ndwàdamuna to, bwalu aci cidi nè musinga wàbúngì menemene bwà mukàjì awu ànu mùdi lukonko lwèbè nè musinga kùdi anyi lwànyì kùndi mémè amu. Nwamònu anyi? Kàdi mpindyewu, byòbi biikàle—byòbi biikàle nè—nè mmungàngà, bwà nè udi ànu mulekèle kwondopangana nè mbwalu uvwa mwelè meeji nè kabivwa bikukèngela...Èè, ngèèla meeji nè kwondopangana kùvwa kukèngela kwikalakù nangàngà bu mudimu wà luse. Nwamònu anyi? Bivwa

bikèngela wêwè kwelangana meeji ku dyenza cintu kampàndà bu ngàngàbukà.

265 Ngàngàbukà wetù ùdì ngàngàbukà mwîmpè ewu, s'tudi bafwànyine kwambulwisha muntu nànsha mwikàle nè dyèyà anyi to, ngàngàbukà mwena diinà ewu. Nwamònu anyi? Nènku ndi ngèèla meeji nè mwambi kampàndà, muntu kanà yònsò ewu, bivwa bikèngela bwà mudimu wètù kwikalawù bwà muntu nè mukwèndè, bwalu bidi bipeepejilakù ndambù nsòmbelu bwà muntu nè mukwèndè.

266 Ndi . . . Pàkangambilàbo nè bivwa bikèngela bwà ngàngatè lukàmà lwà ndola ku lumingu mu èkèleeziyà emu bu difutu, mòna's, cyàkamba—cyàkamba kunshipa. Mpindyewu . . . Mandamu Wilson, ndi mumanyè, nè pàmwǎpa mwanèndè wa balùme, nè bakwàbò basòmbè kaaba aka, mbavùlùke nè kukaadi bidimu, ndi muyiishe mwab'ewu munda mwà bidimu dikùmi nè mwandamutekète kàdi kacya ncìyìku mwàngate nànsha dyèyà to mu nsòmbelu wanyì. Dikùtà dikesè dyònsò, cintu cyònsò cìmvwà mwà kwenza, mvwa ncyèlamù. Nwamònu anyi? Kàdi pàakangambilàbo nè bivwa bikèngela bwà mèmè kuyàngata bwà ngàmòna mwà kwikala mu masangisha aa, byàkamba kunshipa. Nwamònu anyi? Mu bushùwà bwà bwalu, ndi ngèèla meeji nè bìdi ànu bîmpè, kàdi ànu bwànyì mèmè (nudi numòna anyi?), Ncyèna muswè cintu nànsha cìmwè to, nànsha mfrangà to, cintu cìmwèpelè cìndì muswè cìdì—cìdì ànu—bulundà bwènù abu nè ngàsà wa Nzambì kutùdì.

267 Ndi—ndi mununangè (nwamònu anyi?), ndi mununangè, nè ndi muswè bwà nwènù kwikala bajaalàme; nè ndi muswè kwikala mujaalàme mèmè mwinè. Nènku ndi—ndi muswè nùngitàbùùjè; ndi nwwitabuujà. Nènku nwènù balwè kùndì nè lukonko, ndi muswè kwikala nè meeji matòòke kumpalà kwènù. Nènku mèmè—mèmè munwàmbile mu Dìnà dyà Mukalenge, ndi muswè bwà nwènze ànu menemene cìmvwà munwàmbile bwà kwenza aci. Kanùumukukù to nànsha kakesè—ndambù, dîbà adi ndi ngèèla meeji nè netùtùngunuke ànu mùshindù awu. Nwamònu anyi? Nè pashiishe, bakwàbò . . .

268 Nànku mpindyewu, pìikalàbi nè kwondopangana . . . Nènku ndi ngèèla meeji nè wêwè, munda mwà mwoyi wèbè muswè bwà kwikala mungàngà . . . Muntu yònsò kèna mwà kwikala mungàngà to. Mungàngà ùtu mmuntu wa kalolo nè musangeelu kùdì bantu, nè kaa, ndi ngèèla meeji nè mungàngà mulelèlè . . . Wêwè ni ukààdikù kacya musaamà mwikale mu lupitàadi kampàndà, anyi cintu kampàndà, mumòne mungàngà mulelèlè mulenga udi mufwànyine kulwa nè kwenza bwà ùdumvwè bîmpè, anyi cintu kampàndà anyi cikwàbò . . .

269 Ngaakapicila ku dipandiibwa pàmvwà mwashiibwe cingoma cikondo aci; byàkakèngela bwà mèmè kuya ku lupitàadi. Mvwa nè mungànga mukàji mukesè wa kale

kuntwaku, mwwa mmubiikila nè “Concombres Mishémè,” bwalu ùvwa ànu misangu yònsò nè concombres mukana, munkaci mwà kumudyà. Bivwa ànu díbà dyònsò mùshindù awu. Nènku mwwa ànu nè bidimu bitwè ku dikùmi nè binaayi cyanaàna, kàdi mwwa mwashiibwe cingoma. Nè yèyè mwine ùvwa ànu twambè nè kakwàcikwètù kakesè, nè ùvwa mwà...mikòlò myasa cingoma ayi, pabwìpi nè yònsò yìbidi misùnsula mùshindù awu, nènku ùvwa mwà kutèeka musàamu *apa* nè musàamu *pààpa*; nè díbà dyònsò ùvwa misangu yònsò ànu ùnkwàcisha. Nènku mwwa misangu yònsò ndyàmbidila nè (Ncìvwa ànu mwànà mukese)—mémè kudyàmbidila nè mwwa mwà kumusèla, bwalu yèyè ùvwa—yèyè ùvwa nè musàngelù be nè mulenga bwànyì mémè's. Èè ndi... Aci... Nudi numòna's, aci's cidi nè mushinga kampàndà (nwamònu anyi?) bwà kwenza cintu kampàndà.

367. Ndi muswè kwela lukonko. Nombà umwe: Piijamà yà inàbànzà yidi...(Mpindyewu, anjì indilaayi kakesè; lekèlaayi ncibalè...?. . . To, eci's neciikale cimpè.) **Piijamà yà inàbànzà yidi bu bivwàlù byà muntu mulùme anyi?**

²⁷⁰ Balùmyàna, kanùngambidi nè kabèena mwà kukwela nkonko mishilè yà tubèyibèyè to. Ncyèna mumanyè to. Nènnùlekèlè ànu nwangata dipàngadika dyà cyòci's. Kabivwa bikèngela bwà wèwè kwikala upitakana kumpalà kwà bantu muyilwàte pambidi to; ndi—ndi mumanyè nànkù. Pa nànkù mùshindù awu ke wùvwàbi bifwànyine kwikala, kàdi mu... mu diya kalàala ncyèna—ncyèna—ncyèna mumanyè to. Nèngiikale nè cyà kubènga kwandamuna alu kàbidi.

Nkaavwa munwàmbilè nè nèngiikalè nè meeji matòòke bu mémè ncìyi mumanyè to. Ncyàkwelakù meeji àànyì mémè mwinè pa bwalu abu to (éyo), paùdi kùyi muswè meeji àànyì sungasunga to. Wèwè muswè aci, mémè nènkwambilè. Nwamònu anyi?

Mpindyewu vùlukaayi nè, kabyèna... cidi—cidi... Eci—eci cidi mwà kwikala cibi mu ntàntà wa mùliyò mujimà wà kilomèetà. Ndi ngèèla meeji nè mbifwànyine kumwèka bilenga bwà kulwàta nkanzu wa bufùku. Kàdi—kàdi bu wèwè—kàdi bu wèwè... Kàdi aci's cidi ànu cikutàngile. Mpindyewu, ncyèna mwà—ncyèna mwà kunwambila aci to, bwalu ncìvwa mwà kucitwa nyama ku mikòlò to. Mpindyewu, awu's—awu's—awu's mmémè, kì n'Yèyè to, nwavùlukaayi. Nwamònu anyi?

368. Mbibi bwà kubèbula nsongosongo yà nsuki yà mukàji anyi?

Ndi ngèèla meeji nè twafùmu ku dicyàkula kùkaadi tusunsà tukesè (nwamònu anyi?), bwà bakesè... Ngèèla meeji nè bàdi bàbibiikila—bàbibiikila nè ntuntu tukesè tùdi tulembèlèlè mùshindù awu... .

369. Mwanèètù Branham, mu wùmwè wà ku mikàbà yà mèyi yà Bikondo Mwandamutekètè byà Èkèleeziyà uvwa mwàmbè nè Yudaàsà ùvwa mubingishiibwe, mujidiibwe. Bivwa bishùwashùwàle anyi...(Ke lukwàbò lwimpè

elu's.)...umvwijaku...dilabula, àwva mmalabula mashùwashùwàlè à ngàsà àvwayè mupetè anyi? Uvwa mwâmbè kâbidì nè Yudâàsà ùvwa nè dínà dyèndè mu Mukàndà wà Mwoyi, kàdi pààbì, s'tudi bamanyè nè yèyè wàkaya mu ngenà nè wàkajìmina. Mmunyi mùdiku muntu mwà kwikala nè dínà dyèndè mu Mukàndà wà Mwoyi kàdi mwikàlè ànu mujìminè? Anyi bwà cinyi Nzambi ùdi ùtèèka mènà à bantu mu Mukàndà wà Mwoyi pàdiYe mumanyè nè nebàjìminè ku ndekeelu?

²⁷¹ Mpindyewu, alu's ndwîmpè, kí mmwômò anyi? Mpindyewu, elu ndufwànyine kwikala lwîmpè. Mpindyewu, nebikèngèlè bwà ngèyèmenè Mukalenge bwà kwandamuna elu, bwalu ndi ànu munkaci mwà kupongwela, kukenketa, èyowà's wè. Tàngilàayi's! Dyàmbedi, mu...èkèleeziyà yètù, mvwa mwambe nè Yudâàsà ùvwa nè dínà dyèndè mu Mukàndà wà Mwoyi. Aci's ncilelèlè. Tudi bamanyè nànkù, bwalu Yesù wàkabàmbila pààkatùmiibwàbò bônso (Maatàayi 10), bwà kwipata badémòns, bwà kuyiisha Èvànjeeliyò nè, nudi bààkidile ku cyanààna, nufilè ku cyanààna; nènku bààkaalukila bènda bàcyònkomoka, bwalu démons yivwa yibàkòòkela. Ncyà bushùwà anyi? Ke Yesù kubàmbila, nè kubiikilaYè mènà àbò (cìvwbabo aci, búngì bwàkatùmiibwà abu); ke kwalukilabò nè Yudâàsà Mpongoloki wàkaMutungila kâbidì awu...Nwamònu anyi? Bààkaalukila bènda bàcyònkomoka, bwalu démons yivwa yibàkòòkela. Mpindyewu, nwamònu's, lwidì alu lùvwa lubi mwaba awu. Nwamònu anyi? Kwèna nè cyà kucyònkomoka nè bwalu ndi nè bukolè bwà kufikisha démon ku diya to. Nwamònu anyi? Kwèna nè cyà kwenza nànkù to, udi nè cyà kucyònkomoka bwalu udi mupetè mene ngàsà mukùmbàne bwà kusùngidiibwa. Nwamònu's, nwamònu anyi? Kwèna nè cyà kucyònkomoka to... Mùshindù awu ngùdi bantu... .

²⁷² Pa ciibidilu bantu bàtù nè mapà mbantu bàtù kabàyi baswè mapà to. Nwamònu anyi? Pólò wàkateeta bwà kunyeema cintu aci, ke mwàkenzà Mòsà pèndè. Balombodi banène bàà mùshindù awu bàtù bàteeta kunyeema mudimu awu; mbamanyè cidi cìsanganyiibwa kumpàlà kwàbò. Nzambi... .

Nwamònu's, wèwè mwangàte muntu utu misangu yònsò ànu wàmba nè: "Kaa, Mukalenge, ngùjèku nè bukolè, nènku nèmpatukè pambèlu apa, nè nèngiipatè badémòns." Kènakù nànsha mwà kucyènza to. Nzambi's mmumanyè bìmpè bikolè kutàmba bwà kweyemena muntu bu nànkù. Nwamònu anyi? Kènakù mwà kucyènza to.

²⁷³ Bitu ànu muntu udi kàyì naaci bwalu awu. Nudi numòna anyi? Ke muntu udi Nzambi mwà kwangata nè kumulongesha cintu kampàndà misangu mikwàbò. Nudi numòna anyi?

Ke pashìishe, Yudâàsà kwalukilayè wènda ùcyònkomoka, bòbò bônso, nè beena mènà...Yèyè nè: "Kanùsànkì mùdi

démions minùkòòkèle to, kàdi sànkàayi bwalu mènà ènù mmáfùnda mu...mu Mukàndà wà Mwoyi.” Mpindyewu, bu nwènù mwà kumòna nè kwangata kàbìdì Danyèlè. Bi... Nwamònu anyi?

Bwalu dîna dyèbè dîdi mu Mukàndà wà Mwoyi (bwalu dîdi mu Dyulu, dîna dyèbè ndijingùlùdiibwe), aci kacýèna ànu cyùmvwija nè udi musùngìdiibwe nànsa. Nwamònu anyi? Kwèna mukùdimùne mucìma to, too nè paùdi upeta Nyumà Mwîmpè. Vùlukàayi aci. Wèwè udi ànu mu mùshindù mushààdile cyanààna mukùdimùne mucìma. Nwamònu anyi? Kwèna. . .

²⁷⁴ Bu—bu wèwè mwà kundòmbakù mu—mucì wà lusànga nè mèmè kukupèèsha mùsà, mu mùshindù mushààdile udi nè mucì wà lusànga, mu mùshindù mushààdile, kàdi kî mmwanjì kudyunda to. Ke bwà cinyì ndi ngùtabuuja mu dikùbiibwa bu mùndì ngènza emu.

Mèmè—mèmè mulòmbe budimi bwà matalà, nè mmòna matalà bule nùnkù, mu mùshindù mushààdile, ndi nè budimi bwà matalà. Kî mbwanjì kudyunda to, cintu kampàndà ncifwànyine kwenzeka. Nwamònu anyi?

Mpindyewu, udi mu njila mu dibingishiibwa nè dijidiibwa ku dibàtiiza dyà Nyumà Mwîmpè. Kàdi paùdi mubàtìjìibwe mu mùshindù mushùwashùwàle nè Nyumà Mwîmpè, udi mu Bukalenge. Mpindyewu, wèwè udi wamba nè: “Mwanèètù Branham, aci ncilelèlà anyi?”

²⁷⁵ Mpindyewu, ncyèna nè díbà mpindyewu dyà—dyà kunùpèèsha Mufùndu to; wèwè ùcitàngila paùdi ufika kumbèlu, bwalu ncyèna mumanyè...meeji àanyi. Bikèngela ntàngilè paanyimà apa mu mukàndà wànyì wùdi nè nyàku yà dibala bwà kucyàngacilamù. Yesù wàkambila Peetèlò, uvwa mwenze byònsò bìbìdì musùngìdiibwè nè mujidiibwe awu... Wàkiitabuuja Yesù, wàkajidiibwa. Yone Munsantu 17.17, Yesù wàkamba nè: “Bàjidilè, Taatù, ku Bulelèlà; Dìyì Dyèbè dîdi Bulelèlà.” Nè Yèyè nè Dìyì bìdi cintu cimwècimwè. Bàvwa bajidiibwe, mu mùshindù mushààdile, ku Bulelèlà, Dìyì, Bulelèlà. Ke pashiishe, Yesù kwambila Yudaàsà, anyi—anyi, Peetèlò dilòlòlò dyà ditungila adi, kwambaYè nè: “Paanyimà pàà wèwè mukùdimùne mucìma, díbà adi ùkoleshè mwanèènù awu,” paanyimà pàà wèwè mumanè kukùdimuna mucìma.

²⁷⁶ Muntu awu ùvwa muMulonde munda mwà bidimu bisàtù nè ùvwa nè dîna mu Mukàndà wà Mwoyi wà Mwànà wa mùkòòkò, nè bàvwa biipàte baadémions, nè benze byenzi binène, nè bondope, nè bààkenza byà mìshindù yònsò byà... bààkayiisha Dìyì, nè bikwàbò byònsò, kàdi kabàyi ànu bakùdimùne mucìma to. Nwamònu nè... Udi mu njila mutàngile ku dikùdimuna dyà mucìma. Nwamònu anyi?

²⁷⁷ Mwànà udi...Pàdì cyenzi cyènzeka pankacì pàà—pàà diyì nè bilùmè, anyì mùtolokù... Kàdi pàdìbo... Mu mùshindù

mushààdile, mwànà awu ùdipù pàdì cyenzedi aci cyènzeka. Pashìishe mubidi awu wùdi wènda wùdyunda, mu citùpà ciibìdì; kàdì bidi bìkèngela bwà mwànà awu àlediibwe mwab'ewu, nè pashìishe ùdi wàkidila mupùùyà wà mwoyi. Kí ncyànji kwikala nè mupùùyà wà mwoyi to. Wèwè udi wamba nè: "Kaa, s'ùdi nè mwoyi!" To, kí nnànkù to! Aci's ke tujilu tukesè tùdì munkaci mwà kudinyònda, mapùndà. Nwamònu anyi? Mwànà awu kèna mwanji kupeta mwoyi to too nè pàdiye ùlediibwa. Nè udi mwà kutùpika nè kudinyònda, kàdì kwèna. . . Nwamònu's, nwamònu anyi? Bìkèngela ùlediibwè. Udi mumanyè cìndì muswè kwamba aci anyi? Èyo.

²⁷⁸ Mpindyewu, mpindyewu, yèyè wàkamba dìbà adi nè angàtà. . . "Wèwè wakamba nè Yudaàsà ùvwa nè dìnà dyèndè mu Mukàndà wà Mwoyi, kàdì nànsha nànkù, tudi bamanyè nè yèyè wàkaya mu ngenà nè wàkajimina. Mmuniyè mùdiku muntu kampàndà, dìbà adi, mwà kwikala nè dìnà dyèndè mu Mukàndà wà Mwoyi kàdì mwikàle ànu mujimìne?" Mpindyewu, lekèlaayi ngàngatè cikwàbò cintu cikesè muntwemu bwà muntu munanga ewu.

²⁷⁹ Mpindyewu mònaayi nè, Bible mmwambè nè pàakamòna Danyèlè. . . Yèyè—yèyè wàkafùnda Mukàndà wà kumpàlà wà Bwàkabuulwibwà, Danyèlè. Nènku tudi tumòna nè, mu cikèèna-kumòna yèyè wàkaMumòna ùlwa kùdì Mukùlùmpile wa cikondo mwena nsuki mitòòke zee bu myòsà yà mùkòòkò. Mbanganyi bàdiku bavùlùke nè mbabalè aci? Nènku nuvwa bamòne, Yone mu Bwàkabuulwibwà wàkalwa ku cintu cìmwècìmwè aci, Bwàkabuulwibwà 1? Nè Yèyè wàkiimana mwaba awu; nsuki Yèndè yìvwa mitòòke ànu bu myòsà yà mùkòòkò, makàsà Èndè nè mùshindù wùvwàbì bìmwèka—Mukùlùmpile wa cikondo. Mukùlùmpile cikondo, mbwena kwamba, kàvwa nè cikondo nànsha cìmwè to; Wa Cyendèlèlè Awu. Nènku Yèyè wàkalwa. . . Mpindyewu tàngilàayi's! Nènku bansantu bàakalwa pa buloba nè mikàndà yàkabuuludiibwa, nè Mukàndà mukwàbò wàkabuuludiibwa, wùvwa Mukàndà wà Mwoyi, mukàndà wùmwèpelè. Bàakalwa ku cilumbulwidi, nè. . . Yèyè wàkalwa, nè pàmwè Nèndè binunu dikùmi misangu binunu dikùmi kulwabi. Ncyà bushùwà anyi? BàMukwàcila mudimu, Mukàji-musèla awu, Mukalenge-mukàji nè Mfùmù. . .

²⁸⁰ Nganyi udikù webè mukalenge-mukàji mukesè mu nzùbu mwèbè? Udi ùkukwàcila mudimu wà cyàkudyà. Mmwómò anyi? (Cyùdì pashìishe bwàcì mpindyewu aci's.) Kàdì pàdiye—pàdiye ùkukwàcila mudimu apu. Ke cidi Mukàji-musèla ùkwàcila Kilistò mudimu ncyòci aci, Dìyì. "Muntu kààkwikala nè mwoyi ànu ku dyàmpà nkààyaadi to, kàdì ku Dìyì dyònsò." Nwamònu anyi? Yèyè ùdi ùsadiila Mfùmù nè Dìyì, ùmwenesha Dìyì Dyèndè dyà mulayì mu cikondo cidiYe nè mwoyi. Amen! Aa, ngàmbi cintu kampàndà mwab'awu, kanùvwa bacyùmvwè to, kàdì. . .

²⁸¹ Mònaay's! Kaa, ekèlekèlè! Aci's cìvwa cyà cìmpè. Nwamònu

anyi? Ûkwata mudimu mu cikondo, nè Dîyi. Mpindyewu mōnaayi's! Ke Yêyè kulwa...Yêyè kulwa, nè binunu dikūmi misangu binunu dikūmi kulwabi kùdiYe; nè cilumbulwidi cyàkatwàdija, nè mikàndà yàkabuuludiibwa; nè Mukàndà mukwàbò wàkabuuludiibwa wūdi Mukàndà wà Mwoyi; nènku bààkalumbulwishiibwa bwà bwalu abu. Ewu wàkalwa ewu nganyi? Mukàji-musèla uvwa kàyì nè cyà kupicila ku cilumbulwidi awu, Yêyè mmudishikàmìne ku cilumbulwidi.

²⁸² Mukàndà mukwàbò wàkabuuludiibwa wùvwà Mukàndà wà Mwoyi, nè aba bàvwà nè dìnà dyàbò mu Mukàndà wà Mwoyi abu byàkakèngela bwà kulumbulwishiibwabò mu Mukàndà awu. Nè Yudaàsà Mpongoloki awu wàkajikula mùvwàye mwena kwitabuuja, nè yêyè ùvwa nè dìnà dyèndè difùnda munkaci mwàbò mu Mukàndà wà Mwoyi. Ncyà bushùwà anyi? Ùvwa mwambè mùvwàye nè Mwoyi wà Cyendèlèlèlè. Nè dìnà dyèndè dyàkafundiibwa mu Mukàndà wà Mwoyi. Pa nànkū bikèngela bwà yêyè...Mōna's, bìdi bikèngela dībà adi bwà àlumbulwishiibwè bwà kumōna nè wàkapiisha Dîyi dyà Mwoyi dībà adi bwà cinyi, kuMusùmbisha ku binjànja byà mfrangà makūmi àsàtū. Bàmwè bàdi bàsùmbisha bwà kwikala ba-Méthodistes, ba-Baptistes anyi bikwàbò abi. Musùmbishe kaaba kèndè ku Mukàndà wà Mwoyi. Nè yêyè neàlumbulwishè...neikalè nè cyà...neàshaalè mwimàne mwaba awu nè àlumbulwishiibwè ku cyòci aci, ku Dîyi. Nwamònu anyi? Ke bwà cinyi byàkakèngela bwà Yudaàsà àcyènzè. Nwamònu anyi? Yudaàsà ùdi nè cyà kupicila ku cilumbulwidi. Dìnà dyèndè divwa mu Mukàndà wà Mwoyi, kàdi aci kaciyèna cyùmvwija nè yêyè mmusùngìdìibwe to. Bikèngela yêyè imanè ku cilumbulwidi.

²⁸³ Virgò mukùtākàne awu neimanè mwaba awu mene mwīnshì mwà bintu bimwèbimwè—bimwèbimwè abi. Mōnaayi nè, Yesù wàkamba mu Yone Munsantu 5.24 nè: “Ewu udi umvwa Dîyi Dyànyi.” Awu ng'ewu udi mwà kuDyàkidila awu; kī ng'ewu udi ànu uDitèèleja diyīishiibwe kàdi ùtūngunuka nè kwamba nè: “Macimbu's.” Nwamònu anyi? “Ewu udi wakidila Dîyi Dyànyi, Ewu udi umvwa Dîyi Dyànyi nè wītabuuja (kàyì wītabuuja byà budingibudingi to, kàdi wītabuuja cyà bushùwà) Ewu uvwa muNtūme (cīvwà Dîyi adi) ùdi nè Mwoyi wà kashidi nè kàakupicila ku cilumbulwidi to; kàdi mmumanè” (cikondo cipite) “kuumuka ku lufù muyè ku Mwoyi.” Nwamònu anyi? Ke cyòci aci.

²⁸⁴ Pa nànkū Yudaàsà ùvwa nè dìnà dyèndè mu Mukàndà wà Mwoyi (aci's ncyà bushùwà menemene), kàdi yêyè wàkapiishiibwa, bwalu cyàkènzàye ncinyi? Wàkasùmbisha makenji èndè à bwanaàbutè.

Esawù wàkalediibwa mu dīkū nè mulayì wà Nzambì. Mwànà wa balūme mukùlumpile bōnsò ùvwa ne bukenji bwà bwanaàbutè. Mbanganyi bàdi bamanyè nànkū? Ku mulayì wà

Nzambì, dìnà dyà Esawù divwa mu mukàndà bwà bukenji bwà bwanaabutè (ncyà bushùwà anyì?), kàdi yéyè wàkabùshintakaja ku citàpitàpì cyà maòji à mpàta, anyì nkùndè. Mwikale nè nzalà yà kuuja difù dyèndè, tiké wendè wà cyàkudyà, wàkashintakaja makenji èndè à bwanaabutè ku tiké wa byàkudyà kàdi kàvwakù mwà kupeta mwaba wà kunyingalala to.

²⁸⁵ Batentekedi bàakaya abu...bwà kutentekela buloba abu kuntwaku kulwabo nè kudyà mene tumuma twà mvinyò tùvwà Yoshùwà nè Kaalèbà bàalùkile naatù atu. Kàdi nànsha nànkù, bààkenza cinyi? Bààkasumbisha makenji àbù à bwanaabutè.

²⁸⁶ Yesù wàkamba, anyì Pòlò wàkula nè disonsodiibwa dyà Kilstò mu Ebèlù nshapità mwi6 nè: “Bwalu kabyèna mwà kwenzekakù to bwà aba bàkaavwà bamanè kuenkeshiibwa, nè bavwijiibwe baabanyanganyi bàà Nyumà Mwímpè, nè balabùle Bukolè bwà buloba bùcilwalwà; bôbò badishinde, bwà kudyàlujululabò cyàkàbidì ku kanyinganyinga, pa kumòna nè bàdi bàpoopela bôbò biinè Mwànà wa Nzambì pa nkùrusè, nè kubala Mashi à cipungidi, àvwàbò bajidiibwekù awu, bu cintu cyà pàtupù, nè mumane kudyombola midimu yà ngàsà...” Kabyèna mwà kwenzekaku to bwà muntu awu kwalukilaye.

²⁸⁷ Bôbò abu, muntu nè muntu pa kuumusha Yoshùwà nè Kaalèbà, bàakafwà nè bàakabütuka mu cipèèlà aci, nànsha nànkù bàvwa beena kwitabuuja, nànsha nànkù ménà àbo àvwa mu mikàndà.

²⁸⁸ Nènku apa, Pòlò wàkula, muntu yéyè ànu mufikè mu cipidi cyà nè mmusùngidiibwe, nè mujidiibwe (Mashi àdi àjidila; Ebèlù 13.12 nè 13 ùdi wàmba nè Mashi àdi àjidila), nè pashiishe kubànda buludì ku ciibi cyà dibàtiiza dyà Nyumà Mwímpè, nènkù bwà lumù anyì dīgumba ùbenga kwendelaMù, yéyè nè: “Muntu awu mmujimine nè kèna mwà kusùngidiibwakù to” (nwamònu anyi?); bwalu yéyè mmudyatakàje ku makàsà byenzedi mene byà ngàsà byàkamubiikila ku mwaba awu nè kumuleejabì, nè pashiishe kukùdimuka, kuumukakù. Yéyè ùdi wàngata Mashi à cipungidi àvwàye mupoopediibwe pa nkùrusè awu...àvwà Kilstò mupoopediibwa pa nkùrusè awu bu cintu cyà pàtupù. Bwalu Mashi àvwà mamusùngile awu, nè kumubingisha, nè kumujidila àdi àmufikisha ku dibàtiiza dyà Nyumà Mwímpè. Nè pashiishe kuumuka kuya nè kuàshiya... .

²⁸⁹ Mpindyewu, tàngilàayi citembelu aci. Ndi ngàngata dībà dyàbùngì, kàdi tàngilàayi's! Yudààsà Mpongoloki awu wàkalonda bifundu bimwèbimwè abi. Wàkabingishiibwa mu kwitabuuja Mukalenge Yesù nè pashiishe kuMwitaba bu Musùngidi wendè sungasunga. Yéyè wàkajidiibwa nè wàkapèbwa bukolè bwà kwipata nyumà; kufùnda dìnà dyèndè mu Mukàndà wà Mwoyi wà Mwànà wa mùkòòkò. Kàdi pàakafikàbi ku Mpenta nè dibàtiiza dyà Nyumà Mwímpè, kaabujimà kàà Dìyì, wàkaleeja civwàye. Ke cyòci aci menemene

cyàkenzà batentekedi bàà Kaanààna abu; ke cyôci aci menemene cyàkenzà Esawù.

²⁹⁰ Ke cyôci aci menemene cìvwà Sàtaanà mwenzele Evà mu budimi bwà Edènà nè: “Bulelèlà Nzambi kààkwenzakù to. . .”

Kàdi yéyè kwamba nè: “Nzambi mmwâmbè. . .”

Yéyè nè: “Èyowà, ndi mumanyè nè cidi cyâmba *nàнку*; ndi mumanyè nè cidi cyâmba *nûнку*, kàdi ncyà bushùwà nè. . .” Nwamònu’s, cintu cìmwècìmwè aci too nè ku ndekeelu, ke mùdibi kàbìdi leelù ewu.

²⁹¹ Èkèleeziyà mmulondè mu Dibingishiibwa, Martin Luther; ku Dijidiibwa, Wesley. Kàdi cidi, pàkaadibi bikafika ku cikondo cyà dibàtiiza dyà Nyumà Mwîmpè, bàdi bàleeja cidìbo; kabèèna Nendè bwalu to. Nazaréen, Pèlerins de la Sainteté, Église de Dieu, bônso bàdi bìtabuujà dijidiibwa abu, kwèna mwà kufunkunaku munu to; mbulelèlà. Kàdi pàkaadibi bikafika ku mukalu, kubànda buludì pa kaaba aku bwà kupeta Nyumà Mwîmpè bwà dileidiibwa dipyadipyà, dîbà adi dyabùlù mmufwànyine kwenza cinyi? Ùdi ùseemena pabwîpì nè kuteeta bwà kucikònyangaja. Kaa, yéyè ùdi. . . yéyè neenzè byònsò bìdì mu bukòlè bwèndè bumanya abi bwà kulama bantu kule nè mwaba awu.

²⁹² Kwalukilabò mwaba awu nè, kwamba nè: “Bikèngela wàkule mu myakulu. Bikèngela wikale nè disaluka kampàndà. Bikèngela wènzè *cikampàndà*.” Bikèngela wikale mulediibwemù. Muntu nànsha umwe kàkwambidiku nè dijidiibwa nè Nyumà Mwîmpè ncintu cìmwècìmwè aci to, bwalu kí ncyôci to! Nànsha kakesè!

Tèèlejàayi ba-Nazaréens aba lwà paanyimà apa bèèla mikunda nè: “Kí nnàнку to.” Nwamònu anyi? Yéyè mmumanyè nè kùdi dishiilangana mu cyôci aci, bwalu mmùdibi cyà bushùwà. Mwanèètù Capps, mwanèètù wa bukitù awu. Nwamònu anyi?

²⁹³ Cyà bushùwà, ba-Nazaréens. . .Kakwèna muntu nànsha umwe udi mwà kwamba diyì dibi bwà batèndeledi balenga abu to; mbîmpè ànu nè mwàbò mwònsò. Église de Dieu, ba-Nazaréen, ba-Méthodistes Badishikàmìne, bantu abu mbalelèlà, kàdi pàkaadibi bikafika ku byenzedi byà Nyumà, bàdi bàmba nè: “Kaa, kaa, s’ki dyabùlù nyéyè awu.” Kàdi cidìbo mwà kwenza mwaba awu ncinyi? Bàpenda Nyumà Mwîmpè. Pàdìbo bènza nàнку apu. . .

²⁹⁴ Mpindyewu, dipenda dyà Nzambi ncinyi? Kakwènakù difwidiibwa dyà luse to. Ncyà bushùwà anyi? “Ewu uvwakù musangu kampàndà mukenkèshiibwe, muvwijiibwe mwabanyanganyi, nè mulabùle mapà à ku dyulu.” Mwabà-. . . Mulabùle—mulabùle dijidiibwa dyà Nzambi: musukula ku mfwankà, nè ku bakàji bakooyike, nè mwoyi wà mishindù yònsò wà mùshindù awu. “Nè balabùle bintu byà mu dyulu.” Bwà

kumòna nè bàdi bènda batàngile ku mikàlu ayi bu mwàkenza batentekedi bàakadyà citùpà cyà tumuma twà mvinyò abu. Kàdi bìdi bikèngela bwà kwenzabo cinyi? Bìvwa bikèngela bwà kunyangabo dīngumba dyàbò bwà kubwelabo mu cyòci eci. Nwamònu anyi? Ambàayi. . . Nwamònu anyi? “Balabùle mapà à mu dyulu; pa kumòna nè bàdi bàpoopela cyàkàbìdi bòbò biine Mwànà wa Nzambi pa nkùrusè; nè kubala Mashi à cipungidi àvwàbo bajidiibwekù awu bu cintu cyà patupù.”

²⁹⁵ Dijidiibwa mpàdi dīnà dyèbè dīya mu mukàndà bu mwena kwitabuuja. Dīyì dyèbè. . . Dīnà dyèbè ndifūnda mu Mashi Èndè. Nwamònu anyi? Dijidiibwa ndidi dyenza nàнку; nè ubànda, pàdiYe mukweyèmene too nè mwaba awu, nè pashiishe kubànda. . . Bàdi bàmba nè: “Èè, Yèyè mmufwànyine kucimanya anyi?”

²⁹⁶ Èyowà, Yèyè’s ùvwa mucimanyè. Ùvwa mumanyè nè kùvwa mwà kucyènza ku cibangidilu to. Ùvwa mumanyè nè Yudaàsà kàvwa mwà kucyènza to. Yèyè ùvwa mumumanyè ku cibangidilu; nè yèyè ùvwa mwànà wa kabùtù. Kàdi bikèngela cintu aci cyùlè. Nwamònu anyi? Bikèngela bwà Dīyì dyùlè, bònsò, nànsha nàнку bifwànyikijilu nè mindidimbi. Kaa, ekèlekèlè! Tudi bafwànyine kushàalapu munda mwà mèbà.

370. Mwanèètù Branham, pawàkafila mukenji pa mbingu makùmi mwandamutekète yà èkèleeziyà. . . mbingu makùmi mwandamutekète (Mfwilaayiku luse.) yà Danyèlè, ndi ngèèla meeji nè uvwa mutèèle bwalu abu nè lumingu lujimà—lujimà lwà ndekeelu anyi bidimu mwandamutekète byà ndekeelu nelùbangè pààngaciibwà Mukàji-musèla mu Dyambwibwa.

²⁹⁷ To, to, to, to, to, bwàlà, bwàlà, bwàlà! Nudi bacyùmvwè bibì (nwamònu anyi?), kī mbingu mijimà mwandamutekète ayi to. Lu—lumingu lwàkabanga pààkalwà Yesù pa buloba. Yèyè wàkamba nè: “Maasiyà, Mfùmù, neálwe kwamba cipròfetà, nè munkaci mwà mbingu mwandamutekète, Yèyè neàkoshiibwè.” Nènku Yesù wàkayiisha ànu menemene bidimu bisàtù nè citùpà, cidì ciikàle citùpà cyà mbingu makùmi mwandamutekète, matùkù mwandamutekète, à lumingu—matùkù à lumingu. Nwamònu anyi? Nènku nkushàale bidimu bisàtù nè citùpà.

²⁹⁸ Mpindyewu, pàdi Mòsà nè Eliyà bàlwa pa buloba, cidì ciikàle Bwàkabuulwibwà nè Zekàayi. . . (Mwanèètù Coomer lwèbè—lwèbè lukonko nè lwà Mwanèètù wa bakàji Coomer yivwà yà mwomùmwe.) Mpindyewu, pàdibo. . . Pàdi Zekàayi 4 nè Bwàkabuulwibwà 11, micì ya olèvà yibìdi ayi nè bikwàbò, yidì Mòsà nè Eliyà ayi, pàdibo bàlwa pa buloba bàdi bàmba cipròfetà munda mwà matùkù cinunu nkàmà yibìdi nè makùmi àsambòmbò nè ànaayi. Ncinyi aci? Ànu bidimu bisàtù nè citùpà bulubulu. Aci’s cívwa ànu cintu cìmwècìmwè aci menemene. Kacyi. . . Nwamònu anyi? Muntu munanga ewu nànsha mwikàle

nganyì. Lulenga kumòna menemene, menemene, lufùnda—lufùnda pa dibèji mutù wà mfùndilu wa butèndeledi mufùnda—milongo apa nè bikwàbò, nènku mbìmpè bitàmbe. Nènku's ndukonko lulenga lwà dikèma, kàdi (nwamònu anyi?) kùvwa mucyùmvwè menemene, címvwà mwàmbè aci to. Ncivwaku ngùitabuuja nè mbingu yònsò makùmi mwandamutekète yivwa mifwànyine kwikala lwà apa to. Maasiyà mumanè kukòshiihwa. Mbanganyì bàdi bavùlùke aci mu kuyiisha kwà mwab'ewu? Cyà bushùwà's! Nwamònu anyi? Mbingu mwandamutekète.

371. Kubangila ànu díbà adi, bìdi bìmweka ànu bu nè bidimu bisàtù nè citùpà byà kumpàlà abi bìvwa byùle mu mudimu wà bwambi (Èè, s'ki wèwè ewu mucyàmbe bìmpe kaaba aka.) wà—wà Yesù, kàdi cyakwidi aci nè: “munkacinkaci mwà mbingu” mbimwèke ànu bu nè mbyàngàcìbwe bwà dishipa dyà cipungidi dyà mufwilakanyi nè Kilistò nè... (To, mufwilakanyi nè Kilistò awu ùdi ùshipa cipungidi cyèndè ku ndekeelu kwà bidimu bisàtù nè citùpà byà ndekeelu. Nwamònu anyi?) Bu mungàakumvwà pa mukàbà wà Danyèlè nè, mbingu makùmi àsambòmbò nè citèemà yà mbilangilu ayi yàkajika pàakabwela Yesù mu Yelusàlèmà mu cidimu cyà 30 cyà cicyà cyètù eci, mu mùshindù wà nè bidimu bisàtù nè citùpà byà mudimu Wèndè wà bwambi bìvwa mwà kubwejiibwa mu mbingu makùmi àsambòmbò nè citèemà; nè mbingu mijimà yà ndekeelu—nè lumingu lujimà lwà ndekeelu anyi bidimu mwandamutekète mbifwànyine ànu kwikala byùjiibwe nè mbifwànyine kutwàdija ku Dyambwibwa. Bu wèwè mwà kuswa ntòokèshèlèku cintu eci.

²⁹⁹ Udi mumanyè's, mwanèètù wa balùme, mwanèètù wa bakàji, nànsha yèyè nganyì udi mwelè lukonko elu awu. Bilenga be (nwamònu anyi?), kàdi ndi ngèèla meeji nè udi nè ndambù wa cibwejàkàji pa bìndi mwàmbè. Nwamònu anyi? Mpindyewu, kùdi... Pàakabwela Yesù mu Yelusàlèmà (aci's ncyà bushùwà menemene), aci's civwa ndekeelu wa... Nwamònu anyi? Yèyè wàkabwela buludì mwómò amu nè kupoopediibwa pa nkùrusè. Nwamònu anyi? Nè Yèyè—Yèyè wàkamba cipròfètà mu citùpà cyà mbingu makùmi mwandamutekète cìdì ciikàle bidimu bisàtù nè citùpà. Mpindyewu, Yèyè wàkakòshiihwa, nè musùuka Wèndè wàkawwiibwa mulàmbù. Nè mpindyewu, kùvwa mwà kulwa díbà adi... Mu matùkù à ndekeelu aa, kùcìdì bidimu bisàtù nè citùpà bìcìdì ànu bilaya beena—beena Yudà. Nè kùdi... mu cikondo eci kùvwa disangishiibwa dyà bansantu bwà dyambwibwa, Èkèleeziyà awu.

³⁰⁰ Mpindyewu, ncyàkujikija yònsò eyi to, Mwanèètù—Mwanèètù wa balùme, Mwanèètù wa bakàji.

372. Bu wèwè mwà kuswa umvwijaku Kolintò wa Kumpàlà, nshapità wa 7, mvensà 1 nè 9? (Mwangàta, Mwanèètù

Neville, Kolintò wa Kumpàlà, nshapità wa 7, mvensà 1, mpindyewu.)

- 373. Nè mwena kwitabuuja mulelèlà yònsò ewu neénzè byenzedi byákambà Yesù abi, bu mùdici cyambiibwe mu Yone Munsantu 14.12 (Kí nnànku menemene to. To!): kwondòpa babèèdi, kwípata baadémons, kujuula bafwè (Ncyèna ngèèla meeji nè aci mmu Yone Munsantu 14 to, kàdi cidi ànu cimpè. M'Maako 16.), anyi—anyi—anyi eci cidi ànu nè cyà kwikala Eliyà? Mwena kwitabuuja ùdi nè cyà kwenza byònsò bìdi...byà eci...kwenza bulelèlà...udi bulelèlà mwitabùùje anyi? Nènkù yèyè mwikàle bulelèlà mwena kwitabuuja mulelèlà, neājuulé bafwè nè neénzè bishimà binène anyi?**

³⁰¹ Mpindyewu, aci cidi munkaci mwà beena kwitabuuja. Nwamònu anyi? Muntu yònsò kèna nè mapà awu to, nè kèna ùswa kwamba nè ànu muntu umwe neàcyènzè to; nekwikale tusumbù twà bantu. Bu cileeji, ambaàbi tũng bu—bu nè tuvwa nè mwànà mukesè wa bakàji mu èkèleeziyà emu, anyi mwànà mukesè wa balùme, anyi muntu kampàndà utùdi banangè bimpè menemene, nè mwoyi mufwànyine kupàtuka munda mwèndè. Èkèleeziyà mujimà's mmufwànyine kudisangisha pàmwè, nè bàdi mwà kudítwa mu kusambila nè kujila byákudya nè: “Mukalenge, ikàlàku luse nè mwànà awu.” Nwamònu anyi? Nzambi ùvwa mwà kumubiisha's.

³⁰² Mbanganyi bàkaadiku babalè *Baataatù Bàà Nicée* nè bakwàbò abu? Nudi bamanyè's, mùshindù awu ke wàkacyènzàbo mu èkèleeziyà wa ku cibangidilu. Mbafwànyine bònsò kudisangisha pàmwè, nudi bamanyè's, nè kubiisha mene mpaasàtá wabò ku bafwè nè bakwàbò bashiilàngàne mùshindù awu's, piikalàbi nè Nzambi mmumòne bikumbàne bwà kucyènzà; kàdi's bàakacyènzà.

- 374. Èkèleeziyà yèyè musungidiibwe nànsha kàyi ùya mu Dyambwibwa amu to, mùndi ngiitabuuja nè mmuwàkalongesha, ùdi nè cyà kupicila mu dikènga dinène bwà dikezudiibwa. Kàdi bìshi bwà aba bàdi bafwè, nebàkezudiibwè munyi's?**

³⁰³ Èyo. Aba bàdi nè aci...Mukàji-musèla kèna dijinga nè dikezudiibwa to; Ùkaadi mumanè kukezudiibwa. Nè aba bàdi—bàdi—bàdi bafwè kale wàwa, aba bàdi bàpicile mu... Nwamònu anyi? Kabàvwakù baakidile Bukènkè bùvwà èkèleeziyà eyi myakidile kuntu eku; bàvwa basòmbèle mu Dibingishiibwa dyàbò, Dijidiibwa, nè bikwàbò byà mùshindù awu. Bàvwa nè mwoyi ku Bukènkè bwàkadibo naabù, pàmwàpa mu—mu mùshindù wàkàkèngabo awu, nè mu cyònsò cyàkàpicilabo aci, mu dikèngeshiibwa dyàbò adi. Kàdi mpindyewu, mu cikondo cyà dyambwibwa eci nùnkù (nwamònu anyi?), nekùlwe cikondo kampàndà mpindyewu ciikalà mukàji-musèla ewu

mwà (cidi cipidya citùpà cyà Mutù wà Mukàji-musèla aci) neàkengè bwà dimupidya dyèndè adi, bwalu Èvànjeeliyò kàvwa mutòòkèshìibwe kùdìbo kale awu to, mùdiye mutòòkèshìibwe kunùdi leelù ewu emu. Nwamònu anyi? Nudi nucimòna bitòòke tòò. Wèwè's ukaavwa mumane kwenza bidimu byònsò abi nè bileejilu, Bitampi bikàngula, Cikondo cyà Èkèleeziyà cimana kuleeja, nè byònsò mùshindù awu. Ncitòòke tòò mu mùshindù wà kùyiku mwà kucipangila to. Nwamònu anyi? Nènku díbà adi, wèwè mucipidyè mu kaabujimà, kùdi cintu ànu cimwèpelè cyà dyenza, kukènga bwà bwalu abu.

³⁰⁴ Udi múmwwe aci anyi Mwanèètù Neville? Cidi citàngila cinyi? Ndi ànu. . . Mbìmpè bwà nye mpindyewu, bwalu díbà dikaadi dyènda dìpita bikolè. Nudi numòna anyi? Ndi. . . Mwandamutekète—mwandamutekète, citèemà. . . Tùmonèbi.

*Kàdi bóbò kabàyi mwà kudìkanda to, bàlekèlaayi
bàsèlè: bwalu mbitàmbe bwìmpè kusèla pamutù pàà
kwoshika.*

³⁰⁵ Èyo. Aci mbwà nsòmbelu wa manyaanù. Pamutù pàà muntu kampàndà, mwànà wa balùme, mwànà wa bakàji, anyi cintu kampàndà anyi cikwàbò pàdìbo bàseselangana nè—nè bamanyè nè bìvwa bikèngela kwikalabo basèlàngàne, ndaayi kumpàla nè nùselangana. Ngèèla meeji nè udi—udi mufwànyine kuumvwa cindù njinga kwamba aci, kí mmwómò anyi? Nwamònu anyi? Kanwikadiku ànu nè nsòmbelu wa bukooya mwaba awu to, bwalu kí mbìmpè to. Nudi numòna anyi? Awu's mmwanèènù wa bakàji mu cyumvwilu kampàndà, paùdi mwena Kilistò. Mpindyewu, cyòci ciikàle bàà pa buloba, mbà pa buloba's: mbwa ùdyaadya mbwa nendè. Kàdi nsongààkàji ùdi upàtuka nendè ewu, mmwanèènù wa bakàji kàbidi. Yèyè ke wíkala mamwèndè wa bàna bèèbè—bèèbè bààlwà abu. Kùsòmbi nendè nsòmbelu wa bukooya awu to, leejà nè udi mwena Kilistò mùkàlàngà. Ikàlà nè nsòmbelu uvwa ukèngela bwà mwena Kilistò mùkàlàngà kwikalayè nendè. Nwamònu anyi? Nènku mubalè bu mwanèènù wa bakàji, nè panwàsèlangana, tùngunuka ànu nè kumubala mùshindù awu.

³⁰⁶ Ndi mufwànyine kwandamuna ku bwalu ebu mpindyewu mene. Ncyèna ngiitabuuja nsòmbelu wa bukooya awu munkaci mwà beena Mpenta, beena cijila to, nànsha bóbò basèlàngàne. Mèmè nciu ngiitabuuja abi to. To, mukalenge! Bimwè byà ku bintu byà bukooyà bidi—bidi bikwàcishà bwòwà bwà dikèma ebi. . . Ntu mbwela munwemu emu misangu mikwàbò pa ebi. . . Kí mmu dindà emu mpindyewu to, to, ncyèna ngàmba nàнку to. Kàdi ndi njinga kwamba nè mu bikondo bìntù nsanganyibwa mu Californie mwàmwa nè mu myaba mishilèshilàngàne yà mùshindù awu. Ntu ntwìlangana nè bambi kuntwaku, mu dijingulula amu, ndyùmvwà bu nè ndi mwà kubàlàadika pa binu byànyì apa kàdi kubànàngula “ntoota yà mapì à dishidimuna à Èvànjeeliyò.” Eyowà's, mukalenge! Èkèlekèlè, pa kumòna

muntu mulùme udi mufwànyine kuteeta kwangata mukàjèndè mukesè awu, nè manyaanu, nè bukooyà, mbwena kwamba nè. . . Nudi bumvwè cîndi muswè kwamba aci's. Ngèela meeji nè bivwa bikèngela bwà wèwè kudyùmvwa bundù bu muntu wa Nzambi bwà. . . Ikàlà wèwè ànu bàyendè; ikàlà munanga wendè. Muneemèke ànu mûtù umuneemeka misangu yònsò amu. Lekèlà kutùma ntèmà nànsha mikesè ku bintu ebi, bimwè byà ku bintu byà buse- . . . mikàndà yà maalu à bulùme nè bukàjì, anyi bintu byà bwenji bìdì mu mikàndà yà maalu à bulùme nè bukàjì ebi, nè bintu byùdì ubala pa bwalu ebu ebi, nè bintàkanyi byònsò ebi, nè bintu byònsò byà mùshindù awu. Pàtulà bintàkanyi byà bukooyà abi mu meeji èbè.

³⁰⁷ Bible mmwambè nè kanùlekedikù muyiiki wà manyaanù nànsha wùmwe wùlwa munkaci mwènù to panùdì nujikula cijila. Balà inàbànzà mukesè awu bu nè mmunanga webè mukesè. Nànsha yéyè nè bidimu makùmi àsambòmbò, wèwè ikàlà ànu mùshindù wùmwe wùmwe awu. Ikàlà wèwè ànu mulundà mulùme wa bukàlàngà awu; wavùluka nè, ke cyùdì.

Kùteecikù nànsha cimwè cyà ku bintu bipyabipyà ebi to, nè mémè ndi mumanyè cîndi ngàmbe eci. . . Nènku wèwè ikàlà ànu bàyendè, mwanààbù wa balùme mushùwashùwàle, mwena Kilistò mushùwashùwàle.

Ndi mumanye nè aci cìdì cyùmvwika. . . Kàdì. . . Nwènù's nudi bàna bàanyi. Ndi nè bukenji bwà kunwàmbila cîndi muswe kunwàmbila aci. Nudi numòna anyi? Nwènù's nudi bàna bàanyi; ikàlaayi nwènù nè nsòmbelu mujaalàme.

³⁰⁸ Nè nwènù bakaji pèènù, ikàlaayi nè nsòmbelu mujaalàme kùdì baabàyeenù. Nè nwènù balùme, ikàlaayi nè nsòmbelu mujaalàme kunùdì. . . kùdì—kùdì—kùdì bakàjì bèènù. Ikàlaayi nè nsòmbelu mulenga menemene, menemene nè nuneemekangana muntu nè mukwèndè nè. . . Nè dipetangana dyènù dyà mu dîkù nè bikwàbò byà mùshindù awu, bìikalè ànu nè kaneemu kònsò, nè difwàna dyà Nzambi, nè bapunge dîyì munkaci mwènù nè bikwàbò byònsò nè mwàbì mwònsò. Kanùsàkidyanganyi to, kanùsùkumyanganyi to, nè—nè bukooyà nè cyakwidì cyà bushàadile nànsha.

³⁰⁹ Umvwàngànaayi, yikilàngàna nè mukàjèèbè. Piiikalà—piiikalà ngiikàdìlù kampàndà kùdì nè ngiikàdìlù mukwàbò kùdiye, yikilàngàna nendè pa bwalu abu. Wèwè—wèwè ùteete kwenza cintu cimwècimwè aci bwèndè yéyè, wèwè mwanèètù wa bakàjì. Nè mùshindù wùmwe wùmwe awu. . . Umvwàngànaayi muntu nè mukwèndè nè ikàlaayi—ikàlaayi balùme balelèlà bakàlàngà beena Kilistò nè bainàbànzà balelèlà beena Kilistò, nè—nè bìikalè mwanèètù wa balùme nè mwanèètù wa bakàjì pàmwe ewu kùdì mukwèndè. Nwàvùlukaayi misangu yònsò nè, nudi bàna bàà Nzambi, nè nudi bàà mu Dîkù dyà Bukalenge. Nudi mashi à bukalenge; kakwènakù mashi matàmbe bwìmpè

pa buloba kutàmba ènù awu to. Nè aci's ncyà bushùwà! Kàdi's mashi à bukalenge àtu àdileeja. Ke cidiwu aci's, ngàà bukalenge. Bônso bàdi biitabuujà nàнку bàmba nè: "Amen." [Disangisha didi dyàmba nè: "Amen."—Muf.] Èyowà's, mukalenge! Leejà cyùdi aci. Mémè ndi...Mémè ndi...Mémè ndi mwànà wa Mfùmù, mémè ndi mwànà wa Mfùmù awu. Mukàjàànyì's mmwànà wa bakàji wa Mfùmù. Mmunyi mùndi mufwànyine kubala mwànà wa bakàji wa Mfùmù awu's? Mmunyi mùdiye mufwànyine kubala mwànà wa balùme wa Mfùmù awu's? Nudi bamòne cìndi muswè kwamba aci anyi? Ikàla wèwè ànu mushùwashùwàle wa menemene.

375. Nekwikalèku nkwaka wà Nyumà Mwimpè, bimanyinu, nè maalu à kukèma, nè bishimà byènjiiwba kùdi Mukàji-musèla kumpàlà kwà Yèyè kuumuka kuya, anyi tudi bindile ànu dimwènèka Dyèndè?

³¹⁰ Nebikègelè bwà njikijilè pa elu, ngèèla meeji, bwalu ndi naayi mipite búngi kaaba aka yà kwangata. Dìbà pàadi ndiye dipange nè mwà kuya. Nkushààdile tusunsa makùmi àbìdi too nè dìbà ùmwè mpindyewu, pàanyi ndi naayi yipacila ku makùmi àsàtù anyi ànaayi pàmwàpa kaaba aka, pàmwàpa. Nèngàdamunè elu nè mwànyi mwònsò mu dìbà dìndi nadi edi. Ndi...kwangata ànu tusunsa tùsàtù tùdi tùlondà etu. Nèngàngatè eyi pangùkàla mwà kufùdisha. Nwamònu anyi? Ncyèna mumanyè nè ndìbà kaayi dìndi mwà kuyàngata to; nèngènzè nè mwànyi pàanyi mwònsò. Nudi nusànka naayi anyi? Ndi...Bìdi binkwàcisha mémè pàanyi. Nwamònu anyi?

Bwà kulwa apa nè kuyikwàta mùshindù ewu, kumpàlà mene kwà nwènù kutàngila munda mwàyi (nudi numòna anyi?), udi upeta bintu kampàndà byùdi kùyiku mwà kwandamuna to, nènku—nènku mvwa—mvwa mu ditèkemena dyà nè mvwa mufwànyine kwangata...Ndi mumanye nè kùdi lùmwè muntwemu lùdi lùtàngila dimiinu dyà nyòka. Mvwa muswè kulwàngata bikolè be; mvwa muswè kulùumvwija. Nwamònu anyi? Kàdi ndi ngèèla meeji nè ndi ànu mulùpangile's, pa nàнку nèngùikalè ànu nè...Pàmwàpa Mukalenge kí mmuswè bwà kwenjiibwabi mùshindù awu nànsha, kàdi civwa mpa dimiinu dyà nyòka. Bwà muntu kampàndà pa mukàbà wà méyi awu kàlu kwamba nè: "Èè, yèyè wàkacyenza, wàkalùcinguluka." Mbanganyi bàdi mwà kutwàla kàbìdi tukwàbò tusunsa tùbìdi bwà bwalu abu? Huh? Èyo.

³¹¹ Mpindyewu indilaayibi, lekèlaayi ngànji kwangata elu dyàmbedi. Tùmonààyibi's! "Nekwikalè kùdi—kùdi...?" To. Lukonko lùdi apa elu lùdi nè: "Nekwikalè bishima byenza kùdi Mukàji-musèla anyi?" Èyowà's, mukalenge! Bìdi munkaci mwà kwenjiibwba patùdi twakula apa mene. Ncyà bushùwà! Nwamònu anyi? Kàdi kanùkèbikù cintu kampàndà cyà cinène cyà, anyi kutùulula maulu nè kukanga maulu, bwà mvùla kàlòkikù to. Aci ciyaaya mu—mu beena Yudà mpindyewu.

Nwamònu anyi? Aci kacyèna citàngila mpindyewu to nànsha kakesè; awu's m'Mòsa nè Eliyà bwà beena Yudà, kí nkùdi Èkèleeziyà ewu to nànsha kakesè. Balàayi nshapità yisàtù yà kumpalà yà Bwàkabuulwibwà ayi; nudi nuumvwa cidì Èkèleeziyà wikalangana ànu mwaba awu mene. Ke cyònsò cidìku bwà Èkèleeziyà aci. Nènku pàdiye wàlukila pàmwè nè Mukàji-musèla, pàdiye wàlukila nè... Balàayi... Nwènu baswè kumanya bwalu bwà Èkèleeziyà, cidì ciMutàngila, balàayi Bwàkabuulwibwà nshapità yisàtù yà ntwàdijilu ayi, nè pashiishe ndàayi lwà ku nshapità wa 19 kàdi nubangè kubadila kwinè aku. Dìbà adi nudi nupeta Mukàji-musèla. Bikwàbò byàci abi bìdi mu beena Yudà amu.

³¹² Mpindyewu, kùdi dimiinu dyà nyòka. Ncyèna mwà kucipeta mwômò *emu* to, bwalu, nudi numòna's, cidì ànu mushiki munène cyanààna wàyi. Kàdi muntu awu mmwàmbè nè: "Pìikalà nyòka—pìikalà dimiinu dyà nyòka..." Nwamònu's, mukàji awu. "Yèyè—yèyè's mmupetèle mwànà wa balùme kùdi Mukalenge, mwàkambàye nànkù."

Èè, ngèèla meeji nè ndyàlumingu dishàale edi, mèmè kumvwija mùshindù wàkamupetelàye kùdi Mukalenge. Pìikalàye ànu nè mmumupete, mmumupetèle kùdi Mukalenge, nwamònu's, bwalu bìvwa bikèngela bwà kulwilabi kùdi Mukalenge, bwalu mukenji wà Nzambi wùdi nè, newikale—newikale mwà kutùmikila Nzambi, menemene.

³¹³ Yèyè ngwakatùma dìyì bwà dìbà kuteemadi, nè dìbà didi diteema. Ùdi ùtùma dìyì bwà mvùla àlòkelè baakàne nè babi; wùdi wènza nànkù's. Nè mamiinu makùna mu budimi kanà bwònsò, nànsha ówò mimpè anyi mabì, neàtòlokè; ndimiinu dimpè. Nè pìikalà dimiinu dikùna, nànsha byòbì nè...

Nè mùshindù wùmwpèlè wùvwà nyòka ewu mwà kukùna dimiinu edi, yèyè nguwva nyama umwèpèlè uvwa ulonda muntu. Bwalu mu dilondangana dyà bukwabantu, pàdi muntu... Nzambi wàkalàadila pa buloba... Nènku Yèyè kutwàdija kupàtula nyuunyi, nè... kuumukila ku nyuunyi Wàkafika ku bintu bishiilèshiiàngàne, pashiishe nsòkòmuntù, nè ku nsòkòmuntù kuya ku nyòka.

³¹⁴ Mpindyewu, Yèyè wàkashintulula nyòka awu mu mùshindù wa nè (cìvwa nè cyà kwenjiibwa) bìvwa mwà kufila cibwejakaji mu lukòngo elu, lùdi lùteeta bwà kujandula mufubà wùdi mufwànàngàne nè mùshindù kampàndà wà nyama uvwa citùpà cyà muntu nè citùpà cyà nyama, bwà kwamba nè pòpò apu ke pàdi muntu... Bàkaadi bacijimije kubangila ku nsòkòmuntù; ànu nsòkòmuntù kèna nè meeji to. Nsòkòmuntù kèna nè musùkà to; kèna mwà kwela meeji to. Yèyè ùdi ànu nè... Yèyè—yèyè ùdi mwà... Ànu—ànu mutooyi kampàndà, nè yèyè ùdi mwà... Kabàlù, "kya," "hò," anyi cintu bu nànkù awu. Mbwa nè: "Lwàkù apa, Fido, enzàku dinaya kampànda. Tumpikà's!"

Nè kutentakaja bintu nè bintu byà mùshindù awu, bàdi bènza nàнку ku disaluka, ku dyumvwa, nè bintu byà mùshindù awu, cyenzi kampàndà; kàdi bwà kwela meeji nè kuumvwa, kayèna mwà kucyenza to. Kí mmimanyè nè yìdi butaka to, kí mmimanyè mulùme nè mukàji, dishiilangana, mùshindù awu to. Kayèna nè mikenji yà bu nàнку awu . . . ? . . . Nwamònu anyi? Kayèna mwà kucyenzakù to. Muntu's ke umwèpelè udikù.

Nènku udi mulondele muntu ùvwa n'nyòka. Bible mmwambè nè yèyè nguvwa mutàmbe kudimuka ku nyama yònsò yà mu budimi awu. Wa meeji matwè, ùvwa—ùvwa—ùvwa mwambè kwikala nè musùukà. Ùvwa nè mwaba bwà musùukà, kàdi cyàkènzàye ncinyi? Wàkadisumbisha kùdi Sàtaanà bwà kuseeswisha Nzambì, uteeta bwà kucyènta. Mbanganyi bàdiku bàcyùm vwa mpindyewu too nè mwaba awu?

³¹⁵ Sàtaanà, nyòka awu, ùkaavwa mwámbe kwikala nè musùukà. Nzambì ùvwa mumanyè nè bàvwa mwà kukèba mifùbà ayi, kàdi kakwènakù mufùbà mu nyòka wùdi mufwànàngàne nè muntu to. Yèyè ùvwa . . . Ke mulawu wèndè ngòwò awu. Ùvwa wimanyina kuulu ànu mùdi muntu amu.

³¹⁶ Mònaayi's, dìbà adi dimiinu adi, òvwa dilondèle dimiinu dyà muntu adi . . . Sàtaanà yèyè mwinè, nyumà awu, ùvwa mumanyè nè ke dimiinu òmwèpelè òvwa òfwànyine kwimicisha mukàji awu, bwalu nsòkòmuntù kèna mwà kucyènta to. Mbacisopàkàje nè bikwàbò byònsò; kacyàkucyèntakù to. Kàdi ùvwa mumanyè nè mùtòlokù wà mwoyi wùvwa mu nsòkòmuntù awu kawùvwa mwà kulwa mu budimi bwà òyi dyà mukàji to; kàdi's ùvwa mumanyè nè dimiinu dyà nyòka òvwa mwà kucyènta, ke kukwàtaye mudimu nè nyòka awu.

³¹⁷ Nè Adàmà kàvwakù mumanyè nè cyenzi eci cívwa mwà kwenjiibwa to. Nwamònu anyi? Yèyè wàkwenjiibwa mukàji. Cyà bushùwà, nùнку's mmufikepu pashiishe; kàdi nudi numòna's, budishikaminyi bwà Nzambì bwà kuDileeja patòòke bu Musungidi nè—nè bikwàbò, mùnkaadi muumvwije misangu yàbùngi. Kàdi Sàtaanà ùvwa mumanyè eci, bwalu yèyè wàkalwa kùdiye mu mmwènekulu wa nyòka ewu, vwa nyama wa lwonji awu; nè nyama wa—wa lwonji, nè wàkalwa kùdiye. Nè yèyè wakiimicishiibwa kùdi Sàtaanà dyàmbedi.

³¹⁸ Nènku bu nwènù mwà kumòna, kùvwa byenzi ànu bibidi cyanààna byenjiibwe, nè kùvwa bàna bàsàtù balediibwe. Kenketaayi Mifundu. Yèyè wàkalela bàna bàà mapàsa. Umwe wa kùdìbo ùvwa ndimiinu dyà nyòka; mukwàbò ùvwa ng'Abèle. Mukàji awu wàkaseeswisha bàyèndè nè kwambila . . . Nwamònu anyi? Pashiishe kuleejayè bàyèndè cívwa bwalu, nè pashiishe yèyè wàkashààla nendè kàbidi, nè wàkalela mwànà ewu. Nènku ndi muswè bwà nwènù . . . bwà kuleeja nè yèyè ùvwa mwimite mapàsa ku bàbidi bashiilàngàne . . . Yèyè ùvwa . . . Awu's ùvwa mmukàji virgò.

319 Badi, nwamònu's, badi nè dikàndà. Byenzè mùdi tàngilàayi mwab'ewu. Abraham wàkasèla mwanààbò wa bakàji sungasunga. Mòna's, muntu yèyè musèle mwanààbò wa bakàji leelù ewu, bânà bèndè bààlèlàyè nebiikakalè bidingidingi. Nwamònu anyi? Kàdi muntu awu. . . Kàdi mwab'ewu Yakòbò. . . anyi—anyì Izàkà wàkasèla Leebèkà uvwa mwanààbò wa tatwendè mukwàbò sungasunga awu, mwanààbò wa mashi wa tatwendè mukwàbò kàbìdi's, bulongo bwà mu mashi, nwamònu's, mwànà wa mwanààbò nè Abraham.

320 Mònaayi, mònaayi mpindyewu, pa cyôci eci, nwamònu's, kùdi. . . bukwabantu bývwa nè makàndà à kanzèkelè. Mpindyewu, bu nwènu mwà kumòna cìtu misangu yònsò ànu mapàsà dibà dyònsò. Kùvwa. . . Kaayinà nè Abèlè's bàvwa mapàsà, nè Esawù nè Yakòbò bàvwa mapàsà. Yesù nè Yudaàsà bàakapàtukila mu cisàmbà cimwècimwè nè mu èkèleeziyà umwèumwè awu. Nè. . . Nànsha Nyumà Mwimpè nè mufwilakanyi nè Kilistò badi nè cyà kwikala mapàsà, “Batàmbe kufwànangana mu mùshindù wà mufwànyine kuseeswisha Basungula mene bu nè bìvwa mwà kwenzeka.” Nwácýumvù anyi? Eyo.

321 Mpindyewu bwà kujaadika cyôci eci, ndi muswè bwà nwènu kwangata Yuda awu. . . Ngèèla meeji nè mvensà wa 17, anyì mvensà wa 14 wa Yuda kàdi kwamba nè. . . Mpindyewu, mpindyewu, mònaayi eci. Mpindyewu, nènjikije. Mònaayi. Bwà kukòsa cintu cyònsò nkòong bwà kucilongolola, cyà kumpàla kwambàYe nè: “Nèntèekè lukunà pankaci pàà dimiinu dyèbè nè dimiinu dyà nyòka.” Nwamònu anyi? Mpindyewu, yèyè mukàji kèna nè dimiinu to. Ki bwà cinyì, mwàkapètàyè dimiinu edi divwa ndimiinu dyà Sàtaanà. Kaayinà uvwa mwànà wa Sàtaanà. Yèyè mukàji kàvwa nè dimiinu to, pa nàнку wàkadipetela ku disangila dyà mulùme nè mukàji. Nènku pàakacyènzàye, dyàkamupèèbwa kùdi mwena lukunà wa Nzambì. Nè pashìishe, pàakamupèèshà Nzambì Dimiinu, kaDivwamù nè disangila dyà mulùme nè mukàji to nànsha kakesè. Nwácýumvù anyi? Mukàji mupika nè mwanèndè kwipaciibwa, bwalu kabàvwa mwà kupyàna pàmwè nè mukàji mudishikàmine nè wendè mwànà nànsha.

322 Nènku mònaayi nè, dibà adi yèyè wàkapèèshiiibwa Dimiinu divwà Kilistò. Nànsha diyi dyèndè. . . Mpindyewu, beena Mishòonyi mbaswè kwitabuuja nè mmashi malediibwe kùdi virgò, aci cívwa m'Mashi mafùka à Nzambì mùvwà mùtòlokù awu wùsanganyiibwa, kàdi kwamba nè cívwa n'diyi dyà mukàji. To, mukalenge! Diyi adi kadyèna mwà kupwekela mu njila awu kubwela mu difù kakùyì kwenzèke disaluka kampàndà nànsha. Dibà adi udi utèèka Nzambì, nè—nè Nyumà, wènza disangila dyà mulùme nè mukàji nè mukàji kampàndà. Bidi mwà kwenzeka munyi? Cívwa ncintu cifùka kùdi Nzambì cyònsò nkòong, nè diyi nè mùtòlokù.

323 Nè Yèyè ùvwa Mwánà wa Nzambì, kàyì mwánà wa Màriyà to, bwalu Yèyè kàakamubiikilakù nè mamwèndè to. “Mukàjì,” mwàkamubiikilàYe, kacya kàcìkù maamù to. Kàvwa mmaMwèndè to. Ùvwa Mwánà wa Nzambì, nè Nzambì udi Umwe. Nwacyùmvù anyì?

324 Mpindyewu, cintu cikwàbò bwà kujaadika eci nè kucìpoopela mùsonso, mwaba wà nè ní nganyi ní nganyi yèyè mwà kukòkangana neebè, alùkila mu Mukàndà wà Yùdà emu, ngèèla meeji nè mmvensà wa 17 (mvensà wa 14 anyì wa 17), yèyè nè: “Mpindyewu, Henòkà . . .” Nudi baswè bwà mémè kucibala anyì? Nudi nè díbà dikùmbàne bwà kucibala anyì? Twánjì—twánjìbi . . . nè pashìishe nêngàngatè . . . Pashìishe nèmmanye, bwalu mukàbà wà méyì wùdi munkaci mwà kutungunuka, nè tudi—tudi bafwànyine kucipeta cibwelàkàne mu—mu eci mpindyewu. Ngánjì mmonèbi eci ní cidi . . . mvensà wa 14:

*. . . Henòkà pèndè, wa mwandamutekète awu
kuumukila ku Adàmà, wákamba ciprófetà bwà bintu
ebi, wàmba nè: Mònaayi, Mukalenge ùdi ùlwa pàmwè
nèndè nè binunu dikùmi byà bansantu bèndè,*

325 Mpindyewu, alùkilaayi ku nshapità mwi5 (Ngèèla meeji nè nyèyè) wa Genèsè, nè pashìishe kuya kàbìdì, lwà mu Mukàndà wà Luukà mwàmwa (ngìkalakù mwà kucipeta; mwà mucifùnde cyònsò kaaba aka, bu mémè mwà kucipeta muntwemu) nènku nenùjandule nè mu dilondangana dyà ndelàngànyì, kakwèna mwaba nànsha wùmwe mu Bible . . . Bu . . . Tàngilàayi's! Bu nè Noà . . . Pìikalàbi nè Henòkà ùdi wa mwandamutekète kuumukila ku Adàmà, Bible mmwambè nè: “Adàmà nè pashìishe mwanèndè wa balùme Setè,” bwalu Kaayinà kàvwa dimiinu dyà Adàmà to. Mbambè nè Adàmà wàkalela Setè, nè Setè wàkalela . . . Yalèdà; Yalèdà wàkalela, tupweka too nè ku Henòkà kwàka; nè Henòkà ùvwa wa mwandamutekète kuumukila ku Adàmà. Kakwèna mwaba nànsha wùmwe wùdìbò bàmba nè Kaayina wàkabadiibwakù kacya bu cintu kampàndà mu dilondangana dyà ndelàngànyì yà Nzambì to.

326 Mpindyewu, tàngilàayi ànu cyanààna nùsanganèbi ní bìdi nànkù anyì to; cikenketaayi. Kè Luukà kulwayè mwaba awu nè kuciinyikulula cyàkàbìdì, kupweka kuumukila ku Adàmà. Kakwèna kasangu nànsha kàmwe kàdìbò bàtèèla Kaayinà mu cintu cijimà aci. Nènku pìikalàbi nè Henòkà (nwamònu anyì?) nguvwa wa mwandamutekète kuumukila ku Adàmà, Kaayinà ùdi ùbwelela penyì? Bwalu Bible mmwambè nànkù, mu dilondangana dyà ndelàngànyì amu nè, Adàmà wàkalela mwanèndè wa balùme, Setè. Nè Setè wàkalela Yalèdà, nè Yalèdà kulela *Kampàndà*, ànu nànkù; nènku musangu nànsha wùmwe Kaayinà kààkatèèdiibwakù to. Díbà adi yèyè kàvwa mwà kwikala mwánà wa Adàmà to. Pa nànkù bìvwa bikèngela kwikalayè mwánà wa nyòka, nè yèyè kàvwa mwà kwikala mwánà wa balùme kakùyì disangila dyà mulùme nè mukàjì to.

Amen! Yéyè kàyi nànkú to, ùvwa mulediibwe kùdì virgò, díbà adì's ùvwa mwà kwikala mwànà wa balùmè wa Nzambi. Ndi muswè bàpatukèku mu aci musangu kampàndà.

³²⁷ Mpindyewu, Nzambi umwèumwè wàkabuulula aci awu, n'Nzambi umwèumwè wàkangambila bwà dibàkà dyèbè nè dishipa dyà dibàkà. PàdìYe wàmba bintu abi apu, Mwanèètù wa balùme, Mwanèètù wa bakàji. . . Mémè ndi mwanèènù wa balùme, muntu wetù ewu. Kàdi pàdìYe wàmba nànkú, nè aci cìdì cìdìtuuta lwà munda emu, ncyèna mwà kunùumvwijaci to. Kabyèna bikèngela bwà mémè kuteeta kucyènza to, bwalu ncìvwa mwà kucyènza to. Kàdi kacya kacitukù cyànji kwikalaku cyà mashimi musangu nànsha wùmwe to. Nànsha mùvwàbi nè, ncìvwa mwà kucimòna mémè mwinè to nànsha kakesè, ncìvwa mwà kucimòna to, kàdi ndi mushààle ànu kacya ngaakwàtakù; nè pashìishe Yéyè ùdì ùbanga kucibuulula, díbà adì ndi ànu—cìdì cìmpapula. Ke cyòcì aci ànu mwaba awu, kàdi ncìvwa mwà kucimòna to. Dilonga dyèbè—dyèbè dyà tulaasà adì ndicìinguluka, nè dilukakaja dyèbè dyà ngenyi ndicìinguluka, nè bikwàbò byònsò; nànsha Kaayinà ùvwa mucìinguluka.

Mpindyewu, bu nè tuvwakù nè díbà dyà kwalukila mu Genèsè emu nè kubanga kubala. . . Tùmonèbi ní ndi ànu mwà kucyàmbula nè kucipeta paanyimà apa. Ncyèna mumanyè bulelèlè ní—ní ndi mwà kufùdishà anyì to. Màndàmù Wood, udi muvùlùke pàmvwà nkuleejaci ditùkù adì apu anyì? Ànu cìvwa. . . Aci cìvwa nshapità mwi5 anyì? Mwi5, uh, huh. Éyo.

Ewu ke mukàndà wà nkòngò yà Adàmà. Mu matùkù àkafùkà Nzambi muntu, mu difwànangana nè Nzambi wàkamufùka. . . yéyè;

Yéyè wàkabàfùka mulùme nè mukàji; nè wàkabàbènesha, nè wàkabùkkila dìnà dyàbò Adàmà, mu ditùkù dyàkafùkiùbwàbo adì.

Nè Adàmà wàkashààla nè mwoyi bidimu lukàmà nè makùmi àsàtù, nè wàkalela. . . bânà bàà balùmè—nè wàkalela—wàkalela mwànà mufwànàngàne nendè yéyè mene, nè—nè mu cìmfwànyì cyèndè sungasunga; nè yéyè wàkamwinyika dìnà dyèndè. . . (Kaayinà anyì? Ha-ha-ha-ha-ha! Wàkamwinyika dìnà kaayi? Mwàn'àbutè uvwa nè makenji à bwanaàbutè awu ùdì penyì—penyì díbà adì's? Kabèèna nànsha mene bamutèèjakù to. Setè ke uvwa wendè mwànà.)

³²⁸ Mpindyewu, tudi tulwa cyàkàbìdì apa nè tudi tusangana mwaba wùvwà mwambè. . . Nè Evà wàkapèèbwa mwànà wa balùme, bwalu Kaayinà wàkashebeya Abèlè. Mpindyewu mònaayi patùdì tutùngunuka apa. Adàmà nè matùkù kufùka. . .

Nènku Adàmà wàkashààla nè mwoyi bidimu lukàmà nè makùmi àsàtù—wàkashààla nè mwoyi bidimu lukàmà nè makùmi àsàtù, nè wàkalela mwànà wa

balùme—wàkalela mwánà wa balùme mufwànàngàne nendè, mu cimfwànyì cyèndè; nè wàkamwinyika dìnà nè Setè:

Nènkù—nènkù matùkù à Adàmà paanyimà pàà yéyè...mulelè Setè àvwa bidimu nkàmà mwandamukùlù nè...nènkù yéyè wàkalela bânà bàà balùme nè bàà bakàji:

Nènkù matùkù ónsò àkashààla Adàmà nè mwoyi àvwa bidimu nkàmà citèèma nè—nè makùmi àsàtù nè... nènkù kufwàye.

Nènkù Setè wàkashààla nè mwoyi mu...bidimu lukàmà nè bitaanu, nè wàkalela Enòsà:... (Nè ànu nànkù too nè mùdibi bitungunuka, nè yéyè ke wa mwandamutekète awu, Henòkà ngwa mwandamutekète kuumukila ku Adàmà.)

Mpindyewu, ncyèna ànu mvùluka mwaba wùdici mu Luukà to. Udi pèèbè naaci cifùnda, mwaba awu anyì, Mandamu Wood? Yéyè nè mèmè... Mvwa mmuleejaci dīngà ditùkù lwà mu... Wamba nè? [Mwanèètù wa bakàji Wood ùdi wàkula nè Mwanèètù Branham—Muf.] Ngèèla meeji nè udi mwambilemù, Mwanèètù wa bakàji Wood. Tuvwa bacifunde mu mukàndà wèndè amu, mwaba wutùvwà, anyì, Bible wèndè awu, múmvwà ndeeja amu. S'ki cyòci eci, èyowà, dilondangana dyà ndelàngànyì adi. Eyo.

³²⁹ Mpindyewu, bu twètù mwà kumòna kaaba aka... Mu nshapitá mwi3 wa Luukà tudi twangata cintu cimwècimwè aci. "...mwena bânà balùme nè bikwàbò... nè Noà, bàvwà biikàle Lemèkà, mwena kàbìdì bânà balùme bàà Matùshàlà, uvwa kàbìdì mwánà wà Henòkà, uvwa mwánà wa Yalèdà, uvwa mwánà wa Malelélè, uvwa mwanà wa Kaayinà, uvwa mwánà wa Enòsà, uvwa mwánà wa Setè awu, uvwa mwánà wa Adàmà awu, uvwa mwánà wa Nzambì awu." Mmwaba kaayi wùdì Kaayinà ùbwelelamù? Kaayinà ùdi penyì, mwánààbutè awu? Bukenji bwà bwanaabutè abu kùdiye; yéyè wàkafùmina penyì? Yéyè ùvwa dimiinu dyà Sàtaanà, kàdì kàvwa wa Nzambì to. Kàvwa nànsha wa Adàmà to, bwalu dìnà dyà mwánà wa Adàmà òvwa—òvwa Setè. Kaayinà, dimiinu dyà nyòka, wàkashebeya mwanèndè wa balùme wa kumpàlà uvwa cifwànyikijilu nè mundìdimbì wà nyòka awu ùshebeya kàbìdì mwanèndè mukwàbò wa balùme awu, Yesù. Ke Setè kwangatayè kaaba kèndè mu dilondangana dyà ndelàngànyì, cìvwà cyùmvwija dibìikà dyà ku lufù, bwà dilondangana dyà ndelàngànyì yà Nzambì yàmònakù mwà kutungunuka nè kwenzeka ànu mu kaabujimà.

³³⁰ Ndi muswè kumòna muntu kampàndà ùmutèèkamù mpindyewu nè kwamba nè kacìvwa dimiinu dyà nyòka to. Kacìvwa cijingùlùdìibwe mu dilondangana dyà ndelàngànyì yà Nzambì to, anyì ndelàngànyì yà bukwàbantu, ndelàngànyì

yà Adàmà, yònsò wa ku bakwàbò abu. Ncyà bushùwà anyi? Mbanganyi bàdì bàcìitabuujà, bàmbè nè: “Amen.” [Disangisha didi dyàmba nè: “Amen.”—Muf.] Bushùwà. Yèyè kàvwamù to; yèyè ùvwa dimiinu dyà nyòka nè kàvwa dimiinu dyà Adàmà to!

³³¹ Wàkamba nè ùvwa mmwànà wa balùme wa Adàmà. Kàvwa mwànà wa Adàmà to. Yèyè wàkamba nè: “Ndi mumupetèle kùdì Nzambì.” Nènku bìvwa bikèngela bwà yèyè kucyenza, cìvwa ndimiinu kampàndà. Dìvwa ndimiinu, kàdì òvwa ndimiinu dyà nyòka. Nwamònu anyi?

³³² Nè bìvwa bikèngela bwà Yèyè kwalukidila kùdì virgò dìbà adi bwà kukezula cyenzedi cyà disangila dyà mulùme nè mukàjì cìvwa cyenjìibwe aci. Adàmà wàkatèèkiibwa pa buloba apa, kàdì yèyè kàvwakù—kàvwakù mufwànyine kujandula nè yèyè ùvwa nè cyà kwikala taatù to. Nudi bumvwè cìndì muswè kwamba aci. Sàtaanà mumanyè eci, wàkaya kùdì Evà kumpàlà kwà Adàmà kukùfikayè. Nènku ke mwaba awu wùdì cintu cyònsò mu kaabujimà cìsanganyibwa leelù ewu. Nènku mwanèètù wa balùme, aci's ke cìdì cyènzà nè dibàkà nè difwà dyà dibàkà nè bikwàbò byònsò bìikale cimvundù mùdibi leelù ewu emu. Bidi bitàmba kwenza luse be. Nwamònu anyi? Kàdì ndi. . . Nzambì mmusebè njila, utùdì nè kusàkidila bwende's.

³³³ Nudi baMunangè anyi? Yèyè kì mmulenga wa dikèma anyi? Mpindyewu, dimiinu dyà nyòka ndyà cyà bushùwà anyi? Mvwa ndyàmbedila nè pàmwàpa muntu kampàndà mu ditèèleja mukàbà wà mèyì mmufwànyine. . . mmufwànyine kwela meeji nè ndi nè bwòwà bwà kucibùndula. Nudi numòna anyi? Pa nànkù mbafwànyine kwamba nè: “Mòna's, yèyè mmucìcyàngùlùke misangu yìbìdì. Yèyè's ùdì ànu nè bwòwà bwà kucìlenga.” Katwèna naaci bwòwà to. Pàdibi ànu nè Mukalenge ùdimù, kakwèna bwalu to.

Nudi bamanyè mùdì bwalu anyi? Mùngàmbì, mukankù awu musangu wùmvwà mutàngile, mwikàle wùmvwà mapwàpwà èndè awu, nudi bamanyè's. Mèmè kudyàmbedila nè: “Kwèna naanyi bwòwà anyi?” Mvwa nè cingoma cyànyì citèèka mwaba awu; mèmè nè: “S'ndi mwà kukwasa cingoma.” Ùvwa mumanyè nè ncìvwa mwà kumwasa cingoma to; mvwa kule menemene nè cingoma aci. Mèmè nè: “Udi ucìina anyi?” Kutononayè ànu mèsù èndè manène awu nè kuntàngila. Kaanshìndì kakesè kàà kashila kasòmbe mwaba awu kamònàngàne ànu nè kwenza nè: “Cya, cya, cya, cya, cya, cya; nènkusùnsùlùlè, nènkusùnsùlùlè's!” Yèyè kàvwa mutùmekù ntèmà kùdì nshìndì wa kashila awu to, kàdì ùvwa mucyòke nè dimutèèleja's. Nànkù ke paanyimà pàà katancì, kwelaye ànu mulwà munène, kupàtukaye mùshìndù awu, kàdì kwalabaja ànu mapwàpwà èndè awu. Nènku's ùvwa mumanyè mùshìndù wà kunyungisha mapwàpwà awu, kubùuka ànu buludì kujìmina nè kwìsù. Nwamònu anyi? Mèmè kumumòna ànu wùshààla kantu kakesè menemene mùshìndù ewu, ànu katòba cyanaànà.

334 Mwanèètù Fred, ngèèla meeji nè ndi mukuleeje. Ndi mumòne Mwanèètù Fred paanyimà pààpa mpindyewu, pàvwàye mwele lubilà nè “Amen!” ànu katanci aka. Ngèèla—ngèèla meeji nè mvwa mukuleeje katòba aku kuntwaku, nè Mwanèètù Wood, kwònsò kùdì usanganyiibwa aku, lwà mu mikùnà mwàmwa, mwàkenzekela bwalu abu amu. Mémè kumòna mukankù awu. Mémè. . . Wàkenzejiibwa ku bukòlè bwà kutùùluka mu cipeepèlè cikòlè cyà mvùla aci, nè mémè mvwa mwimànyìne paanyimà pàà mucì ewu.

335 Mvwa munkaci mwà dilemba mbudi (nènku dîbà dîkaavwa diyè bikòlè ndambù), nè tuvwa mu ngondo wa kaswàmansènsè, nè kùvwa nèjè nè bikwàbò. Mwanèètù wa balùme ùvwa neetù kuntwaku mu mvùù mushààle wà mabeji àpòòpoka ewu, Mwanèètù John nè bakwàbò abu, ànu lwà kumutù kwà Lusongo lwà Corral kwàka ke kùvwà bwalu abu.

336 Mémè kwimana mwaba awu, nè mémè kwimana paanyimà pàà mucì ewu. Kùvwa kùlòka ndambù wa nèjè nè ndambù wa mvùla, nè mémè’s mvwa ànu mwimàne mwaba awu. Mukankù awu wùvwa mwimàne, kàdi kwenzejiibwawù bwà kutùùluka panshì apu. Kubùùkayè kuntwaku, mukwàcikwètù wa mmwènekèlu munène, wa katankù wènzà bwòwà, mukankù munène, mufiikùlùke. Mémè kusòmba mwab’awu è kukènzakana, kudyàmbidila nè: “Èè. . .” Mvwa—mvwa mpìcila mu—mu cikondo cilenga cyà dikèma. Mvwa ngèèla mbilà mikòlè nè: “Mukalenge àtumbè’s! Àlèluuyàh!” Mémè kwenda kuya nyùnguluka mwitu amu, mumònàngàne nè kwela mbilà mùshindù awu. Mémè kutàngila panshì apu; mvwa mwà kuumvwa mubwàbwà mukulàkaji awu wèla mikunda. Nudi bamanyè mùtùyi yìbanga kwela mbilà amu.

337 Cidimu cishààle kuntwaku, pàvwà. . . pabwìpì menemene nè mvùla kubanga kulòka, yìvwa yìbanga kwela mikunda; cìvwa mbwa wa diitu, nudi bamanyè’s. Mémè ntu munangè ànu kuyitèèleja.

338 Dîbà adi mvwa mwà kutèèleja mbudi lwà kule kwàka wukungula nè: “Wui huu,” wèla mpungi. Nè lwà kule kwàka mwena dyèndè wùmwandamuna. (Lumingu lùlwalwà elu, lumingu lwà paanyimà pàà lùlwalwà elu, nèngiikalè nyilemba, bu Mukalenge mwà kwanyisha.) Pa nàнку dîbà adi, kuumvwa cyòci aci kuntwaku, kaa, cidi ànu cyà difwànà dyà Nzambì bwà kwikalaci kuntwaku. Kaa, ndi—ndi ànu. . . Aci’s—aci’s ke kàtèdrale kàànyì kuntwaku kùntù nyiikila Nendè, nè pashiishe ntùùluka mwab’ewu bwà kuyiikila neenù. Nwamònu anyì?

339 Nènku lwà kuntwaku, kaa, mbilenga byà dikèma, ànu ngènda ngòòloloka. Ànu kwimana mwaba awu, mémè kudyàmbidila nè: “Kaa, Nzambì. . .” Mémè kutàngila, pashiishe mvùla kudituuta, nènku micì yà sapins mibwikidija kùdì mabwe à mvùla, nè mwanzankongolo kwalabala eku nè eku kwà dyulu

kwambwila ànu ku Lusongo lwà Corral too nè pa Mukùnà wà Mikòòkò, too nè *lwàlwa* luseke, kuya too nè *lwàlwa* luseke. Ke mèmè kudyàmbidila nè: “Kaa, Nzambi, tàngilà kwaka. Umm,” mèmè kudyàmbidila nè: “ke Wèwè ewu’s, Alpha nè Omega, Cibangidilu nè Ndekeelu. Ke cyòci cidì cipweka nè apa eci, kwàka nàka. Wèwè udi umwèumwè awu makèèlèlè, leelù, too nè kashidi, Bikondo Mwandamutekète byà Èkèleeziyà, Bitèèkedi byà myèndù byà Ngòlò Mwandamutekète abi. Ke Wèwè awu’s, Nzambi, mùshindù mwinè wùdi Wèwè mulenga’s wè.”

³⁴⁰ Nènku mvwa ànu ngèèla mbilà cyaanàna, mèmè kutèèka cingoma cyànyì panshi; mèmè kuya ngènda nyunguluka mucì awu ngèèla mikunda nè: “Butumbì kùdi Nzambi’s wè! Mukalenge àtumbè,” mumònàngàne nè kunyungulukakila mucì mùshindù awu. Mvwa ànu mupicile mu cikondo cyà dicyònkomoka kuntwaku mu mèmè mwinè, ànu Mukalenge nè mèmè, nudi bamanyè’s.

³⁴¹ Nènku paanyimà pàà katanci mukankù awu kupàtukawù munkaci mwà meetu awu kàdi kungwosha dísù. Mèmè kudyàmbidila nè: “Èè, kwèna munangè aci anyi?” Mèmè nè: “Wèwè mulumyàna, s’ndi nkuukwila Nzambi umwèumwè udi mukwenzè awu.” Nwamònu anyi? Kutuutakajayè ànu mèsù èndè manène bikolè à mmwènekeli wa makùnzùbile nè kukènzakanaye kuntàngila, nè mèmè ngèèla mikunda mùshindù awu.

³⁴² Nshindì mukesè, wa kale wa mu micì milemilè yà pin (muntu kanà yònsò udi ulemba mu mikùnà, yèyè’s—yèyè’s mpùlushi wa mu meetu), ke kutùpikilayè mwaba awu (mulumyàna mukesè wa kale, kàyì nè bunène bukumbàne bwà kwenza cintu nànsha cimwè to, kàdi kaa, mutooyi kaayipu’s wè)—nè kutùpika kuulu aku, kutùpika kuya muulu kwalukila panshi, nudi bamanyè’s, “yah, yah, yah, yah, yah, yah—yah, yah, yah, yah, yah, yah,” kacya ànu wàtùngunuka mùshindù awu.

³⁴³ Nènku mukankù awu wùvwa wùmutàngila; wùvwa mwà kuntàngila. Mèmè kudyàmbidila nè: “Èkèlekèle, Mukalenge, èè, cyùdi Wèwè ewu mungiimànyikile pa cintu bu nànu ncinyi?” Nwamònu anyi? Mèmè nè: “Bwalu, Udi mumanyè’s, mvwa munkaci mwà kuKukuukwila. Udi muswè bwà mmonèku cintu kampàndà pa mukankù awu anyi?” Mèmè nè: “Nèmulongè, anyi cidì mpa nshindì wa pin anyi?” Mèmè kwimana mwaba awu e kuyitàngila; mèmè kudyàmbidila nè: “Nèmulongè ànu kakesè ndambù.” Mèmè nè: “Cintu cimwèpelè cingàakamumònà naaci, yèyè kàvwa nè bwòwà to.” Mèmè ntu munangè aci, kàyì nè bwòwà to. Ùvwa mwimàne mwaba awu, nyuunyi munène menemene awu; mèmè kwamba nè: “Udi mumanyè mùdi bwalu anyi?” (Cingoma cyànyì cìvwa citèèka kuulu cyeyeka ku mucì.) Mèmè nè: “S’udi mumanyè nè ndi mwà kukwasa cingoma’s?” Yèyè ùvwa mumanyè bìmpè kutàmba aci; ùvwa mumanyè cintu cimwèpelè nè: Ncivwa mufwànyine kucyènza; bwalu ntu ntàmba

kumwanyisha be. Nwamònu anyi? Ke yêyè awu mwimàne mwaba awu, kàyi wùciinakù nànsha kakesè to.

344 Ke mèmè kudyàmbidila nè: “S’ndi mwà kukwasa cingoma’s.” Mpindyewu, mvwa mwà kumumòna; yêyè’s ùvwa mwà kukenzakana kuntàngila mùshindù awu. Ke kutùngunukayè nè kubaalula mapwâpwâ èndè awu, nudi bamanyè’s, ùàluja paanyimà. Nudi bamanyè mùdìyi yènza mùshindù awu, mapwâpwâ àyi awu, nudi bamanyè’s. Mapwâpwâ manène à bule *ebu*, nudi bamanyè’s, nè yêyè ùvwa mulùmýànà munène. Ùvwa musòmbe mwaba awu, ki mèmè kumutàngila. (Aci’s civwa kule menemene kumpàlà kwà mèmè kumanya bintu ebi; eci’s civwa ncyà kukaadi bidimu nè bidimu, pàmwâpa kùkaadi bidimu makùmi àbìdì.)

345 Ke mèmè kumutàngila. Paanyimà pàà katanci, mèmè kumumòna; mèmè kudyàmbidila nè: “Ncinyì cìdìye—ncinyì cìdìye. . . Kènà nè bwôwà to, ke mèmè kusànka nè aci. Kàdi ncinyì cìdì citàmbe kwikala cyà difwànà dyà Nzambi pa bìdì bitàngila mukankù mukol’awu’s?” Pa kumòna mwìnù mukòbàme, munène wà menemene awu, mupàtuka mùshindù awu, nè mèsù manène awu, mèmè kudyàmbidila nè: “Balumýàna wa yaaya, s’nyuunyi ànu wetù wa menemene ewu.”

346 Mpindyewu, muntu nànsha umwe. . . Kabemba, bu kòkù mwà kuteeta kumulonda, Kàdi mwà kusunsuluka. Kakwèna cintu nànsha cimwè cidi mwà kumulonda to. To, to! Mbifwànyine kwangata ndèkè bwà kucyènza. Èyowà’s, mukalenge! Nyuunyi nànsha umwe kena mwà kumulonda to, pa nànkù, ùdì ùya muulu menemene. Nè pashìshe, ùdì nè mèsù; ùdì mwà kumòna too nè panshi kàbìdì, paanyimà pàà yêyè mumanè kufika muulu mwàmwa, kumòna kule menemene.

347 Mpindyewu, Yèhowàh wàkafwànyikija bapròfetà Bèndè nè mikankù (nudi numòna anyi?); Yêyè ùvwa mwà kubàjuula kuulu mùshindù ewu. Bìvwa bìkèngela bwà kwenjiibwabò lu mùshindù wà pabwàwù. Tùmonààyi bì. Badyànjila kulongolola, balediibwe bwà kiipàcìlà aku (nwamònu anyi?), bwà kwikala bàbàndishiibwa mùshindù ewu. Nènku dîbà adi wèwè. . . Bìdì bìmpè bwà wèwè kubànda muulu amu ku cinyì pawikalà kùyì mwà kumòna nè udi penyì? Nwamònu anyi? Bìdì nè dikwàcisha kaayi bwà kubànda muulu amu pawikalà kùyì mumanyè cyùdì wenza? Nwamònu’s, nwamònu anyi?

348 Bìdì nè dikwàcisha kaayi bwà kutùpika muulu nè kupweka panshi, kwela mbila nè kwakula mu myakulu, paùdì kùyì mumanyè nè byònsò abi mbyà cinyì? Nwamònu’s, nwamònu anyi? Bìkèngela ùfike ku dyumvwa paùcìdì muntwamu apu. Nwamònu anyi?

349 Ke dîbà adi, mèmè kumutàngila, nudi bamanyè’s, pàvwàye ùnyùnguluka mwaba awu apu. Mèmè kutùngunuka. . . Mvwa ànu mmukàcìla; ùvwa nyuunyi mulenga kumòna wa dikèmà’s.

Kàdi pèndè, ùwà pàmwápa mwà kudyà yìmwè yà ku minyiinyi yànyì yà kashà nè bintákanyì bindì. . . Mémè kumutàngila, nènku paanyimà pàà katanci mémè kudyàmbidila nè: “Udi mumanyè’s, ncinyì—ncinyì cidiye. . .”

³⁵⁰ Paanyimà pàà katanci yèyè kucyòka. Ncyèna ngèèla meeji nè wákacyòka bwà kuntàngila to, kàdi ndi ngèèla meeji nè wákacyòka bwà ditèèleja dyà nshindi wa kashilà mukèsè wa kale ùwà musòmbe lwà mwaba awu. Nudi bamanyè’s, tudi naabò búngì cyanààna mu citùùdilu leelù ewu. Nudi bamanyè anyi? Nwamònu anyi? “Cyacya, cyacya, cyacya! Matùkù à bishimà àkaadi mamane kupita! Cintu pààci nè ndyondopa dyà kùdi Nzambi kacitukù to. Katùcyèna kàbidì nè bintu ebi to!” Nwamònu anyi? Kaanshindi kàà kashila kakesè kàà kale kàà cyendela panshi aku kasòmbe lwà kuulu pa cikuuku cyà mucì apu. “Bikèngela wikalè wa mu *cikampàndà*. Tudi—tudi—tudi ba. . .” Nwamònu anyi? Kasòmbe ànu mwaba awu kaditwe mu dyanza mutooyi kàbànda kàpweka. Kaa, yèyè’s ùwà ùzakala, ùwà ùnyùkuka bikole be.

³⁵¹ Kucyòkayè nè dimutèèleja, kàdi kwenzayè ditùpika dimwè dinène, dyà katankù, nè kunyùkusha ànu ditàmbà òwàwè musòmbelepù adi, mùshindù ewu. Ditàmbà kàdi kunyùkuka, mùshindù awu, è kumba kukwàta njila kuya. Nwamònu’s, kutuutayè mapwàpwà èndè nè kupenga njila mu nsongo yà micì amu. Kàdi pààkènzàye nànkù, mémè kumumòna. Nwamònu anyi? Kàvwa ùciina to, bwalu ùwà mwà kuumvwa bwikadi bwà mapwàpwà èndè mamupà kùdi Nzambi awu. Yèyè ùwà mumanyè nè mapwàpwà awu àvwa mwà kumutwàla kule nè njìwù yà mùshindù kanà wònsò. Nwamònu anyi?

³⁵² Nè pa nànkù, mùshindù awu ke wutùdi baswè kuumvwa. Eci ke Dìyì, nè Yèyè wàkafùnda Dìyì awu ke Mapwàpwà àànyì. Ncyèna ncìina Dìyì adi nànsha; Dyòdi nedìkwambùlè kukupicishila buludi mu lutàtù lwà mùshindù kanà wònsò lùdiku alu. Didi Mwelè wà mvità wikalà mwà kusòolela njila waDì mululàme ànu buludi. Kanùtacishikù meeji bwà bwalu abu to. Nwamònu anyi?

³⁵³ Dìbà adi mémè kumumòna. Kààkatuuta mapwàpwà to, wàkoolola ànu mapwàpwà èndè awu. Nwamònu anyi? Nè aci, dìbà dyònsò òwàwè lupeepèlè mwà kubwelamù adi, yèyè ùwà ànu ùbanda muulu, ùtùntumuka ànu kutùntumuka muulu.

Mémè kwimana mwaba awu, kàdi kuvùnga mabòkò, è kumutàngila too nè mwàkashààlaye katòba kakesè kàmvwà kàbidì nciyi mwà kumòna to. Ke mémè kudyàmbidila nè: “Nzambi, ke cyòci aci’s.” Kí nkunyeema kukashààla wa ku *cikampàndà*, nè kunyeema kukashààla wa ku *cikansanga*, nè kwenza *cikampàndà*, *cikansanga*, anyi *cikankènga* to; cidi ànu kutèeka mapwàpwà èbè (nwamònu anyi?); mumanyè mwà kutèeka mapwàpwà èbè à diitabuuja awu mu Dìyì dyà Nzambi,

nè kubùuka kuya kule nè lukutukutu lwônsò lwà dyenza dyà mitooyi eku nè dyenza dyà mitooyi kwaka elu. Èyowà's! "Maulu nè buloba nebijiminè, kàdi Dîyì Dyànyì kadyàkupangilakù to."

³⁵⁴ Mpindyewu, ndi cyàkàbìdì nè bàà ku nwênù abu makùmi àbìdì majimà mu mapingaja emu. Mpindyewu, nwênù bàdì pa...bàdì mu miyiiki yà bàbìdì bwà mu mapingaja emu abu, mòna's, nudi numòna Billy, bwalu ndi ngèèla meeji nè nebàteetèku ànu bwà kubangakù kumpàlà kwà dîbà ndambù bwà mèmè kubàbwejamù bwônsò. Mèmè mwà kukòòkesha, ndi muswè kubweja muntu yônsò wa ku bôbò udi mwà kukùmbana bwà mèmè kwangata awu. Nènku ndi mwenze cyôci eci, kî mbwalu... Billy kàvwa mumanyè cyôci eci to, nwamònu's, kàdi meeji àànyì àvwa mayumbàkàne paanyimà pàà bìkèèna-kumòna bitwè ku makùmi àbìdì bìndì mupete muntwamu mu dîndà emu, nudi numòna's, mu mùshindù wà nè, anyì cyônsò civwàku aci, cìdì ànu bu cìdì cìkubweja mu...Ke Billy kwamba nè: "Mbwa cinyì kwènakù wanji kupàtuka bwà kupeta ndambù... Kudyòlolakù, kupàtuka, nè kulwa kwandamuna yimwè yà ku nkonko ayi kuntwaku."

Ki mèmè nè: "Mwanèètù Neville's ùdi nè diyiiisha dyèndè."

Yèyè nè: "Nénye kamwambila." Kuyayè kuntwaku.

Mwanèètù Neville kwambayè nè: "Lwâyaaku's!" Ke dîbà adi, mèmè kujuuka è kulwa mwab'ewu. Nè bàmwè bàà kùdìbo mbindile mu mapingaja emu. Mfwilaayikù luse bwà mûndi munùlamè kaaba aka too nè pa dîbà ùmwè jaajaaja, kàdi nêngiikalè...ngèèla meeji nè nebikèngele bwà mèmè kuumuka ditùkù dyà paanyimà pàà mààlabà, bwà kwalukila cyàkàbìdì ku Arizona.

³⁵⁵ Vùlukààyi nè, bu Mukalenge mwà kwanyisha, musangu wàlondà wùngààlukilà, ndi muswè kuyiishapù, bwènù nwênù, pa...kunùleeja mu Mifundu bulelèlè bwà dibàkà nè difwà dyà dibàkà. Eci...Nènku mpindyewu...Nè pashìishe, kucilekela ànu...Kucyéla ànu patòòke mùshindù wùdici menemene awu, dîbà adi nenùcimònè kubangila ànu apu. Nànku too nè ku cikondo aci, ikàlaayi nè bukìtù bwimpè; Mukalenge ànùbènèshèku mu mùshindù mubanjiike menemene. Tudiku mwà kwimana kuulu anyi? [Mwanèètù wa bakàji kampàndà ùdi ùfila bipròfetà. Katùpà kàà mukàbà wà mèyi munda mutupù—Muf.] Mukalenge atumbè.

Ndi muMunangè, ndi muMunangeè (Udi mumunangè anyi?)

Bwalu Yèyè wàkannanga kumpàlà,

Nè wàkampetela lupàndu

Ku mucì wà Kàlvariyò.

³⁵⁶ Nudi baMunangè anyi? Mpindyewu, tìlabulanganàayi ku cyanza muntu nè mukwèndè, patùdì twimba cyàkàbìdì apa.

Ndi muMunangè, ndi muMunangè,


Bwalu Yèyè wàkannanga kumpàlà,
Nè wàkampetela lupàndu
Ku mucì wà Kàlvariyo.

³⁵⁷ Kaa, abi kî mbilenga bilaya anyi? Kaa, ekèlekè! Billy ùvwa muswè bwà mèmè kumanyisha nè, paanyimà pàà dibènesha, yèyè ùdi nè díyì dyà kunwàmbila nwènù bàdi kaaba aka bàdi baswè miyiiki yà bàbìdi yà pàà nkààyeenù ayi. Nudi numòna anyi? Yèyè mmuswè kutwilanganakù neenù ànu mu tusunsa tukesè cyanààna. Kàdi ndi ndyùm vwa mpindyewu mene, bwà kwangata ànu katanci kakesè cyanààna bwà dikuukwila. Aba... Kanwènaayikù banangè kuMukuukwila mu Nyumà anyi? Uh-huh.

Nè wàkampetela lupàndu
Ku mucì wà Kàlvariyo.

³⁵⁸ Kaa kî mbilenga bilaya anyi's? Kaa, ndi—ndi muMunange. Munda mwà mwoyi wànyì ndi muMunange, piikalàbi nè ndi mumanye mwoyi wànyì. Ndi ngùtabuuja nè nwènù pèenù nudi baMunange. Pa nànkù bònso pàmwè tudi bàna Bèndè. Tudi banangangane muntu nè mukwèndè. Mpindyewu, ncyèna mwà kuMunanga nciyi mununange to. Kàdi mèmè mwambè nè ndi muMunangè kàdi nciyi mununangè to, Bible mmwambè nè ndi mwena mashimi. Nwamònu anyi? Nènku mèmè... Nwènù baswè—nwènù baswè kunnanga anyi kunanga dikù dyànyì... Bu disungula divwa nè, cìndi muswè bwà nwènù kwenza, nkunnanga mèmè anì nkunange dikù dyànyì; nangàayi dikù dyànyì. Mbipiciibwe nè nwènù banange Billy Paul pamutù pàà kunnanga mèmè. Byòbì mwà kufika ku kashiikija kàà mùshindù awu, mbipiciibwe nè nwènù bamunangè yèyè. Ndi muswè nùntèèlèjè, bwalu Billy kî mmwambi to. Kàdi ndi muswè nùntèèlèjè, cìndi nnwàmbila aci; kàdi pàdi... panwikalà baswè kunanga muntu kampàndà, nùmunangè cyà bushùwà, wèwè udi wamba nè: “Anyi ndi muswè kukunanga wèwè anyi Billy,” nangà wèwè Billy. Nwamònu anyi? Nzambì ùdi ùmvwa mùshindù wùmwèwùmwè awu bwètù twètù. Nènku katwèna mwà... Dìbà adi ndi mumanyè nè kwèna mwà kunanga Billy kùyì munnangè mèmè to, bwalu yèyè nciyupà cyà ku mèmè. Nwamònu anyi? Pa nànkù ncyèna mwà kunanga Nzambì nciyi mukunangè to, bwalu wèwè udi citupà cyà Nzambì. Nènku tudi banangàngane muntu nè mukwèndè. Kaa, ngèèla meeji nè mbilenga byà dikèma. Kanwènaayiku nwela meeji nè misambu mbintu kampàndà bilenga byà dikèma paanyima pàà twètù bamane kupeta ebi, bandàmùne bintu ebi, mwaba wùdibi bitùyumbàkàje ewu anyi? Uhm, uhm, kaa s'mbilelèlè byà menemene.

Ndi muMunange, ndi muMunange,
Bwalu Yèyè wàkannanga kumpàlà,
Nè wàkampetela lupàndu
Ku mucì wà Kàlvariyo.

Kaa, nebàfuminè ku esètè nè . . . 

64-0830M Nkonko Nè Mandamuna #3
Branham Tabernacle
Jeffersonville, Indiana États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org